

652



28

মার্কণ্ডেয় পুরাণান্তর্গত

শ্রীশ্রীচণ্ডী

বাল্লালা পদ্যানুবাদ ।

শ্রীমহেন্দ্র নাথ মিত্র প্রণীত ।

৩
চণ্ডী-মাহাত্ম্য ।

শ্রীদেবেন্দ্র বিজয় বসু এম, এ, বিরচিত ।

কলিকাতা,

৩২।১ নং মস্জিদ বাড়ী ষ্ট্রট,

অধ্যায় গ্রন্থাবলী প্রচার কার্যালয় হইতে,

শ্রীঅঘোর নাথ দত্ত এফ্, টি, এম্

কর্তৃক প্রকাশিত ।

সন ১৩০৩ ।

মূল্য ৫০ বার আনা মাত্র ।

কলিকাতা ।

২ নং মস্জিদ বাড়ী ষ্ট্রীট “বিভাবতী প্রেসে”

শ্রী ব্রজরথাল বিশ্বাস দ্বারা মুদ্রিত ।

উৎসর্গ ।

—:—

“ বা দেবী সর্বভূতেষু মাতৃরূপেণ সংস্থিতা ।
নমস্তুস্তৈ নমস্তুস্তৈ নমস্তুস্তৈ ননোনমঃ ॥ ”

মা !

তুমি মহাশক্তি—সৃজন-পালনকত্রী । তুমি জগতে
মাতৃ-রূপে অবস্থিতা । তুমিই এতদিন আমাকে এ নশ্বর
জীবনে মাতৃ-রূপে রক্ষা করিয়াছিলে । আবার তুমিই মা
আমাকে মাতৃহীন করিয়া—আমাকে অনন্ত দুঃখ-মাগরে
ভাসাইয়া দিয়া—অসহন হইসে !

তুমি আমার চক্ষু-চক্ষের অন্তরালে লুকাইয়াছ । কিন্তু
মা ! আমি নিত্য তোমাতেই প্রতিষ্ঠিত । তুমিই আমাকে—
এ অধম অকৃত সস্তামকে—প্রসন্ন হইয়া রক্ষা করিতেছ ।
আমি তোমারই সেই স্নেহময়ী মাতৃ-মুক্তি ধ্যান করিবার
জগৎ, তোমারই অনন্ত মহিমা কীর্তন করিবার জগৎ,
তোমারই শক্তি-বলে তোমার মাহাত্ম্যের এই পদ্যানুবাদ
সমাধা করিয়াছি ।

তাই মা ! আজি তোমার পূজায়, আমার ভক্তির এই
কুদ্র অঞ্জলি—তোমারই সামগ্রী, আমার স্বর্গ-মোক্ষ-প্রদ
তোমারই চরণে অর্পণ করিলাম ।

কোল্লগর ।

সেবক

সন ১৩০৩ সাল, ১৪ই বৈশাখ । শ্রীমহেন্দ্র নাথ মিত্র ।

গ্রন্থকারের নিবেদন ।

মাতৃ-মোক্ষ-পদ স্মরণ পূর্বক বঙ্গ-কবিশুক্রগণ-পদে নমস্কার করিয়া, আমি 'চণ্ডী' পদ্যে অনুবাদ করিয়া প্রকাশ করিলাম ।

যাঁহার সহায়ে—যাঁহার আশ্রয়ে—যাঁহার উত্তেজনায়, আমি বঙ্গ-সাহিত্য-ক্ষেত্রে পদার্পণ করিলাম, আমার সাহিত্য-গুরু সেই অগ্রজ-প্রতিম পূজ্য শ্রীযুক্ত দেবেন্দ্র বিজয় বসু মহাশয়ের ধ্বংস কখন পরিশোধ করিতে পারিব না । প্রায় দেড় বৎসর হইল, বঙ্গ-সাহিত্য-সমাজে সুপরিচিত উক্ত মহোদয়, আমাকে কবির নবীনচন্দ্র সেনের চণ্ডীর পদ্যানুবাদ পাঠ করিতে দেন । এবং চণ্ডীর সহজ ও সুখ্যা-পাঠ্য অবিকল পদ্যানুবাদ বঙ্গ-সাহিত্যে বিশেষ প্রয়োজন বলিয়া, আমাকে স্নেহ-বশতঃই প্রথমে চণ্ডীর পদ্যানুবাদ করিতে আদেশ করেন । কিন্তু আমি একরূপ গুরুতর কার্যভার গ্রহণে অসমর্থ বিবেচনা করিয়া, প্রায় মাসাবধি ইহাতে তত্তাপণ করিতে সাহস করি নাই । তিনি নিজে 'গীতার' পদ্যানুবাদ প্রভৃতি সাহিত্য-ক্ষেত্রের আরও গুরুতর কার্যে ব্যাপ্ত থাকিয়াও, চণ্ডী কয়েকটি মাত্র শ্লোক অনুবাদ করিয়া, আমাকে সেইভাবে অনুবাদ করিতে উপদেশ দেন । আমার অবিকার না থাকিলেও, আমি শিবের জ্যৈষ্ঠ তাঁহারই আদেশ অনুবর্তন করিয়া, এই গুরুতর কার্যে প্রবৃত্ত হই । ক্রমে তাঁহারই উৎসাহ, উত্তেজনা, ও উপদেশে এবং মাগের অনন্ত রূপায় এই অনুবাদ সমাধা করিতে সমর্থ হইয়াছি । গুরুর শক্তি যেরূপ শিবের কার্যে প্রকাশ পায়, এক কথায় আমার এই অনুবাদ তাঁহারই শক্তির বিকাশ মাত্র । যদি

বঙ্গ-সাহিত্যে চণ্ডীর এই পদ্যানুবাদ আদৃত হয়—তবে সে প্রশংসা তাঁহারই।

উক্ত মহোদয়ের লিখিত ‘চণ্ডী-মাহাত্ম্য’ নামক চণ্ডীর অতি সুন্দর ও সংক্ষেপ দার্শনিক আলোচনা, এই গ্রন্থের পরিশিষ্ট-ভাগে সন্নিবেশিত হওয়ায়, এই অনুবাদ বিশেষ গৌরবান্বিত হইয়াছে।

অনুবাদ সম্বন্ধে আমার দুই এক কথা বলা প্রয়োজন। মূলের সহিত ঠিক ঐক্য রাখিয়া, সুললিত ছন্দে, সরল মধুর অথচ অবিকল অনুবাদ ষড় সহজ নয়। যাহা হউক, মূলের সহিত ঐক্য রাখিতে বিশেষ দৃষ্টি রাখিয়া, অনুবাদ সুখ-পাঠ্য করিবার যতদূর সাধ্য চেষ্টা করিয়াছি; এবং এই নিমিত্ত চণ্ডীর ত্রয়োদশ মাহাত্ম্য, ত্রয়োদশ প্রকার ভিন্ন ভিন্ন ছন্দে রচনা করিতে বিশেষ আয়াস ভোগ করিয়াছি। মূলের গাভীর্য্য ও মাধুর্য্য অনুবাদে রক্ষা করা আরও দুষ্কর। তবে যদি মূলের লালিত্য এই অনুবাদে কিছুমাত্র রক্ষা করিতে পারিয়া থাকি, যদি এ অনুবাদ কিছুমাত্র সুখ-পাঠ্য ও শ্রুতি-মধুর হইয়া থাকে, তবে আমার শ্রম সার্থক।

যাহা হউক, প্রকৃত অধিকারী না হওয়ায়, ও সংস্কৃত ভাষায় উপযুক্ত অধিকার না থাকায়, এই অনুবাদে যে ত্রুটি হওয়া সম্ভব, আশা করি সফলদয় পাঠকবর্গ তাহা মার্জনা করিবেন।

কোমলগর।

সন ১৩০২ সাল, ১৪ই বৈশাখ।

শ্রীমহেন্দ্র নাথ মিত্র।

দেবীসূক্ত ।

ঋগ্বেদীয় দশম মণ্ডলের ১২৫ সূক্ত ।

“ স চ বৈশ্ব স্তপস্তুপে দেবীসূক্ত পরং ভূপম্ ।”

এই সূক্তের ঋষি—অশ্বপ্ত মহর্ষির “বাক্” নামী কণ্ঠা। উহার দেবতা—
‘ব্রহ্মশক্তি ।’ এই ব্রহ্মশক্তি মহাদেবীই বাক্‌দেবীতে প্রকাশিত হইয়া, তাহার
রূপে এই মহাসূক্তে প্রকাশ করিয়াছিলেন। এই সূক্ত, চণ্ডীর মূল— শক্তিবাদের
মাদি। চণ্ডী-মধ্যেই এই দেবী-সূক্তের উল্লেখ আছে।

—:~:—

আমি বসু-রুদ্র - গণে করি বিচরণ,
বিচরি, আদিত্যে আর বিশ্বদেব-সনে ;
মিত্র ও বরুণে করি আনিই ধারণ,
আমি ধরি অশ্বীনে উদ্ভু-চত্বাশনে ॥ ১ ॥

অগ্নি-নাশি অই নোমে আমি আছি ধরি,
আমি করি ত্বষ্টা-ভগ-পুণ্ড্র-ধারণ ;
হবি-দাতা, সোম-যাজী, দেব-তৃপ্তি-কারী—
যজমান তরে ধরি যজ্ঞ - ফল - ধন ॥ ২ ॥

সবার ঈশ্বরী আমি, ধন-প্রদায়িনী,
আয়ু-জ্ঞান-ময়া আমি, বর্জীয়-প্রবানী ;
বহু-ভাবে স্থিতা, সৰ্ব-ভূতাবিষ্টা আমি,—
এ ন্যপে সৰ্বত্র দেবে করেন ধারণা ॥ ৩ ॥

আমার শক্তিতে করে—যে করে ভক্ষণ,
 কিছা করে প্রাণ-কার্য্য, শ্রবণ, দর্শন ;
 না জানি আমায়—ক্ষয় হয় লোকগণ,
 হে শ্রুত ! সে তত্ত্ব কহি করহ শ্রবণ ॥ ৪ ॥

যে তত্ত্ব সেবিত নরে অমর-নিকরে,
 তাহাই কহিনু এবে আমিই আপনি ;
 রক্ষিতে বাসনা যারে—শ্রেষ্ঠ করি তারে,
 তারে করি—ব্রহ্মা,ঋষি, কিছা তত্ত্বজ্ঞানী ॥৫॥

বিনাশিতে ব্রহ্ম-দেবী হিংস্রক অসুরে,
 আমিই রুদ্রের ধনু করেছি বিস্তার ;
 যুঝি আমি অরি-সনে লোক-রক্ষা-তরে,
 আমিই প্রবিষ্ট স্বর্গ-পৃথিবী-মাঝার ॥ ৬ ॥


সৃজি আমি পিতা-ব্যোমে ব্রহ্ম-শির'পরে,
 সলিলে সাগরে আছে কারণ আমারি ।
 তাহা হতে ব্যাপি বিশ্ব-ভুবন-অন্তরে,
 মায়া দেহে স্বর্গ এই আছি স্পর্শ করি ॥ ৭ ॥


আমিই সৃজন কালে এবিশ্ব-ভুবন—
 ব্যাপি নিজে—বায়ুসম হই প্রবর্তিত ;
 অতিক্রমি মর্ত্য—স্বর্গ করি অতিক্রম,
 ঈদৃশী মহিমা হয়েছিল সমুদ্ভূত ॥ ৮ ॥



চণ্ডীকায় নমস্কার ।

চণ্ডীর বাঙ্গালা পদ্যানুবাদ ।





চণ্ডী ।



প্রথম মাহাত্ম্য ।

চণ্ডীকায় নমস্কার ।

কহিলেন মার্কণ্ডেয়—১

অষ্টম যে মনু সূর্যের তনয়,
সাবর্ণি যাহারে কয়,
কহিব বিস্তারি— শুনহ তাঁহারি
কিরূপে উৎপত্তি হয় । ২

যেইরূপে হন, সূর্যের নন্দন
সাবর্ণি সে মহামতি,—
সুধু মহামারী- প্রভাব-আশ্রয়ে,
মনুস্তর অধিপতি । ৩

পূর্বে স্বারোচিষ- মনুস্তর - কালে,
চৈত্র-বংশ হতে জাত,

স্বরথ নামেতে আছিল নৃপতি
সমগ্র ধরণি - নাথ । ৪

অপত্য সমান পালিতেন প্রজা,
বিশেষ যতন করি ;
পরে বরা'-ভোজী যত শ্লেচ্ছ-পতি,
হইল তাঁহার অরি । ৫

বোর দণ্ডধারী স্বরথের সনে,
সমর তাদের হয় ;
হীন-বল তবু,— বরা'-ভোজীগণ,
করিল রাজারে জয় । ৬

আসিয়া স্বপূরে, রহিলেন পরে
অধিপ রাজ্যে আপন ;
বৈরী বলশালী, সেখানেও আসি,
করে তাঁরে আক্রমণ । ৭

রাজা বলহীন,— ছুঁই বলবান
দুরাত্মা অমাত্য তাঁর,
তাঁরি নিজ পূরে করিলেক পরে
কোষ-বল অধিকার । ৮

হারায় প্রভুত্ব, ভূপতি তখন,
মৃগয়া করি ছলন,

অশ্ব আরোহণে, গহন কাননে,
করিলা একা গমন । ৯

হেরিলা নৃমনি, তথা দ্বিজাগ্রণী
মেধস মুনি আশ্রম ;
মুনি-শিষ্য-শোভী, প্রশান্ত স্বাপদে
পূর্ণ সেই তপোবন । ১০

সে ঋষি-আশ্রমে ঋষি - সন্নিধানে
হয়ে অতি সমাদৃত,
তথা কিছুকাল করি অবস্থান,
ভ্রমিতেন ইতস্ততঃ । ১১
নৃপ সেথা পরে, লাগিলা চিন্তিতে,
মমতা - মোহিত - চিত ;— ১২

“পূর্ব-বংশ মম যে পুরী পালিত,
হল আশা-হীন হায় !
সে সব চরিত্ত যত মম ভৃত্য,
ধর্মতঃ পালে কি তায় ? ১৩

“সদা মদস্রাবী সেই সুপ্রধান
শূর - হস্তীটি আমার,—
না জানি এখন, বৈরী-বশে গিয়া,
কি ভোগ হতেছে তার ! ১৪

“ছিল নিত্য মম অনুচর যারা
 ভোজনে প্রসাদে ধনে,—
 এবে অনুগত, তাহারা নিশ্চয়,
 হয়েছে অশ্র রাজনে। ১৫

“নহে মিতব্যয়ী তাহারা ত কভু,
 সতত করিয়া ষায়—
 দুঃখেতে সঞ্চিত কোষাগার মন,
 করিছে তাহার ক্ষয়।” ১৬

এরূপ সতত, অশ্র আর কত,
 করে চিন্তা সে রাজন ;
 দেখিলা তখন, সেই দ্বিজাশ্রম-
 পাশে—বৈশ্র এক জন। ১৭

জিজ্ঞাসিলা তায়— “কে তুমি—হেথায়
 কিবা হেতু আগমন ?
 কেন শোকাকুল, দুঃখে অশ্র-মন,
 করি তোমা দরশন ?” ১৮

করিয়া শ্রবণ নৃপতি বচন
 হেন প্রীতি-উচ্ছ্বসিত,
 উত্তরিল পরে, বৈশ্র নৃপবরে,
 বিনয়ে হয়ে বিনত। ১৯

উত্তরিলি বৈশ্ব—২০

নামেতে সমাধি, আমি বৈশ্বজাতি,
 ধনী-কুলে হই জাত,
 ধন-লোভে লুক, দারা-সুত ছষ্ট,
 কৈল মোরে নিপীড়িত । ২১

এবে ধনহীন,— দারা - পুত্র - গণ
 হরিয়াজে মম ধন ;
 উপেক্ষিত হয়ে, আয় - বন্ধু-চয়ে,
 হুঃখে আসিয়াছি বন । ২২

হেথা সেই আমি করি অবস্থিতি,
 না জানি কিছু এখন,—
 শুভ কি অশুভ কি প্রবৃত্তি কার
 —দারা - সুত - পরিজন । ২৩

তাদের ভবনে কি আছে এক্ষণে,
 মঙ্গল কি অমঙ্গল ?
 দুর্জন সুজন তারা কে কেমন,
 মম সে সুত সকল ? ২৪

কহিলা নৃপতি—২৫

ধন-লোভে লুক যেই দারা-সুত
 করেছে দূর তোমার.—

তাহাদের প্রতি, কেন তব মন,
স্নেহবদ্ধ হয়ে ধায় ? ২৬

উত্তরীলা বৈশ্ব—২৭

সত্য বটে ইহা— কহিলা আপনি,
আনা পক্ষে যে বচন ;
কি করিব আমি— নারে নিষ্ঠুরতা
বাধিতে আমার মন ! ২৮

হয়ে ধন-লুপ্ত, ত্যজি স্নেহ প্রেম,
যে দারা - স্মৃত - স্বজন,
করে দূর মোরে,— তাহাদেরি তরে,
স্নেহ-বৃত্ত মম মন ! ২৯

বিরূপ স্বজন,— প্রণয় - প্রবণ
মন যে তাদের প্রতি ;
জানিয়াও তবু— না জানি স্বরূপ,
কিবা ইহা, মহামতি ! ৩০

তাদের কারণ, হয়েছি দুঃস্বপ্ন,
বহিছে নিশ্বাস মম ;
কি করিব—সেই প্রীতিহীন - গণে,
মন নহে নিরমম । ৩১

কহিলেন মার্কণ্ডেয়—৩২

তবে, ওহে দ্বিজ ! সে বৈশ্ব সমাধি,
 আর সেই নৃপবর,—
 মিলিয়া উভয়ে, সে মুনি সকাশে
 উপজিলা অতঃপর । ৩৩

বিহিত বিধানে, উভয়ে মুনিরে
 করি যোগ্য - সম্ভাষণ,—
 বসিয়া তখন, বৈশ্ব ও রাজন
 করে এই নিবেদন । ৩৪

কহিলা নৃপতি—৩৫

ইচ্ছি, ভগবন্ ! জিজ্ঞাসিতে আমি,
 কহ তাহা সুনিশ্চয়—
 কেন বিনা নিজ চিত্ত - আয়ত্ত্বতা,
 হৃৎথে মন মগ্ন হয় ! ৩৬

জানিয়াও তবু, অজ্ঞানীর মত,
 হতেছে মমতা মন,—
 রাজ্যে—আর তার নিখিল বিভাগে,
 কি হেতু, মুনি-সত্তম ? ৩৭

ইনিও তাড়িত,— ভৃত্য-ভাৰ্য্যা-স্বতে
 হয়েছেন নিগৃহীত ;—

সংত্যক্ত স্বজনে,— তা'সবার তরে,
কেন তবু স্নেহাশ্রিত ? ৩৮

এই রূপে ইনি, আমিও তেমনি,
মমতা - আকৃষ্ট - মন
সেই বিষয়েতে— দেখি দোষ যাহে,
তাই ছুঃখী ছুইজন। ৩৯

কহ, মহাভাগ ! জনমে কেমনে,
জ্ঞানীরও মোহ এমন ;
বিবেক-বিহীন আমি ছুজনার
এ মূঢ়তা যে কারণ। ৪০

কহিলেন ঋষি—৪১

আছে, মহাভাগ ! সমুদয় জীবে
বিষয় - ধারণা - জ্ঞান ;—
কিন্তু সে বিষয় এইরূপে হয়
ভিন্ন ভিন্ন অনুমান। ৪২

অন্ধ দিবসেতে কভু কোন প্রাণী,
রাত্রি অন্ধ কেবা আর,
দিবস-নিশীথে অন্ধ কোন প্রাণী,
তুলা - দৃষ্টি হয় কার। ৪৩

সত্য বটে জ্ঞানী মানবের জাতি,
 —কিন্তু একা নহে তারা ;
 যেহেতু নিশ্চয় জ্ঞানী সবে হয়
 —পশু-পক্ষী-মৃগ যারা । ৪৪

পক্ষী-মৃগে যাহা -- মানুষ্যেতে তাহা,
 —তুল্য ইহাদের জ্ঞান
 হয় যেইরূপ,— অথ্য বৃদ্ধি-চয়,
 উভয়ে হয় সমান । ৪৫

জ্ঞান আছে তবু, দেখ মোহবশে
 ক্ষুধাতুর পক্ষীগণ,
 শাবক-চঞ্চুতে, মূপ - স্থিত-কণ',
 আদরে করে অর্পণ । ৪৬

এই নরগণ, ওহে নরবর !
 করে অভিলাষ স্নতে,—
 নহে কিসে লোভে— উপকার - আশে,
 —নার কিহে নিরখিতে ? ৪৭

তথাপি তাহারা মমতার ঘোরে
 মোহের গহ্বরে পশে ;
 সংসার-স্থিতির কারণ যে জন,
 —ঠাঁনি মহামায়া বশে । ৪৮

তবে নাহি ইথে বিশ্বয় - কারণ ;
 জগতের পতি হরি,—
 তাঁরি যোগনিদ্রা— এই মহামায়া
 রাখে বিশ্ব মুগ্ধ করি। ৪৯

তিনিই নিশ্চয় দেবী ভগবতী,
 তিনি মহামায়া হন ;
 জানীদের চিত্ত করেন মোহিত,
 বলে করি আকর্ষণ। ৫০

তাঁহতে প্রসব এ বিশ্ব-জগত ;
 সেই মহামায়া ইনি, —
 প্রসন্ন হইলে নরে মুক্তি দিতে,
 হন বরদা - রূপিনী। ৫১

তিনি পরা-বিদ্যা, মুক্তির কারণ,
 তিনি হন সনাতনী ;
 তিনিই সংসারে বন্ধনের হেতু,
 সবার জঁখরী তিনি। ৫২

কহিলা নৃপতি—৫৩

কেবা দেবী সেই ?— মহামায়া যারে,
 কহিলা, দেব, আপনি ?
 কিবা কৰ্ম্ম তাঁর ? কহ, দ্বিজবর !
 কিরূপে উৎপন্ন তিনি ? ৫৪

স্বভাব—স্বরূপ কিবা সে দেবীর,
 কি হতে উদ্ভব তাঁর ?
 ওহে ব্রহ্মবিদ ! এই তত্ত্ব সব,
 করি বাঞ্ছা শুনিবার । ৫৫

কহিলেন ঋষি—৫৬

নিত্যা হন তিনি, জগত - রূপিণী,
 তাঁহে ব্যাপ্ত এই সব ;
 তবু নানা ভাবে, আমার নিকটে,
 শুন তাঁর সমুদ্ভব । ৫৭

দেব-কার্য্য যবে করিতে সাধন,
 হন তিনি আবিভূত,—
 হয়ে নিত্যা তবু, 'উৎপন্ন' বলিয়া,
 হন লোকে অভিহিত । ৫৮

প্রলয়ে জগৎ করি একার্ণব,
 বিষ্ণু প্রেতু ভগবান,
 অনন্ত-শয়নে, ছিলেন যখন
 যোগ - নিদ্রাতে মগন ;—৫৯

বিকট তখন, অসুর দুজন,
 —মধু ও কৈটভ খ্যাত,
 বিষ্ণু-কর্ণ-মলে জন্মি সমুদ্যত
 ব্রহ্মারে করিতে হত । ৬০

বিষ্ণু-নাভি-পদ্মে, থাকি অবস্থিত,
 সেই ব্রহ্মা প্রজাপতি,—
 নিরখি স্মৃশুপ্ত বিষ্ণু জনার্দনে,
 আর দৈত্যে উগ্র অতি,—৬১

হরিরে জাগাতে একাগ্র হৃদয়ে,
 হরি - নেত্র - নিবাসিনী
 সে যোগ-নিদ্রারে, স্তবে তুষ্ট করে,
 স্থিতি-লয়-করী যিনি ;—৬২

যিনি জগদ্ধাত্রী— বিশ্বের ঈশ্বরী,
 যিনি নিরুপমা অতি,
 বিষ্ণু তেজোময়— তাঁরি নিদ্রা যিনি,
 যিনি দেবী ভগবতী। ৬৩

ব্রহ্মা করিলেন স্ততি—৬৪

তুমি মন্ত্র স্বাহা, স্বধা, বষট্কার ;
 তুমি নিত্য স্বর-রূপে ;
 তুমি স্মৃধাময়ী, অক্ষরের মাঝে
 বিরাজ ত্রিমাত্রা-রূপে। ৬৫

অর্দ্ধমাত্রা—নহে পূর্ণ - উচ্চারিত,
 বিরাজ তাহে নিয়ত ;
 তুমিই সে দেবী পরমা জননী,
 গায়ত্রী-রূপেতে স্থিত। ৬৬

তুমিই সকল করহ ধারণ,
 এ বিশ্ব কর সৃজন ;
 তুমি সদা, দেবি ! করহ পালন,
 অস্তিত্বে কর ভক্ষণ । ৬৭

হও সৃষ্টি-কালে সৃষ্টি-রূপা তুমি,
 পালনে স্থিতি-রূপিণী ;
 তুমি, জগন্ময়ি ! অস্তে জগতের
 হও সংহার - কারিণী । ৬৮

তুমি মহামায়া, হও মহাবিদ্যা,
 মহামেধা, মহাস্বৃতি ;
 হও মহামোহ, দেব - অসুরের
 তুমি সমষ্টি - শক্তি । ৬৯

হও সবাকার তুমিই প্রকৃতি,
 —ত্রিগুণ-বিকাশ-কারী ;
 তুমি কালরাত্রি, মহারাত্রি তুমি,
 —দারুণ মোহ - শরীরী । ৭০

তুমি—শ্রী, ঈশ্বরী, তুমি মা স্মৃতি,
 বুদ্ধি—জ্ঞান-বিকাশিনী ;
 তুমি—লজ্জা, তুষ্টি, পোষণ - শক্তি,
 ক্ষান্তি-শান্তি-প্রদায়িনী । ৭১

তুমি গো মা খড়্গে, গদা - শূল - চক্রে,
 ধর শক্তি ভয়ঙ্করা ;
 শঙ্খ - চাপ - শরে, ভূষণী - পরিষে,
 শস্ত্র-রূপী শক্তি ঘোরা । ৭২

সৌম্য-রূপা তুমি, অতি শোভামরী,
 সৌন্দর্য্যে অতি সুন্দরী ;
 শ্রেষ্ঠ হতে শ্রেষ্ঠা— শ্রেষ্ঠতমা তুমি,
 তুমি মা পরমেশ্বরী । ৭৩

বিশ্ব-আত্মা তুমি,— বস্তু সদসত
 যাহা কিছু আছে সব,
 সেই সবাকার শক্তি তুমি হও,
 —কি আর করিব স্তব ! ৭৪

যিনি বিশ্ব - স্রষ্টা, বিশ্বের বিধাতা,
 যা'হতে বিশ্ব - সংহার,
 রেখেছ তাঁরেও তুমি নিদ্রা বশে ;
 —কে পারে স্তব তোমার ! ৭৫

করি তোমা হতে শরীর গ্রহণ,
 আমি, বিষ্ণু আর ভব ;
 তবে কেবা আছে, হেন শক্তিমান,
 করিবে তোমার স্তব ? ৭৬

সে তুমি এ স্তবে, দেবি ! তুষ্টা হয়ে,
 বিশাল প্রভাব - বলে,
 মধু ও কৈটভ, ছরস্তু অস্ত্রে,
 কর মুগ্ধ মায়া-জালে । ৭৭

জগতের স্বামী অচ্যুতে অচিরে
 কর মাগো জাগরিত ;
 এ ছই অস্ত্রে, করিতে নিহত,
 কর তাঁরে প্রবোধিত । ৭৮

কহিলেন ঋষি—৭৯

মধু ও কৈটভ করিতে নিধন,
 —জাগাইতে নারায়ণ,
 হেনমতে বিধি করিলে এ স্ততি,
 তামসী দেবী তখন—৮০

হ্রির নয়ন হৃদয় - আনন
 বাহু - বক্ষ - নাসা হতে—
 হয়ে আবিভূত, রহিলা—অযোনি-
 ব্রহ্মার দর্শন - পথে । ৮১

উষ্ঠি একার্ণব শেষ-শয্যা হতে,
 নিদ্রা - মুক্ত জনাৰ্দন—

জগতের নাথ, দেখিলা তখন
সে অসুর হইজন ;—৮২

মধু ও কৈটভ, হৃষ্টমতি অতি
পরাক্রান্ত বীর্ষ্যবান,
গ্রাসিতে ব্রহ্মারে হয়েছে উদ্যত,
—ক্রোধে আরক্ত নয়ন । ৮৩

উঠিয়া তখন বিষ্ণু ভগবান্,
সুধু বাহ - প্রহরণে,
ব্যাপি কাল পঞ্চ- সহস্র - বৎসর,
যুঝিলা তাদের সনে । ৮৪

তারাও উন্নত বলে অতিশয়,
মহামায়া - মুগ্ধ - মন,
কহিল কেশবে— “মোদের নিকটে
করহ বর গ্রহণ” । ৮৫

কহিলেন ভগবান্—৮৬

মোরে তুষ্ট যদি, হও বধ্য মোর
তোমরা আজি হজন ;
এই বর মম,— রণে অস্ত্র বরে
কিবা আর প্রয়োজন ? ৮৭

কহিলেন ঋষি—৮৮

তাহারা তখন করি দরশন
জলে বিশ্ব নিমজ্জিত,
হরি ভগবানে কমল - লোচনে,
কহিল হয়ে বঞ্চিত ;—৮৯

“(প্রীত রণে তব ;— কর যদি বধ,
হইব গোরব - যুত ;)
বিনাশ মোদের সেথায় — যেখান
সলিলে নহে প্লাবিত ।” ৯০

কহিলেন ঋষি—৯১

“তাই হবে” তবে বলি ভগবান,
—শঙ্খ - চক্র - গদাধারী,
ছেদিলেন চক্রে মস্তক তাদের,
রাখি নিজ জাম্বু’পরি । ৯২

বিধাতার স্তবে, দেবী এইরূপে,
আপনি উদ্ভব হন ;
সে দেবীর পুনঃ কহিব প্রভাব,
করহ তুমি শ্রবণ । ৯৩



দ্বিতীয় মাহাত্ম্য ।

চণ্ডিকায় নমস্কার ।

কহিলেন ঋষি—১

পুরাকালে পূর্ণ বর্ষ শত,
মহাযুদ্ধ হয় দেবাসুরে ;
মহিষ - অসুর - অধীশ্বর
সহ সুররাজ পুরন্দরে । ২

সে রণে অসুর বীর্যবান,
পরাজয় করে দেব-বল ;
হল ইন্দ্র মহিষ - অসুর—
জিনি সব অমরের দল । ৩

অগ্রে করি ব্রহ্মা প্রজাপতি,
তবে পরাজিত দেবগণ,
করিল গমন সেই স্থানে—
যেথা হর - গরুড়বাহন । ৪

অমরের মহা পরাভব,
মহিষ - অসুর - আচরণ—

যেইরূপ বাথানি সকল,
কহিলা তাঁদের দেবগণ । ৫

সূর্য্য, চন্দ্র, যম, পুত্রন্দর,
বরুণ, পবন, ছত্ৰাশন,
আর সব দেব-অধিকার,
সে অসুর করেছে গ্রহণ । ৬

সে ছুরায়া মহিষের বলে;
স্বর্গ-চ্যুত হয়ে দেবগণ,
যত সব মর্ত্যবাসী সম,
ভূমণ্ডলে করে বিচরণ । ৭

কহিলু এ তোমা হুজনায়ে—
সুর - অরি - কার্য্য সমুদায় ;
মোরা তব লইলু শরণ,
কর চিন্তা তার বধোপায় । ৮

অমরের বাক্য এইরূপ,
শুনি শম্ভু - শ্রীমধুসূদন,
হইলেন অতি ক্রোধান্বিত,
—ক্রকুটিতে কুটিল বদন । ৯

অতঃপর পূর্ণ মহাকোপে,
চক্রধর - ব্রহ্মা - ধ্বজটির

বদন-মণ্ডল হতে তবে,
মহাতেজ হইল বাহির। ১০

ইন্দ্র আদি অগ্নি দেবতার
দেহ হতে হইয়া নিঃসৃত—
দীপ্ত তেজ-পুঞ্জ স্মমহান্,
তা' সহিত হইল মিলিত। ১১

তখন বিশাল তেজ-রাশি—
করি দীপ্তি-ব্যাপ্ত-দিগন্তর,
প্রজ্জ্বলিত পর্কতের প্রায়—
নিরখিল অমর নিকর। ১২

তবে সর্ক-দেব-দেহ - জাত,
সেই তেজ-পুঞ্জ নিরুপম
মিলি—পরিণত নারী-রূপে,
—রূপালোকে ব্যাপি ত্রিভুবন। ১৩

হতে শক্তি শস্ত্র-সমুদ্ভূত
হল তাঁর বদন-বিকাশ;
বিষ্ণু-তেজে হল বাহু-চয়,
যম-তেজে জন্মে কেশ-পাশ। ১৪

ইন্দ্র-তেজে হল মধ্যভাগ,
চন্দ্রমায় চারু যুগ্ম-স্তন;

বরুণের তেজে জাম্বু-উক,
পৃথ্বী হতে নিতম্ব-গঠন । ১৫

ব্রহ্মা-তেজে চরণ - যুগল,
পদাঙ্গুলি হল প্রভাকরে ;
করাঙ্গুলি বসুগণ হতে,
নাসিকার বিকাশ কুবেরে । ১৬

প্রজাপতি-তেজের প্রভাবে
হল তাঁর দশন - গঠন,
হৃতাশন - তেজেতে তাঁহার
বিকাশিত হল ত্রিনয়ন । ১৭

ক্র-যুগ ভাঙিল সক্ষা-তেজে,
পবনেতে শ্রবণ - বিকাশ ;
অস্থ আর সুর-শক্তি হতে
হল দেবী 'শিবার' প্রকাশ । ১৮

সর্ক - দেব - শক্তি - সমুদ্ভূত
সে দেবীরে নিরখি তখন,—
মহিষ - অসুর - নিপীড়িত
সুরগণ হল ছষ্ট-মন । ১৯

সৃজি শূল ত্রিশূল হইতে,
দিলে তাঁরে পিনাকী শঙ্কর ;

সৃষ্টি চক্র নিজ চক্র হতে,
অর্পিলেন বিষ্ণু চক্রধর। ২০

দিলা শঙ্খ বরুণ তাঁহারে,
শক্তি দিলা তাঁরে ছত্ৰাশন,
শর-পূর্ণ তৃণীর সহিত
শরাসন দিলেন পবন। ২১

সৃষ্টি বজ্র কুলিশ হইতে,
সুর-পতি সহস্রলোচন—
লয়ে ঘণ্টা ঐরাবত হতে,
করিলেন তাঁহারে অর্পণ। ২২

সৃষ্টি দণ্ড কাল-দণ্ড হতে
দিলা যম, পাশ—জলপতি ;
কমণ্ডলু অক্ষমালা সহ
দিলা তাঁরে ব্রহ্মা প্রজাপতি। ২৩

সমুদয় রোমকূপে তাঁর,
রবি দিলা নিজ কর-জাল ;
থড়া আর চর্ম্ম সমুজ্জল
করিল অর্পণ তাঁরে কাল। ২৪

ক্ষীর-সিন্ধু দিলা নিত্যবাস,
দিলা হার অতি নিরমল,

রতন - মুকুট মনোহর,
আর দিলা বলয়-কুণ্ডল ; ২৫

দিইলা কেয়ূর সর্ক ভূজে,
অর্দ্ধচন্দ্র শুভ্র আভাময়,
নূপুর - যুগল স্নবিমল,
কণ্ঠভূষা শ্রেষ্ঠ অতিশয় ;
দিলা আর অঙ্গুলি-নিকরে
অঙ্গুরী - নিচয় রত্ন-ময় । ২৬

বিশ্বকর্মা অর্পিলা তাঁহারে
পরশু নির্মল অতিশয়,
নানারূপ কতবা আয়ুধ
সহ আর কবচ অক্ষয় । ২৭

অর্পিলেন জলনিধি তাঁরে,
শিরে আর উরসে তাঁহার—
শোভাময় শতদল আর
চির-দুল্ল কমলের হার । ২৮

হিমবান্ দিলা রত্ন কত,
আর দিলা কেশরী বাহন ;
ধনাধিপ সুরায় পূরিত
পান-পত্র করিলা অর্পণ । ২৯

আর সৰ্ব্ব-নাগেশ্বর শেষ—

যিনি ধরা করেন ধারণ,
বিভূষিত নানা মহামণি
নাগ-হার করিলা অর্পণ। ৩০

এইরূপে অশ্রু দেব-দলে

সম্মানিত অশ্রু - আভরণে
হয়ে দেবী—উচ্চে অট্টহাসি,
মুহুমুহু নাদিলা সঘনে। ৩১

তাঁর সে নিনাদ ভয়ঙ্কর—

অসীম গভীর স্মমহান্,
করি পূর্ণ সৰ্ব্ব নভঃস্থল,
প্রতিধ্বনি সৃজিল ভীষণ। ৩২

তাহে ক্ষুব্ধ হল সৰ্ব্বলোক,

কম্পিত হইল রত্নাকর,
উঠিলা শিহরি বসুন্ধরা,
বিচলিত হইল ভূধর। ৩৩

পুলকে গাহিলা দেবগণ

দেবী সিংহ-বাহিনীর জয়;
ভক্তি-ভরে করি দেহ নত
করে স্তব তাপস-নিচয়। ৩৪

স্তম্ভিত ত্রিলোক সমুদয়!—
 হেরি তাহা দেব-বৈরী-দল,
 ভুলি অস্ত্র হইল প্রস্তুত,
 লইয়া সজ্জিত সৈন্ত-বল । ৩৫

‘আঃ একি এ !!’ কহি রোষভরে
 ধাইল সে মহিষ-সুরারি—
 বেষ্টিত অসুর অগণিত,
 —সেই মহা শব্দ অমুসরি । ৩৬

দেবীরে সে দেখিল তখন,—
 রূপালোকে ব্যাপ্ত ত্রিভুবন,
 পদ-ভরে নত ধরাতল,
 পরশিছে কিরীট গগণ । ৩৭

তীর বোর ধমুর টঙ্কারে
 ত্রাসিত অতল রসাতল,
 প্রসারিত সহস্র করেতে
 আছে ব্যাপ্ত সৰ্ব্ব দিগ্‌মণ্ডল । ৩৮

তখন সে দেব-বৈরী-দলে
 দেবী সহ বাধিল সমর,—
 প্রক্ষিপ্ত বিবিধ প্রহরণে
 প্রদীপ্ত হইল দিগ্‌ম্বর । ৩৯

মহিষ - অশুর - সেনাপতি
 মহাশুর 'চিকুর' আখ্যাত,
 যুদ্ধিল 'চামর' অস্ত্র আর—
 চতুরঙ্গ সেনায় বেষ্টিত । ৪০

লইয়া অযুত ছয় রথ
 মহাশুর 'উদগ্র' আইল,
 সঙ্গৈ রথ সহস্র অযুত
 'মহাহনু' সমরে পশিল । ৪১

যুদ্ধে 'অসিলোম' মহাশুর
 পঞ্চ কোটি লয়ে রথ-বল,
 ছয় লক্ষ রথ লয়ে আর
 করে মহা সমর 'বাস্কল' । ৪২

কোটি রথ—অনেক সহস্র
 অশ্ব আর কুঞ্জর-সংহতি
 সহ—'পরিবারিত' তখন,
 সে সমরে হইলেক ব্রতী । ৪৩

'বিড়ালক্ষ' নামেতে অশুর
 পঞ্চ লক্ষ সেনা লয়ে সাথে,
 বেষ্টিত অযুত রথে আর—
 সে সমরে লাগিল যুদ্ধিতে । ৪৪

পরিবৃত অযুত অযুত
 রথ - অশ্ব - কুঞ্জর - নিকরে—
 অগ্নি সব মহাসুরগণ
 দেবী সহ যুঝিল সমরে । ৪৫

কোটি - কোটি - মহশ্র তখন
 রথ - অশ্ব - মাতঙ্গের দলে,
 হইল সে মহিষ - অসুর
 পরিবৃত সেই রণস্থলে । ৪৬

তোমর মুঘল - ভিন্দিপালে,
 কেহ লয়ে শক্তি-প্রহরণে,
 কেহ অসি - পরশু - পটিশে—
 দেবী মনে যুঝিল সে রণে । ৪৭

নিষ্ফেপিল শক্তি-অস্ত্র কেহ,
 অগ্নি কেহ প্রহারিল পাশ,
 হল তারা উদ্যত দেবীরে
 খজ্জাঘাতে করিতে বিনাশ । ৪৮

সেই দেবী চণ্ডিকা তখন
 নিজ অস্ত্র - শস্ত্র - বরিনগে,
 ছেদিলেন লীলা ছলে যেন
 সেই সব শস্ত্র-প্রহরণে । ৪৯

স্মিতমুখী সে দেবী ঈশ্বরী
 হয়ে স্তম্ভ অম্বর - ঋষিগণে,
 সেই সব অম্বর - শরীরে
 নানা অস্ত্র-শস্ত্র বরিষণে। ৫০

কোপভরে কম্পিত-কেশর
 কেশরী সে দেবীর বাহন,
 বিচরে অম্বর - সেনা-মাঝে,
 —বন-মাঝে যেন হতাশন! ৫১

রণে রণ-রঙ্গিনী অম্বিকা
 যেই শ্বাস করেন মোচন,
 সদ্য শত সহস্র প্রমথ
 পরিণত সে শ্বাস তখন। ৫২

দেবী-বলে বলশালী তারা,
 পরশু - পট্টিশ - ভিন্দিপাল-
 অসি লয়ে লাগিল যুদ্ধিতে,
 —বিনাশিতে অম্বরের দল। ৫৩

সেই মহা সমর - উৎসবে—
 বাজাইল প্রমথ - নিকরে
 লয়ে শঙ্খ, পটহ কেহবা,
 বাদ্য করে মৃদঙ্গ অপরে। ৫৪

অতঃপর শক্তি - বরিষণে,
 খড়্গ-গদা-ত্রিশূল-আঘাতে,
 শত শত মহাসুর - গণে
 দেবী নিজে লাগিলা নাশিতে । ৫৫

বিমুচ্ছিয়া ঘণ্টার নিষোমে
 পাড়িলা কাহারে ভূমিতলে,
 অাকর্মিলা অপর অসুরে
 বন্ধ করি পাশ-অঙ্গ-বলে । ৫৬

খরশান খড়্গের আঘাতে
 কেহবা হইল দ্বিখণ্ডিত ;
 কেহবা দলিত পদাঘাতে
 ভূতলেতে হইল শায়িত । ৫৭

হয়ে অতি আহত মুম্বলে
 করে কেহ রুণির বমন ,
 দীর্ঘ - বক্ষ কেহ শূলাঘাতে
 ভূমিতলে পাতিল শয়ন । ৫৮

সুর - অরি সেনাপতি কত,
 নিরস্তুর শর - বরিষণে,
 হইয়া আচ্ছন্ন অবশেষে
 তাজিল জীবন রণাঙ্গনে । ৫৯

হল ছিন্ন ভুজাবলি কার,
 কার গ্রীবা হইল ছেদিত ;
 হইল পাতিত কার শির,
 কটি কার হল বিদারিত । ৬০

ছিন্ন - উরু কত মহামুর
 ক্ষিতি-তলে হইল পতিত ;
 এক বাহু নেত্র পদ কার,
 দেবী-হস্তে হল দ্বিখণ্ডিত । ৬১

ছিন্ন-শির তথাপি কেহবা,
 পড়ি পুনঃ করয়ে উত্থান ;
 কবন্ধেরা যুঝে দেবী সনে,
 ধরিয়া ভীষণ প্রহরণ ;
 কেহ রণে তুরী-ধ্বনি সনে,
 তাল-নয়ে করিল নর্ভন । ৬২ । ৬৩

ছিন্ন - শির কবন্ধ - নিকর—
 অশ্রু কত মহা সুর-অরি,
 'তিষ্ঠ তিষ্ঠ' কহিল দেবীরে—
 খড়্গা-শক্তি-ঋষ্টি করে ধরি । ৬৪

যেথা হল সেই মহারণ—
 পড়ি সেথা অসুরের দল,

আর পড়ি অশ্ব-গজ-রথ,
—অগম্য করিল মহীতল । ৬৫

সেথায় অশুর-সেনা-মাঝে,
গজ-বাজি-অশুর-শোণিত
সদ্য ছুটি বহিল যে স্রোত,
—মহানদী হল প্রবাহিত । ৬৬

ভূগ-কাষ্ঠ-রাশি ভস্মীভূত
ক্ষণে যথা করে হতাশন,
নিমেষে অশুর-মহাচম্
করিলেন অধিকা নিধন । ৬৭

সে কেশরী কম্পিত-কেশর
মহাঘোর করিয়া গর্জন,
অমর-অরাতি-দেহ হতে
প্রাণ যেন করে বিমোচন । ৬৮

এরূপে প্রমথ দেবী-সেনা
করিল অশুর সনে রণ,
হয়ে তাহে ভূষ্ট দেবগণ
নভে করে পুষ্প বরিষণ । ৬৯



তৃতীয় মাহাত্ম্য ।

চণ্ডীকায় নমস্কার ।



কহিলেন ঋষি — ১

তবে মহাসুর সেনানী 'চিঙ্গুর'
নিহত নেহারি সেনা-নিচয় ,
করিতে সমর অঙ্গিকার সনে
অতি ক্রোধভরে ধাইয়া যায় । ২

দখা বারিধর বারি - বরিষণে
করয়ে প্লাবিত মেরু - শিখর,
তেমতি অসুর করিল সমরে
আচ্ছন্ন দেবীয়ে বরষি শর । ৩

সে দেবী তখন লীলা-ছলে যেন
ছিন্ন করি তার সে শর-জাল,
বাণ - বরিষণে ববিলা সকল
চালকের সহ তুরঙ্গ - দল । ৪

তখনি সে দেবী কাটীলা তাহার
 ধনু আর ধ্বজ অতি মহান,—
 ছিন্ন - শরাসন হইলে অম্বর,
 বিধিলা শরীরে কতই বাণ । ৫

হত - তুরঙ্গম, ছিন্ন - শরাসন,
 হয়ে রথহীন হত - সারথি,
 সে অম্বর তবে খড়্গ-চর্ম্ম ধরি
 হইল ধাবিত দেবীর প্রতি । ৬

অতি তীক্ষ্ণ-ধার কুপাণের ধারে
 কেশরীর শিরে আঘাতি আর,
 দেবী অস্থিকারে— বাম করোপরে
 অতি বেগভরে করে গ্রহার । ৭

লাগি ভুজে সেই, হে নৃপ নন্দন !
 ভাঙ্গিয়া পড়িল কুপাণ - মূল,
 হইয়া ক্রোধেতে অক্রণ - লোচন
 তবে সে গ্রহণ করিল শূল । ৮

দেবী ভদ্রকালি প্রতি সেই শূল
 করিল নিরুপ অম্বর তবে,—
 তেজের প্রভাবে প্রজ্জ্বলিত অতি,
 ভাস্বর মণ্ডল যেরূপ নভে । ৯

নিরখি তখন পড়িছে সে শূল,
 নিক্ষেপিল দেবী শূল আপন ;—
 তাহে সেই শূল সহ সে অসুর,
 শত খণ্ড হয়ে হল পতন । ১০

মহা বীর্যবান মহিষ - সেনানী
 সে সমরে তবে হলে বিনাশ,
 গজ আরোহণে আইল ধাইয়া
 অসুর 'চামর' অমর-ত্রাস । ১১

সেও শক্তি লয়ে করিল নিক্ষেপ,—
 সে দেবী অধিকা হুঙ্কার ছাড়ি,
 দ্রুত প্রতিহত করিলা তাহায়,
 —নিশ্চভ করিয়া ভূমিতে পাড়ি । ১২

নিরখিয়া শক্তি ভগ্ন নিপতিত,
 'চামর' অসুর রোষের ভরে,
 শূল লয়ে তবে করিল নিক্ষেপ,
 —দেবীও তাহারে ছেদিলা শরে । ১৩

উঠি লক্ষ দিয়া কেশরী তখন,
 উঠিল কুঞ্জর - কুস্তুর' পর ;
 সেই অমরের অরাতির সনে,
 বাহ-যুদ্ধে করে যোর সমর । ১৪

যুঝিতে যুঝিতে তাহারা তখন
 পড়ি করী হতে ধরণী'পর,
 অতি নিদারুণ করিয়া প্রহার
 মহা রোষভরে করে সমর । ১৫

মৃগেন্দ্র কেশরী তখন সবেগে
 শূণ্ঠে লক্ষ দিয়া ধরায় পড়ি,
 করি করাঘাত 'চামর' অস্ত্রে
 —মুণ্ড তার তাহে লইল ছিঁড়ি । ১৬

'উদগ্র' অস্ত্রে শিলা-বৃক্ষাঘাতে
 দে দেবী সমরে করি নিহত,
 দন্ত-মুষ্টি-তল- আঘাতে তখন
 'করাল' অস্ত্রে করিলা হত । ১৭

'উদ্ধত' অস্ত্রে গদার প্রহারে
 করি চূর্ণ দেবী ক্রোধের ভরে,
 বিনাশি 'বায়লে' অস্ত্র ভিন্দিপালে,
 'ভান্ন' শু'অন্ধকে' বধিলা শরে । ১৮

'উগ্রবীৰ্য্য' আর 'উগ্রাস্য' অস্ত্র
 আর 'মহাহনু' ত্রিদশ - অরি,
 বধিলা সমরে ত্রিশূল - প্রহারে
 ত্রিনয়নী দেবী পরমেশ্বরী । ১৯

‘বিড়ালের’ শির শরীর হইতে
 পাড়িলা ধরায় অসির ঘায় ;
 করিলা প্রেরণ ‘হুর্কর’ ‘হুম্বুখে’
 শরের প্রহারে শমনালয় । ২০

মহিষ - অসুর হেরিল এক্রপে
 নিজ সেনা ক্রমে হতেছে ক্ষয়,
 ধরি নিজ রূপ মহিষ - আকার—
 প্রমথের দলে দেখা’ল ভয় । ২১

তৃণাবাতে কোন প্রমথে প্রহারে,
 প্রহারে কাহারে খুরের ঘায় ;
 তাড়িত লাস্থুলে করিল কাহারে,
 করে বিদারিত শৃঙ্গে কাহায় । ২২

বেগে পাড়ে কারে, কারে বা হুঙ্কারে,
 মণ্ডল-ভ্রমণে কাহারে ফেলে ;
 কভু বা নিশ্বাস- পবন - প্রভাবে
 পাড়িল কাহারে ধরণী তলে । ২৩

প্রমথ-বাহিনী করিয়া নিপাত,
 দেবীর কেশরী বিনাশ-আশে—
 হইল ধাবিত সে মহা অসুর,
 অম্বিকা অধীরা হইলা রোমে । ২৪

সেও ক্রোধ-ভরে মহা বীৰ্য্যবান
 খুরাঘাতে ধরা করে বিদার,
 শৃঙ্গের তাড়নে উন্নত ভূধর
 করিল নিক্ষেপ—ছাড়ে হুঙ্কার । ২৫

হয়ে বিদারিত বিচরণ - বেগে,
 বিশীর্ণ হইল ধরণী-তল ;
 লাস্কুল-তাড়নে তাড়িত জলধি
 প্লাবিত করিল সকল স্থল । ২৬

হইয়া বিদৌর্ণ শৃঙ্গের কম্পনে
 খণ্ড খণ্ড হল জলদ দল ;
 শ্বাস-প্রভঞ্নে পাড়িল ভূতলে
 শূন্য হতে কত শত অচল । ২৭

নিরখি—একপে সে মহা অসুর
 আসিছে সরোষে উন্মত্ত প্রায়,
 তখন চণ্ডিকা সে দেবী অস্থিকা
 করিলেন ক্রোধ বধিতে তাঁর । ২৮

নিক্ষেপি সে দেবী পাশ-অস্ত্র তাঁরি,
 সে মহা অসুরে বাঁধিলা তায় ;
 সেও বদ্ধ হয়ে সে মহা সমরে,
 ত্যজিল আপন মহিষ-কায় ;—২৯

ধরিল নিমেষে সিংহ-রূপ তবে,—
 মস্তক তাহার দেবী অম্বিকা
 ছেদিল যখন, তখন পুরুষ—
 খড়্গ-পানি এক দিইল দেখা। ৩০

খড়্গ-চর্ম্ম সহ সেই পুরুষেরে,
 হুরায় তখন শর-ক্ষেপণে
 ছেদিলেন দেবী; তখন সে পুনঃ
 হল পরিণত মহা বারণে। ৩১

মহাদিংহে সেই শুণ্ডেতে আপন
 করি আকর্ষণ করে গর্জন,—
 আকর্ষণ-কারী সে শুণ্ড তখন
 খড়্গাঘাতে দেবী করে ছেদন। ৩২

আবার তখন সেই মহাসুর
 করিল ধারণ মহিষ-কায়;
 পূর্ব্বমত পুনঃ করিল ক্ষোভিত
 চরাচর সহ ত্রিলোক তায়। ৩৩

শ্রেষ্ঠ পের পান করিলা তখন
 কুপিতা চণ্ডিকা বিশ্ব-জননী;
 হল অঁাখি তাঁর অরুণ - বরণ,
 —হাসিলেন পুনঃ পুনঃ আপনি। ৩৪

সে অসুর তবে ছাড়িল হুঙ্কার—
 বল-বীৰ্যা-মদে প্রমত্ত অতি ;
 শৃঙ্গ-সঞ্চালনে করিল নিষ্ক্ষেপ
 ভূধর-নিকর চণ্ডিকা প্রতি । ৩৫

অসুর-নিষ্ক্রিপ্ত সে ভূধর দেবী
 করিলা চূর্ণীত শর-নিকরে ;
 মদিরা-আবেশে আরক্ত আনন
 —অক্ষুট বচনে কহিলা তারে । ৩৬

কহিলেন দেবী—৩৭

গর্জ, গর্জ—মৃঢ় ! গর্জ ক্ষণকাল !
 যতক্ষণ করি এ মধু পান ;
 দ্বন্দ্ব হত হলে তুই মোর করে,
 অমনি গর্জ্জবে অমর গণ । ৩৮

কহিলেন ঋষি—৩৯


কহিয়া একরূপ— উল্লসনে দেবী
 করি আরোহণ সে মহাসুরে,
 চরণে চাপিয়া কর্ণদেশ তার
 করিলা তাড়িত শূল-প্রহারে । ৪০

দেবী-পদাক্রান্ত হয়ে সে তখন,
 নিজ মুখ হতে করিল তবে
 অর্দ্ধেক শরীর যেমন বাহির,
 —হইল নিরস্ত দেবী-প্রভাবে। ৪১

অর্দ্ধ-নিঃসারিত হয়ে মহাসুর,
 তবুও হইল সমরে রত ;
 মহা অসি-ঘাতে কাটি শির তার,
 করিলা সে দেবী ভূমে পাতিত। ৪২

মহা হাহাকার করি অতঃপর
 দৈত্য - সৈন্ত সব বিনষ্ট হয়,
 তখন সকল দেবতার দল
 পরম আনন্দ লভিলা তায়। ৪৩

দিব্য মহর্ষির সহ—সে দেবীর
 করিলেন স্তব সুর - নিকর ;
 গন্ধর্ভ - পতির গাছিলা সঙ্গীত,
 নাচিলা মিলিয়া যত অপ্সর। ৪৪



চতুর্থ মাহাত্ম্য ।

চণ্ডিকায় নমস্কার ।



কহিলেন ঋষি - ১

সে ছুরায়া মহাবল দৈত্য হলে হত
দেবী-বলে—সহ সুর - অগ্নি - সেনা যত,
ইন্দ্র আদি দেবগণে, তোমো তাঁরে এ বচনে,
গ্রীবা-অংস করি নত হইয়া প্রণত,—
হরযেতে চারু দেহ পুলক-ক্ষুরিত ! ২

নিজ শক্তি-বলে যিনি ব্যাপ্ত এজগতে,
মূর্ত্তি গাঁর সর্ব-দেব-শক্তি-সমষ্টিতে,
দেবতা মহর্ষি সব, করে গাঁর পূজা স্তব,
নমি ভক্তি-ভরে সেই দেবী অম্বিকায় ;—
করন্ মঙ্গল তিনি মোদের সবায় । ৩

যাঁহার প্রভাব আর বল অনূপম -
ব্রহ্মা হর আর সে অনন্ত ভগবান,
কহু মাহা বর্ণিবারে, নাহিক শক্তি ধরে ;
অশুভ-ভয় নাশিতে--পালিতে জগত্,
যেন সে চণ্ডিকা মতি করেন সতত । ৪

যিনি লক্ষ্মী-রূপা নিজে পুণ্যাত্মা-ভবনে,
 থাকেন অলক্ষ্মী-রূপে পাপাত্মা সদনে,
 বিদ্বান্—সাধু-হৃদয়ে বুদ্ধি—শ্রদ্ধা-রূপা হয়ে,
 নিবসেন লজ্জা-রূপে স্কুলজ - জনে,—
 নমি সে তোমারে, দেবি, পাল' এ ভুবনে । ৫

মোরা কি বর্ণিব তব অচিন্ত্য এ রূপ,—
 অসুর-বিনাশী মহা শক্তি নানা-রূপ !
 কেমনে বা বাখানিব অদ্বিত চরিত তব,
 অসুর - অমর - আদি সবার মাঝারে,
 প্রকাশিলে ষাহা,দেবি, এ ঘোর সমারে ! ৬

সৰ্ব - বিশ্ব - হেতু তুমি ; দোষের কারণ --
 হরি-হর আদি কেহ না জানে কখন !
 অপার, ত্রিগুণাধার, আশ্রয় তুমি সবার ;
 অখিল জগত্ এই তব অংশ - ভূত,
 পরমা প্রকৃতি তুমি আদি অব্যাকৃত । ৭

যে মন্ত্রের যথারীতি হলে উচ্চারণ,
 সৰ্ব-যজ্ঞে তৃপ্তি লভে সৰ্ব সুরগণ,—
 সেই স্বাহা-মন্ত্র তুমি ; হও স্বধা-স্বরূপিণী,—
 যেই মন্ত্রে পরিতৃপ্ত হন পিতৃগণ ;
 তাই লোকে তোমা, দেবি, করে উচ্চারণ । ৮

চিন্তার অতীত যিনি, মুক্তির কারণ,
কঠোর - সাধনা - লভ্যা,—যাঁরে ঋষিগণ
ইন্দ্রিয় সংযম করি সৰ্ব্ব দোষ পরিহার
চিন্তা করে মোক্ষতরে তত্ত্বজ্ঞানে রতি,—
সেই পরা-বিদ্যা তুমি দেবী ভগবতী । ৯

ঋক্ যজু্ সুবিমল, সাম বেদ আর
উচ্চ-গানে মনোহর পদাবলি যার,—
তাদের আশ্রয় তুমি— দেবী বেদ-স্বরূপিণী ;
হও শব্দ-রূপা, বিশ্ব - সস্তাপ - হারিণী,
ভগবতী বিশ্ব-সৃষ্টি-প্রবৃত্তি-রূপিণী । ১০

তুমি মেধা—জ্ঞাত যাহে সৰ্ব্ব-শাস্ত্র-সার ;
তুমি উর্গা—সুহৃগম - ভব - পারাবার
তরিতে তুমি তরণি, অদ্বিতীয়া একা তুমি ;
তুমি লক্ষ্মী—একা বিষ্ণু-হৃদয়-বাসিনী,
তুমি গৌরী—চন্দ্রচূড়-অদি-বিহারিণী । ১১

বদন বিমল কিবা মূঢ়ল - সহাস, ---
পূর্ণ-সুধাকর-শোভা যা'হতে বিকাশ !
সুবর্ণ-লাবণ্য হারে— কিবা মুখ-কাস্তি ধরে !
হেরিয়া কেননে তাহে করিল প্রহার
মহিম-অস্তর রোসে, --- অ ভূত ব্যাপার !! ১২

দেবি! কোপযুত তব ক্রকুটি ভীষণ,
 সদ্যোদিত - শশধর - সদৃশ - বদন,—
 নিরখি তখনি কেন মহিষ না ত্যজে প্রাণ,
 —এষে অতি অদ্ভূত! কেবা শক্তিমান্
 কুপিত কৃতাস্তে হেরি নাহি ত্যজে প্রাণ ? ১৩

হে দেবি! প্রসন্না হও—পরমা আপনি,
 উৎপন্না কল্যাণ-হেতু, রুগ্ণা হলে তুমি
 সদা বংশ কর নাশ,— এবে তাহা সুপ্রকাশ—
 এ মহিষ - অসুরের সুবিপুল বল,
 বিনষ্ট তোমারি কোপে হইল সকল । ১৪

প্রসন্না যাদের প্রতি—তাহারা নিয়ত
 তোমা হতে লভে, দেবি! অভ্যদয় যত ;
 দেশে পূজ্য সেই জন— বৃদ্ধি হয় যশ-ধন,
 ধন্য আদি চতুর্ধর্গ নাহি হয় ক্ষয়,
 তারা ধন্য নিরুদ্দিগ্ন দারা-পুল্ল রয় । ১৫

তোমারি প্রসাদ লভি—স্কৃত যে জন,
 প্রতিদিন শ্রদ্ধাভরে করে আচরণ
 নিত্য ধর্ম-কর্ম-চয়— যাহে স্বর্গে গতি হয় ;
 স্নানিচ্ছয়, দেবি, সেই সে কারণ তুমি,
 এই নিত্য যাকে হও ফল-প্রদায়িনী । ১৬

তুমি, দুর্গে ! দুঃখ-ভয়-দারিদ্র্য-হারিণী,
 স্মরিলে—অশেষ-প্রাণী-ভীতিনিবারিণী ;
 ভয়-হীন স্মরে যদি, দাও অতি শুভ-মতি ;
 সবাকার উপকার করিবার তরে,
 নিত্য-দয়াবতী আর কে আছে অপরে ? ১৭

ইহাদের নাশে সুখ লভিল ভুবন ;
 চির - নরকের হেতু পাপ - আচরণ
 যেন তারা নাহি করে, মরণ লভি সমরে
 করুক প্রয়াণ স্বর্গে,—এ ভাবি নিশ্চয়
 বধিলে অহিত-কারী অরাতি-নিচয় । ১৮

দৃষ্টিমাত্রে তুমি, দেবি ! অম্বরের দলে,
 একেবারে ভস্মীভূত কেন না করিলে ?
 অরি প্রতি অস্ত্র যেই, করিলে নিক্ষেপ এই,
 যাবে বলি দিব্য-লোকে হয়ে শস্ত্র-পূত ;—
 অরি প্রতি হেন মতি অতি সাধু-চিত । ১৯

ভীম-খড়া-বিক্ষুরিত - তেজের প্রভায়,
 কিম্বা শূল - ফলকের দীপ্তির ছটায়,
 অম্বরের অাঁধি যত হল না সে দৃষ্টি-হত,
 সে কেবল নিরখিয়া অতি অমুপম
 তোমার বদন - অংশু ইন্দু - খণ্ড সম । ২০

হে দেবি ! স্বভাব আর মূরতি তোমার—
 ছবৃত্ত - প্রবৃত্তি - হারী, অতীত চিন্তার,
 না আছে তুলনা তার ! তোমার শক্তি আর
 দেব-বল-হারী সবে করিল বিনাশ ;
 কি করুণা অরি প্রতি করিলে প্রকাশ ! ২১

হেন পরাক্রমে তব কি আছে উপমা !
 অরি-ভীতি-দায়ী এই মূর্তি মনোরমা,
 কোথায় বা আছে আর ! বরদে ! দেবি ! তোমার
 অন্তরে করুণা আর নিষ্ঠুরতা রণে,—
 তোমাতেই হেরি স্মধু এ তিন ভুবনে ! ২২

রিপু নাশি রক্ষিলে এ নিখিল ভুবন ;
 আর এ অরাতি-গণে করিয়া নিধন
 সম্মুখ - সমরান্ধনে— পাঠাইলে দিব্য-ধামে ;
 উন্নত অশুর হতে আমাদের(ও) ভয়
 করিলে দূরীত, —তাই প্রণমি তোমায় । ২৩

রক্ষ, রক্ষ—শূলে দেবি ! আমা-কুলে,
 রক্ষ, অশ্বিকে ! রূপাণে আর ;
 ঘণ্টার স্বননে, ধম্মর নিস্বনে,
 করহ রক্ষা আমা সবার । ২৪

রক্ষ, হে চণ্ডিকে ! রক্ষ পূর্ব-দিকে
 —ঘূর্ণিত করি শূল তোমার,
 রক্ষহ পশ্চিমে, রক্ষহ দক্ষিণে,
 রক্ষ, ঈশ্বরী ! উত্তরে আর । ২৫

অতি ভয়ঙ্করী, কভু মনোহারী,
 ত্রিলোকে যেই রূপ বিহরে,—
 তব সেই রূপে— রক্ষ আমা সবে,
 রক্ষহ আর এই সংসারে । ২৬

যে গদা-রূপাণে শূল - গ্রহরণে,
 শোভিত তব কর - পল্লব,
 রক্ষ সর্ব দিকে, হে মাতঃ অস্থিকে !
 সে সব শস্ত্রে মোদের সব । ২৭

কহিলেন ঋষি—২৮

তুমি এই স্তবে, আরাধিলা তবে
 সে জগদ্ধাত্রী দেবতাগণ,
 সম্বৃত নন্দনে মনোজ্ঞ প্রস্থনে
 সহ সুগন্ধ অনুলেপন ; ২৯

দিব্য ধূপ-বাসে সকল ত্রিদশে
 পূজিলে ভক্তি-ভরে তখনি,

কহিল—প্রণত দেবতায় যত,
—প্রসাদ-ফুল-বদনা তিনি । ৩০

কহিলেন দেবী—৩১

বলহ এখন, ওহে দেবগণ !
আমার কাছে কামনা যাহা ;
এ স্তবে পূজিত— হইয়াছি প্রীত,
করিব আমি প্রদান তাহা । ৩২

কহিলেন দেবগণ—৩৩

মোদের এ বৈরী মহিষ সুরারি
করেছ, দেবি ! হত যখন,
সকলি সাধিত করেছ তুমি ত,
—নাহিক কিছু বাকি তখন । ৩৪

তবু যদি বর দাও আমাদের,
তুমি গো দেবি ! হে মহেশ্বরি !
করিও হরণ বিগদ বিষম,
—যখনি মোরা স্মরণ করি । ৩৫

আর যে মানব, গাহি এই স্তব,
তুষিবে তোমা, বিমলাননে !

হৃৎ বৃদ্ধি তার ধন - দারা আর
 সম্পদ, ঋদ্ধি-বিভব সনে ;
 আর মা অধিকে ! তুমি আমাদিগে,
 রহ প্রসন্ন সকল ক্ষণে । ৩৬।৩৭

কহিলেন ঋষি—৩৮

এরূপে ভূষিলে যত দেব-দলে,
 —এ বিশ্ব আর নিজ কারণ ;
 'তাই হৃৎ' বলি, ভবে ভদ্রকালী
 হলেন অন্তর্হিত, রাজন্ ! ৩৯

কহিলু তোমায় সেই সমুদায়,
 —সে পুরাকালে, ওহে নৃমণি !
 দেব-দেহ হতে সম্ভূতা যেমতে
 দেবী—ত্রিলোকহিতকারিণী । ৪০

করিতে নিধন ছুটে দৈত্যগণ,
 আর নিগুপ্ত গুপ্ত দুজন—
 করিতে সাধন লোক - সংরক্ষণ,
 আর দেবতা-হিত - কারণ,—

যেদ্রুপে আবার সম্ভব তাঁহার
 —গৌরী-আকার করি ধারণ,
 কহিব তা' আমি— স্বরূপে বাধানি,
 —আখ্যান সেই কর শ্রবণ । ৪১।৪২



পঞ্চম মাহাত্ম্য ।

চণ্ডিকায় নমস্কার ।



কহিলেন ঋষি—১

পুরাকালে শুভ- নিশুভ অম্বর
বীর্ষ্য-গর্ভ-মদে মাতিয়া,
লইল ইন্দ্রের যজ্ঞ-ভাগ আর
ত্রিলোক-প্রভু হরিয়া । ২

এইরূপে সূর্য্য- চন্দ্র-অধিকার
হরিল অম্বর দুজনে,
করিল আয়ত্ত কুবের-প্রভু হু,
প্রভু হু—বরুণ-শমনে । ৩

করিল আয়ত্ত পবন-প্রভাব,
হরিল অনল - ক্ষমতা,
তবে তিরস্কৃত হইয়া বিজিত
রাজ্য-চ্যুত হল দেবতা । ৪

ত্রিদিব - তাড়িত অধিকার-চ্যুত
 করিলে সে ছই অম্বুরে,
 সৰ্ব্ব সুর-গণ করিলা স্বরণ
 অপরাজিতা সে দেবীরে । ৫

দিয়াছিল তিনি বর আমা সবে—
 “আপদে স্মরিবে যখনি,
 তখনি নাশিব তোমাদের সব
 বিষম বিপদ আপনি ।” ৬

ইহা ভাবি মনে, গেলা দেবগণে
 নগেশ-হিমাদ্রি - শিখরে ;
 অতঃপর সেথা স্তবেতে তুঘিলা
 বিষ্ণু-মায়া সেই দেবীরে । ৭

কহিলেন দেবগণ—৮

নমি—দেবী মহাদেবী,
 শিবা তিনি—প্রণমি সতত ;
 প্রকৃতি, ভদ্রায়—নমি,
 নমি তাঁরে হইয়া সংযত । ৯

নমি রৌদ্রা, নিত্যা তিনি,
 গৌরী, ধাত্রী—নমি বার বার ;

জ্যোৎস্না-সুধাংশু-রূপিনী,
সুখ - রূপা — নমি অনিবার। ১০

প্রণমি—কল্যাণী তিনি,
নমি—বৃদ্ধি - সিদ্ধি - স্বরূপিনী ;
সর্বাণী, অলঙ্কারী তিনি,
রাজলক্ষ্মী — তাঁহায় প্রণমি। ১১

দুর্গা, দুর্গে ত্রাণ - দাত্রী,
তিনি সর্ক - করম - কারিণী ;
কৃষ্ণা, ধূম্রবর্ণা, সারা,
নমি সদা প্রতিষ্ঠা - রূপিনী। ১২

দেবী বিশ্ব-স্থিতি - রূপা,
নমি ক্রিয়া - কলাপ - রূপিনী ;
অতি সৌম্যা, অতি ভীমা,
নমি — নমি—তাঁহায়ে প্রণমি। ১৩

যে দেবীর সর্কভূতে
বিষ্ণুমায়্য খ্যাত এই নাম,
প্রণাম — প্রণাম তাঁরে—
বার বার তাঁহায়ে প্রণাম। ১৪-১৬

যে দেবীর সর্কভূতে
চেতনা - আখ্যায় অধিষ্ঠান,

প্রণাম—প্রণাম তাঁরে—

বার বার তাঁহারে প্রণাম । ১৭-১৯

যেই দেবী সর্ক-ভূতে

অবস্থিতা বুদ্ধি - রূপ ধরি,

নম তাঁরে—নম তাঁরে—

নম — নম — নমস্কার করি । ২০-২২

যেই দেবী নিদ্রা-রূপে

সর্ক - ভূতে করেন বিহার,

নম তাঁরে—নম তাঁরে—

বার বার তাঁরে নমস্কার । ২৩-২৫

যেই দেবী ক্ষুধা-রূপে

সর্ক - ভূতে করেন বসতি,

নম তাঁরে — নম তাঁরে—

বার বার তাঁহারে প্রণতি । ২৬-২৮

যেই দেবী ছায়া-রূপে

স্থিতা সর্ক - ভূতের অন্তরে,

নম তাঁরে— নম তাঁরে—

বার বার নমস্কার তাঁরে । ২৯-৩১

যেই দেবী শক্তি-রূপে

স্থিতা সর্ক - ভূতের অন্তরে,

ନମ ଠାରେ — ନମ ଠାରେ—
 ବାର ବାର ନମସ୍କାର ଠାରେ । ୩୨-୩୫

ସେହି ଦେବୀ ତୃଷ୍ଣା-ରୂପେ
 ହିତା ସର୍ବ - ଭୂତେର ଅନ୍ତରେ,
 ନମ ଠାରେ—ନମ ଠାରେ—
 ବାର ବାର ନମସ୍କାର ଠାରେ । ୩୬-୩୯

ସେହି ଦେବୀ କ୍ଳାନ୍ତି-ରୂପେ
 ହିତା ସର୍ବ - ଭୂତେର ଅନ୍ତରେ,
 ନମ ଠାରେ—ନମ ଠାରେ—
 ବାର ବାର ନମସ୍କାର ଠାରେ । ୪୦-୪୩

ସେହି ଦେବୀ ଜାତି-ରୂପେ
 ହିତା ସର୍ବ - ଭୂତେର ଅନ୍ତରେ,
 ନମ ଠାରେ—ନମ ଠାରେ—
 ବାର ବାର ନମସ୍କାର ଠାରେ । ୪୪-୪୭

ସେହି ଦେବୀ ଲଜ୍ଜା-ରୂପେ
 ହିତା ସର୍ବ - ଭୂତେର ଅନ୍ତରେ,
 ନମ ଠାରେ—ନମ ଠାରେ—
 ବାର ବାର ନମସ୍କାର ଠାରେ । ୪୮-୫୧

ସେହି ଦେବୀ ଶାନ୍ତି-ରୂପେ
 ହିତା ସର୍ବ - ଭୂତେର ଅନ୍ତରେ,

নম তাঁরে—নম তাঁরে—
 বার বার নমস্কার তাঁরে । ৪৭-৪৯

যেই দেবী শ্রদ্ধা-রূপে
 হিতা সর্ব - ভূতের অন্তরে,
 নম তাঁরে—নম তাঁরে—
 বার বার নমস্কার তাঁরে । ৫০-৫২

যেই দেবী কান্তি-রূপে
 হিতা সর্ব - ভূতের অন্তরে,
 নম তাঁরে—নম তাঁরে—
 বার বার নমস্কার তাঁরে । ৫৩-৫৫

যেই দেবী লক্ষ্মী-রূপে
 হিতা সর্ব - ভূতের অন্তরে,
 নম তাঁরে—নম তাঁরে—
 বার বার নমস্কার তাঁরে । ৫৬-৫৮

যেই দেবী বৃষ্টি-রূপে
 হিতা সর্ব - ভূতের অন্তরে,
 নম তাঁরে—নম তাঁরে—
 বার বার নমস্কার তাঁরে । ৫৯-৬১

যেই দেবী স্মৃতি-রূপে
 হিতা সর্ব - ভূতের অন্তরে,

ନମ ଠାରେ—ନମ ଠାରେ—
 ବାର ବାର ନମସ୍କାର ଠାରେ । ୬୨-୬୫

ସେହି ଦେବୀ ଦୟା-ରୂପେ
 ସ୍ଥିତା ସର୍ବ - ଭୂତର ଅସ୍ତରେ,
 ନମ ଠାରେ—ନମ ଠାରେ—
 ବାର ବାର ନମସ୍କାର ଠାରେ । ୬୫-୬୭

ସେହି ଦେବୀ ତୁଷ୍ଟି-ରୂପେ
 ସ୍ଥିତା ସର୍ବ - ଭୂତର ଅସ୍ତରେ,
 ନମ ଠାରେ—ନମ ଠାରେ—
 ବାର ବାର ନମସ୍କାର ଠାରେ । ୬୮-୭୦

ସେହି ଦେବୀ ମାତୃ-ରୂପେ
 ସ୍ଥିତା ସର୍ବ - ଭୂତର ଅସ୍ତରେ,
 ନମ ଠାରେ — ନମ ଠାରେ—
 ବାର ବାର ନମସ୍କାର ଠାରେ । ୭୧-୭୩

ସେହି ଦେବୀ ଭ୍ରାନ୍ତି-ରୂପେ
 ସ୍ଥିତା ସର୍ବ - ଭୂତର ଅସ୍ତରେ,
 ନମ ଠାରେ—ନମ ଠାରେ—
 ନମ — ନମ — ନମସ୍କାର ଠାରେ । ୭୫-୭୬

ଇନ୍ଦ୍ରିୟର ଅଧିଷ୍ଠାତ୍ରୀ,
 ପଞ୍ଚ-ଭୂତେ ଯାର ଅଧିଷ୍ଠାନ,

সৰ্ব-ভূতে ব্যাপ্ত মদা,
দেবী তাঁরে প্রণাম — প্রণাম । ৭৭

চৈতন্য-রূপেতে যিনি
সৰ্ব বিশ্ব ব্যাপি বিদ্যমান,
প্রণাম — প্রণাম তাঁরে—
বার বার তাঁহারে প্রণাম । ৭৮-৮০

ইষ্ট-লাভ তরে, পূৰ্বে তবে যারে
আরাধিতা সুরগণ,
কতদিন আর ইচ্ছা সুরেশ্বর
করিতা যঁর সাধন ;—
আদি শুভঙ্করী সে দেবী কেশরী,
বিনাশি বিপদ-ভার,
করুন্ কল্যাণ, মঙ্গল প্রদান,
এবে আমি সবাকার । ৮১

যাহারে স্মরণে, মোদের সে ক্ষণে,
সৰ্বাপদ হয় হত ;
সম্প্রতি—উদ্ধত দৈত্য-নিপীড়িত
আমরা অমর যত,
সে দেবী কেশায়ে নমি ভক্তি-তরে,
কলেবর করি নত । ৮২

কহিলেন ঋষি—৮৩

ওহে নৃপস্বত ! স্বতি-গানে রত
 একুপে অমর - সংহতি ;—
 তখন স্নানেতে জাহ্নবী - জলেতে
 যেতেছিল দেবী পার্বতী । ৮৪

জিজ্ঞাসিলা দেবে স্ক্রুজ সেই দেবী—
 “কর স্বতি সবে কাহারে ?”
 তাঁর দেহ-কোষ হইতে সম্ভবি,
 দেবী শিবা তবে উত্তরে—৮৫

“দৈত্য-শুস্ত - বলে হয়ে নির্কাসিত,
 —নিগুস্তে বিজিত সমরে,
 হইয়া মিলিত অমর - মণ্ডলী
 করে এই স্তোত্র আমারে ।” ৮৬

সেই পার্বতীর দেহ-কোষ হতে
 অম্বিকা হলেন সম্ভূতা,
 তাই সর্বলোকে ‘কৌষিকী’ আখ্যাতে
 হইলেন তিনি কীর্তিতা । ৮৭

তাঁহার উদ্ভবে— সে দেবী পার্বতী
 হলেন তামস - বরণী ;
 তাই সে ‘কালিকা’ নামেতে আখ্যাতা
 —হলেন হিমাদ্রি - বাসিনী । ৮৮

তবে সে অম্বিকা— অতি মনোহর
 অপরূপ - রূপ - ধারিণী,
 চণ্ড-মুণ্ড—শুভ্র - নিশুভ্র - কিঙ্কর
 —হেরিল তাঁহারে তখনি । ৮৯

বাখানিল তারা শুভ্র দৈত্য-নাথে—
 “রয়েছে কে এক রমনী !!
 উজ্বলি হিমাঙ্গি, ওহে মহারাজ !
 অতীব মানস - মোহিনী ! ৯০

“এমন সুন্দর রূপ মনোহর
 কেহ কভু কোথা দেখিনি !
 কেবা সেই দেবী জানিয়া, দৈত্যেশ !
 করুন গ্রহণ আপনি । ৯১

“দ্বিপ্তি’ দ্বিমুণ্ড লাবণ্য - ছটায়
 স্বী-রত্ন সে চাকু-অঙ্গিনী,
 রহেছে নেহার, ওহে দৈত্যেশ্বর !
 —নেহারিতে যোগ্য আপনি । ৯২

“বেই গজ-বাজি- মণি - রত্ন - রাজি
 আছয়ে এ তিন ভুবনে,
 আছে দীপ্ত এবে সে সকলি, প্রভু !
 তোমার আপন ভবনে । ৯৩

“এনেছ আপনি বাসবে জিনিয়া
 ঐরাবত গজ - রতনে,
 এনেছ তুরঙ্গ - শ্রেষ্ঠ উচ্চৈঃশ্রবা
 —পারিজাত - তরু যতনে । ৯৪

“ছিল বিধাতার অদ্ভুত বিমান
 যোজিত মরাল - বাহনে,
 আনীত হেথায় রথ - রত্ন সেই
 —শোভিছে তোমার অঙ্গনে । ৯৫

“মহাপদ্ম - নিধি ধনেশ হইতে
 যতনে হয়েছে আনীত ;
 কিঞ্জিকিনী - মালা দিয়াছে জলেশ
 অম্লান - পঙ্কজ - গ্রথিত । ৯৬

“কাঞ্চন - নিব্বারী ছত্র বরুণের
 শোভিছে তোমার আলায়ে ;
 শোভিছে তেমতি রথবর — যাহা
 আছিল বিধির আশ্রয়ে । ৯৭

“‘উৎক্রান্তিদা’ নামে যম-শক্তি, প্রভু !
 করেছ হরণ আপনি ;
 রয়েছে তোমার ভ্রাতার করেতে
 জলেশের পাশ তেমনি ;—৯৮

“আর সিদ্ধ-জাত রত্ন নানা-জাতি
 রহেছে নিশ্চিন্ত - সদনে ।
 দিয়াছে অনল তোমা—অগ্নি-পূত
 বিমল যুগল - বসনে । ৯৯

“এরূপে, দৈত্যোজ্জ্ব ! রত্ন - রাজি যত
 করেছ সংগ্রহ আপনি ;
 কেন না গ্রহণ কর তবে এই
 রমনী - রতন কল্যাণী ?” ১০০

কহিলেন ঋষি—১০১

তবে শুভ সেই চণ্ড ও মুণ্ডের
 বচন এরূপ শুনিয়া,
 দেবীর সমীপে পাঠায় স্মৃত্তীবে
 —মহাসুরে দূত করিয়া । ১০২

“গিয়া সেথা তুমি এই বাক্য মম
 এরূপে কহিবে তাহারে,
 যাহে প্রীতি-ভরে আসে সে রমনী
 —করহ তা’ তুমি অচিরে ।” ১০৩

গিয়া সেথা—যেথা দেবী বিরাজিতা
 —শোভিত সে শৈল-প্রদেশে,

কহিন সে দূত তাঁহারে তখন
মুহূল মধুর সম্বোধে। ১০৪

কহিলেক দূত—১০৫

দৈত্য - অধিপতি গুপ্ত—যিনি দেবি !
পরম ঈশ্বর ভুবনে,
প্রেরিত তাঁহার দূত হই আমি
—এসেছি তোমার মদনে। ১০৬

ঋ' হতে বিজিত সুর - বৃন্দ যত,
আজ্ঞা অব্যাহত ষাঁহারি
সতত সকল দেব-যোনি-মাঝে,
—গুন কহি বাক্য তাঁহারি ;—১০৭

“আমারি অখিল এ তিন ভুবন,
মম বশে সুর - মণ্ডলী,
পৃথক্ পৃথক্ যত বজ্র - ভাগ
ভুক্তি আমি সেই সকলি। ১০৮

“মম অধিকারে— শ্রেষ্ঠ - রত্ন-রাশি
যতেক এ তিন ভুবনে,
তথা মম বশে পজ - রত্ন-রাজি ;
আলিয়া ইন্ড্রের বাহনে—

উঠেঃশ্রবা নামে অশ্ব - রত্ন সেই
 —উভূত কীরোদ - মস্থনে,—
 প্রণিপাত করি সমর্পিল মোরে
 যতেক দেবতা যতনে । ১০৯-১১০

“দেবতা - গন্ধর্ষ - নাগ - গণ - বশে
 যা’ কিছু আছিল, স্তন্দরি !
 রত্ন সমঃ সেই শ্রেষ্ঠ দ্রব্য যত
 এবে সে সকলি আমারি । ১১১

“রত্ন - রূপা নারী লোক-মাঝে তুমি,
 হে দেবি ! জেনেছি তোমারে ;
 সেই তুমি তবে করহ আশ্রয়
 রত্ন-ভোগী আমা দৌহারে । ১১২

“ভজ মোরে কিম্বা অনুজে আমার
 —নিগুস্ত বিপুল - বিক্রমী,
 হে চঞ্চলাপাঙ্গি ! রত্ন - স্বরূপিণী
 হও যে তুমি এ রমনী । ১১৩

“পাইবে পরম ঐশ্বর্যা অতুল
 লইলে আশ্রয় আমারি ;
 করহ গ্রহণ পত্নীত্ব আমার
 —বুদ্ধিতে এ কথা বিচারি ।” ১১৪

কহিলেন ঋষি—১১৫

এই বাক্য শেষে— কহিলা গম্ভীরে
 অন্তরে হাসিয়া তখনি,
 ভদ্রা ভগবতী সেই হুর্গা দেবী
 —যিনি এ জগত্ - ধারিণী। ১১৬

কহিলেন দেবী—১১৭

সত্য এই কথা— মিথ্যা নহে কিছু
 যা' কিছু কহিলা আপনি,—
 ত্রিভুবন - পতি হন শুশ্রু সেই
 —নিশুশ্রু ও হন তেমনি। ১১৮

কিস্ত এ বিষয়ে প্রতিজ্ঞা যা' মম,
 মিথ্যা তা' করিব কেমনে ?
 শুন শ্রে প্রতিজ্ঞা— করেছিনু যাহা
 পূর্বে অন্ন - বুদ্ধি - কারণে ;—১১৯

'যে করিবে চূর্ণ বল - দর্প মম,
 —যে মোরে জিনিবে সমরে,
 জগতে যে মোর বলে তুল্যা-বলী,
 —বরিব পতিষে . তাহারে।' ১২০

অতএব স্বরা হেথা মহাসুর
 শুভ ও নিশুভ আসিয়া,
 জিনি মোরে—পাণি করুন গ্রহণ,
 —কি কাজ বিলম্ব করিয়া ? ১২১

কহিলেক দূত—১২২

গর্কিতা আপনি,— হেন বাক্য, দেবি !
 না কহ আমার সমক্ষে ;
 পুরুষ কে আছে— তিষ্ঠে ত্রিভুবনে
 নিশুভ - শুভের সম্মুখে ? ১২৩

রণে দেবগণ অত্র দৈত্যদের(ও)
 সম্মুখে না পারে তিষ্ঠিতে ;
 আপনি ত দেবি ! একাকী—কামিনী—
 কেমনে চাহিছ যুঝিতে ? ১২৪

বাহাদের 'সনে ইন্দ্রাদি - দেবতা
 না পারে তিষ্ঠিতে সমরে,
 কেমনে কামিনী যাবে—শুভ-আদি
 সে সব অসুর-গোচরে ? ১২৫

এ মম বচনে— যাও তুমি তবে
 নিশুভ-শুভের কাছেতে ;
 কেশ - আকর্ষণে— বিনষ্ট - গৌরবে,
 যেন গো না হয় যাইতে । ১২৬

কহিলেন দেবী—১২৭

এইরূপ(ই) বটে শুভ বলশালী
 —নিশ্চয় অতীব বিক্রমী ;
 কি করিব এবে ? করেছি প্রতিজ্ঞা
 আগে না বিচারি আপনি । ১২৮

করহ গমন,— কহগে এ সব,
 —কহিহু যা' আমি সাদরে,
 শুভ দৈত্যনাথে ; বিহিত যা' হবে
 —তিনি তা' করুন্ সত্বরে । ১২৯



ষষ্ঠ মাহাত্ম্য ।

চণ্ডিকায় নমস্কার ।



কহিলেন ঋষি—১

দেবী-বাক্য করিয়া শ্রবণ,
ক্রোধে পূর্ণ সে দূত তখন,
দৈত্যরাজ - পাশে ধেয়ে তবে আসে,
—বিস্তারিয়া কহিল বচন । ২

সে দূতের সে বাক্য শ্রবণে,
অশ্লুর - সম্রাট সেই ক্ষণে,
ক্রোধেতে মগন— কহিল তখন,
দৈত্য-পতি সে ধ্বংসলোচনে । ৩

“স্বরা তুমি, হে ধ্বংসলোচন !
বেষ্টিত হইয়া সৈন্যগণ,
কেশ আকর্ষিয়ে বিহ্বল করিয়ে,
কর ছুটে বলে আনয়ন । ৪

“যদি তারে করিবারে ত্রাণ,
অত্র কেহ করে আগমন,
ই’ক সে গন্ধৰ্ব্ব, কিম্বা দেব - যক্ষ,
করিও তাহারে নিহনন।” ৫

কহিলেন ঋষি—৬

তবে দৈত্য সে ধ্বংসলোচন,
শুভ-আজ্ঞা পাইয়া তখন,
বেষ্টিত অশুরে— যাইট হাজারে,
দ্রুতগতি করিল গমন। ৭

পরে সে নিরখি সে দেবীরে—
অবস্থিত হিমাচল’পরে,
কহিল তাঁহারে, অতি উচ্চৈঃস্বরে,
“যাও শুভ-নিশুভের ঘরে ;—৮

“নাহি যদি যাও প্রীতি-সনে,
তুমি মম প্রভু-সন্নিধানে,
বলেতে এখনি যাব লয়ে আমি,
মুক্ত করি কেশ-আকর্ষণে।” ৯

কহিলেন দেবী—১০

তুমি—দৈত্য-পতির প্রেরিত,
বলশালী, সেনানী-বেষ্টিত,—

এইরূপে বলে মোরে লয়ে গেলে,
কি করিব তাহার বিহিত ? ১১

কহিলেন ঋষি—১২

ইহা শুনি সে ধুম্রলোচন,
দেবী প্রতি করিল ধাবন ;—
যেন হুঙ্কারে, সে অশ্বিকা তারে,
ভয়ভূত করিলা তখন । ১৩

ক্রুদ্ধ দৈত্য-মহা-সেনাগণ,
অশ্বিকায় লক্ষ্মী তখন,
শক্তি - কুঠার তীক্ষ্ণ শর আর
কত তবে করে বরিষণ । ১৪

কোপে কাঁপে কেশর তখন
কেশরীর—দেবীর বাহন,
পশিল সে বলে, দৈত্য-সেনা-দলে,
অতি ভীম করিয়া গর্জন । ১৫

কোন দৈত্যে করের গ্রহারে,
তুণ্ডা-ঘাতে অপর কাহারে,
করিল নিহত, অগ্নি আর কত
মহাম্বরে আক্রমি অধরে । ১৬

করি সিংহ নখের প্রহার,
করে কার উদর বিদার ;
কর - তল - ঘাতে করিল এমতে
কভু শির পৃথক্ কাহার। ১৭

কত অশুরের বাহু-শির,
বিচ্ছিন্ন করিল সিংহ বীর,
কাঁপায়ে কেশর, কাহারো উদর
হতে—পান করিল রুধির। ১৮

মহাবল দেবীর বাহন—
সে কেশরী অতি কোপবান,
নিমেষ-মাঝারে নিঃশেষিত করে
সমুদয় সেই সেনাগণ। ১৯

মহাসুর সে ধুম্রলোচন—
তারে দেবী করেছে নিধন,
সেনা - বল যত দেবী-সিংহ-হত,
—এ বারতা শুনিয়া তখন ;—২০

ক্রোধে শুস্ত দৈত্য-অধীশ্বর,
হল তার ক্ষুরিত অধর,
চণ্ড - মুণ্ডে হুই— মহা-দৈত্যে সেই,
করিলেক আদেশ প্রচার,—২১

“হে চণ্ড ! হে মুণ্ড ! বহু-দৈত্য-
সেনা-বলে হইয়া বেষ্টিত,
ষাও—ষাও তথা ; গিয়া এবে সেথা,
আন তারে হয়ে স্বরাশ্বিত—২২

“কেশে ধরি কিম্বা তারে বাঁধি ;
আনিতে সংশয় থাকে যদি—
ঝিলি দৈত্যগণে, নানা গ্রহরণে,
বধ’ তারে রণেতে আঘাতি । ২৩

“সে ছুটানে করি আঘাতিত,
করি আর সিংহে নিপাতিত,
সেই অস্থিকারে, লয়ে বদ্ধ ক’রে,
আগমন করহ স্বরিত ।” ২৪



সপ্তম মাহাত্ম্য ।

চণ্ডিকায় নমস্কার ।



কহিলেন ঋষি—১

তখন আদেশ পেয়ে, চণ্ড-মুণ্ডে আগে লয়ে
ষত দৈত্যগণ,
উত্তোলিয়া প্রহরণ, সহ চতুরঙ্গ - গণ,
করিল গমন । ২

কাঞ্চন-মণ্ডিত-কায় শৈলেন্দ্র - শিখর-গায়,
হেরিল তখনি
দেবীরে দৈত্য-সংহতি— সিংহ'পরে অবস্থিতি,
—মূঢ়ল-হাসিনী ! ৩

করি তারা দরশন, ধরিতে তাঁরে তখন,
করিল উদ্যম ;
ধনু-অসি আক্ষালিয়ে, যেতে চায় কাছে ধেয়ে,
অত্র সেনাগণ । ৪

সেই সব অরি প্রতি, করিলেন কোপ অতি
অধিকা তখন,
অতিশয় রোষাবেশে, হল মসী-বর্ণ শেষে
ঠাঁহার বদন । ৫

লক্ষুটি কুটিল আর ললাট-ফলক তাঁর
হইতে তখনি,
কৃপাণ-পাশ-ধারিণী, বাহিরিলা কালী যিনি
করাল-বদনী ! ৬

ভূষা—নর-শির-মালা, পরিধান—ব্যাঘ্র-ছালা,
—ভৈরব-রূপিণী !
দেহ—শুক-মাংস-যুত, আয়ুধ—অতি অদ্ভুত
—খট্বাক-ধারিণী । ৭

অতি বিস্মৃত-বদনা, নিমগ্ন - রক্ত - নয়না,
সে দেবী ভীষণা !—
লোল-জিহ্বা বিলম্বিত, অট্টনাদে নিনাদিত
যত দিগাম্বনা ! ৮

পড়ি ধেয়ে বেগতরে, সে দৈত্য-সেনা-মাঝারে,
সে দেবী তখন—
আঘাতিলা মহাসুরে, আর যত দানবেরে
করিলা তক্ষণ । ৯

সহ পার্শ্ব-রক্ষাকারী, নিষাদী, অঙ্কুশ-ধারী,
 সহ ঘণ্টা-সাজে—
 যতেক বারণ-গণে, নিক্ষেপ করে বদনে
 —ধরি নিজ ভুজে। ১০

সহ অশ্ব সাদী যত, এইরূপে আর রথ
 সারথির সনে,
 নিক্ষেপি বদনে সবে, করিল চৰ্চণ তবে
 ভীষণ দশনে। ১১

ধরিলা কাহারে কেশে, কাহারে বা গ্রীবদেশে ;
 করিলা হনন—
 দলিয়া কা'রে চরণে, বক্ষ দিয়া কোন জনে
 করিয়া মর্দন। ১২

অশুর-নিষ্কিপ্ত-শস্ত্র, আর যত মহা অস্ত্র,
 গ্রাসিলা বদনে—
 রুগ্না হয়ে দেবী তবে,— চূর্ণীকৃত করি সবে
 পেঘিয়া দশনে। ১৩

মহাকায় মহাবল সর্ব-সৈন্ত-দৈত্য - বল
 করিলা মর্দন,
 গ্রাসিলা দেবী কাহারে, কভুবা কোন অশুরে
 করিলা তাড়ন। ১৪

খট্টাঙ্গ-তাড়নে কা'রে, কাহারে বা খড়্গ-ধারে,
করিলা নিধন ;
তেমতি বা কত দৈত্য দস্তাগ্রে হয়ে আহত,
লভিল মরণ । ১৫

ক্ষণ-মাঝে সে সকল অম্বরের সেনা - বল
পতিত হেরিয়া,
চণ্ড বেগ-ভরে অতি, সেই ভীমা কালী প্রতি,
আইল ধাইয়া । ১৬

তবে মুণ্ড দৈত্যবর, শর - জাল ভয়ঙ্কর,
করি বরিষণ,—
নিষ্কেপি চক্র হাজারে, ভীষণ - নয়না তাঁরে,
করে আচ্ছাদন । ১৭

সেই সব চক্র-ভার পশিয়া তখন তাঁর
বদন - গহ্বরে,
শোভিত হইল কিবা, যেন কত ভানু-বিভা
মেঘের উদরে ! ১৮

কালিকা ভীম-নাদিনী, করিয়া বিকট ধ্বনি,
হাসে রোষভরে ;—
করাল বদন-মাঝে, হৃদ্বর্শ দশন সাজে,
—উজলিয়া তাঁরে । ১৯

মহাসিংহ আরোহণে, তবে দেবী চণ্ড পানে
 আইলা ধাইয়া,
 কেশ-পাশে ধরি তারে, শির তার অসি-ধারে,
 ফেলিলা ছেদিয়া । ২০

হেরি চণ্ডে নিপাতিত, কালী প্রতি মুণ্ড-দৈত্য
 ধাইল তখন ;
 ক্রোধে দেবী খড়্গ-ধারে, ভূতলে পাড়িলা তারে,
 করিয়া হনন । ২১

চণ্ড-মুণ্ড মহাবলে, নিপাতিত সেই কালে,
 করি দরশন,—
 হত-শেষ সৈন্ত-দল, চৌদিকে ভয়-বিহ্বল,
 করে পলায়ন । ২২

চণ্ড-মুণ্ড-শির লয়ে, চণ্ডিকার কাছে ধেয়ে
 করিয়া গমন,—
 কালিকা তখন তাঁরে, ঘোর অট্ট-হাস্য-ভরে,
 কহিলা বচন ;—২৩

“এই মহাপণ্ডু হই— চণ্ড-মুণ্ডে আমি দিই,
 তোমা উপহার
 এই যুদ্ধ-যজ্ঞ-তরে, নিজে গুপ্ত-নিগুপ্তেরে
 করহ সংহার । ২৪

কহিলেন ঋষি—২৫

তখন নিরশ্বি সেই চণ্ড - মুণ্ড - দৈত্য ছই
 একপে আনীত,
 কল্যাণী চণ্ডিকা তায়, কহিলেন কালিকায়,
 বচন ললিত ;—২৬

“চণ্ড-মুণ্ড-মুণ্ড লয়ে, আমার নিকটে ধেয়ে
 আইলা যখন,
 হে দেবি ! এ ত্রিভুবনে, হবে গো ‘চামুণ্ডা’ নামে,
 খ্যাত এ কারণ।” ২৭

অষ্টম মাহাত্ম্য ।

চণ্ডিকায় নমস্কার ।



কহিলেন ঋষি—১

চণ্ড দৈত্য হত, মুণ্ড নিপাতিত,
বিপুল-অস্তুর-বল-বিনাশে—
শুভ্র দৈত্যপতি, প্রতাপিত অতি,
অধীর অন্তর রোষ-আবেশে,
সমর - কারণ উদ্যোগ তখন
করিতে অস্তুর-সৈন্তে আদেশে ;—২।৩

“সর্ক সৈন্ত লয়ে, অস্ত্র উত্তোলিয়ে,
যাউক্ এখনি দৈত্য ছিয়াশি ;
যাক্ নিজ বলে বেষ্টিত সকলে
—কম্বু-কুল-জাত দৈত্য চুরাশি । ৪

“যাউক্ তথায়, আমার আজ্ঞায়,
ধুম্র-বংশ-জাত শতেক দল ;
কোটিবীর্য - দৈত্য- কুলেতে আখ্যাত,
—যাউক্ পঞ্চাশ অস্তুর-বল । ৫

“কালক-দৌহিত- বংশ-জাত যত,
মোর্ধ্যা-কালকেয় অস্তুর-গণ,
আমার আদেশে, সাজি রণ-বেশে,
করুক সত্বর সবে গমন।” ৬

ভৈরব - শাসন দৈত্যেশ তখন,
এরূপ আদেশ প্রচারি তবে,
অনেক হাজার মহা সেনা-ভাব,
হইয়া বেষ্টিত ধাম আহবে । ৭

চণ্ডিকা তখন, করি দরশন,
আসে দৈত্য-মৈত্র অতি ভীষণ,
কোদণ্ড-টঙ্কারে, পূরিলা সত্বরে,
ধরণী - গগণ - অন্তর - স্থান । ৮

তবে হে রাজন্! কেশরী তখন,
করিল অতীব ভীম গর্জ্জন ;
অধিকা তথনি, করি ঘণ্টা ধ্বনি,
করিলা সে ধ্বনি আরো বর্ধন । ৯

মহা শব্দ করি দিগাকাশ পূরি,
বিস্তৃত-বদনা কালিকা তবে—
ধনুর নিস্বনি, সিংহ-ঘণ্টা-ধ্বনি,
করিলা আচ্ছন্ন ভীম-আরাবে । ১০

দৈত্য-সৈন্তগণ, করিয়া শ্রবণ
 সেই অটুনাৎ—রোষে মগন,
 দেবী কালিকারে আর কেশরীরে
 করিলা চৌদিকে সবে বেষ্টন । ১১

হেন অবসরে, দেব-হিত-তরে,
 করিতে দেবারি-দৈত্য-নিধন,—
 বিষ্ণু-গুহ-ভব- বিরীক্ষি-বাসন,
 —সে সব দেবতা-শক্তিগণ ;
 তাঁদের শরীর হইতে বাহির,
 —সমম্বিত - বীৰ্য্য - বলে তখন,
 নিজ-নিজ-রূপে, চণ্ডিকা সমীপে,
 আইলা ধাইয়া, ওহে রাজন্! ১২।১৩

যে দেবের রূপ হয় যেই রূপ,
 ভূষণ - বাহন যেরূপ যার,
 সে দেব-শক্তি যুক্তিতে অরাতি,
 আইলা ধরিয়া সেরূপ তাঁর । ১৪

কমণ্ডলু করে, অক্ষমালা ধ'রে,
 আইলেন ব্রহ্মা শক্তি যিনি,
 আরোহিয়া রথ মরাল-যোজিত,
 —ব্রহ্মাণী নামেতে আখ্যাতা ইনি । ১৫

বৃষ আরোহণে, আইলা সেখানেে,
 হন মহেশ্বর-শক্তি যিনি,
 মহা-ফণি-বালা অর্ধ - চন্দ্রকলা
 ভূষিত—ত্রিশূল-ঘোর-ধারিণী । ১৬

কুমার-শক্তি— কুমার - আকৃতি
 অম্বিকা ধাইয়া আইলা রণে,—
 যুকিতে অস্তুরে, শক্তি ধরি করে,
 আরোহি সুন্দর শিখি-বাহনে । ১৭

বৈষ্ণবী আখ্যাতি বিষ্ণুর শক্তি,
 করি অধিষ্ঠান গরুড়োপরি,
 আইলা সমরে, শঙ্খ-চক্র - করে,
 গদা ধনু আর কুপাণ ধরি । ১৮

যেই হরি - শক্তি, ধরেছিল মূর্তি
 বরাহ অতুল—বেদের তরে, —
 সে বারাহী-শক্তি, বরাহ - মুরতি
 করিয়া ধারণ ধায় সমরে । ১৯

নারসিংহী খ্যাতি, নৃসিংহ - শক্তি,
 —নৃসিংহ সদৃশ মুরতি ধরি,
 আইলা সে রণে, কেশর - তাড়নে,
 নক্ষত্র-নিকর বিক্ষিপ্ত করি । ২০

অধিষ্ঠান করি, ঐরাবতোপরি,
ইন্দ্র-শক্তি ঐন্দ্রী আইলা তথা,
কুলিশ-ধারিণী, সহস্র - নয়নী,
—রূপে সে শকতি বাসব যুগা। ২১

সেই সমুদয় সুর-শক্তি-চয়,
হইয়া বেষ্টিত ঈশান তবে,
ক'ন চণ্ডিকায়,— সংহার স্বরায়,
মম প্রীতি তরে অসুর সবে। ২২

হইলা বাহির শকতি চণ্ডীর,
দেবীর শরীর হতে অমনি,—
মহা - উগ্রমূর্তি, ভয়ঙ্করী অতি,
শত-শিবা-ধ্বনি বেষ্টিতা তিনি। ২৩

সর্ব-জয় - শীলা চণ্ডিকা কহিলা,
ধূম্র-জটাজুট-ধারী মহেশে,—
“যাও, ভগবন্! দূত হয়ে মম,
শুভ্র ও নিশুভ্র দৈত্য-সকাশে। ২৪

“অতীব দর্পিত, সেই ছই দৈত্য
শুভ্র ও নিশুভ্রে কহিও ভাষে,—
আর যে সকল দানবের দল
সেথা উপস্থিত সমর-আশে ;—২৫

“যদি থাকে মন, বাঁচাতে জীবন,
 পলাও তোমরা পাতালাগার ;
 করনু ভোজন হবি দেব-গণ,
 লভনু বাসব ত্রিলোক-ভার । ২৬

“কিন্তু সবে যদি, বল-দর্পে মাতি,
 রণ-অভিলাষ করহ আর,—
 আইস তা’ হলে ; মম শিবা - দলে,
 তৃপ্ত হ’ক মাংসে তোমা সবার ।” ২৭

এরূপে শঙ্করী, নিজ দূত করি,
 নিয়োজ্বিলা সেই স্বয়ং শঙ্করে ;
 তাই ‘শিবদূতী’ নামেতে আখ্যাতি,
 হইলা তাঁহার এই সংসারে । ২৮

মহা দৈত্যগণ, দেবীর বচন,
 শঙ্কর সমীপে করি শ্রবণ,
 ক্রোধেতে পূরিত, হইলা ধাবিত,
 যেথা কাত্যায়নী ছিল তখন । ২৯

প্রথমে তখন, সুর-অরি-গণ,
 সম্মুখ-সংস্থিতা দেবীর প্রতি,
 করিলা বর্ষণ, যত প্রহরণ,
 শর-শক্তি-অসি রোষেতে অতি । ৩০

সে দেবী শঙ্করী, কোদণ্ড টঙ্কারি,
 ঘোর-শর-জাল করি বর্ষণ,
 সে ক্ষিপ্ত কুঠার- চক্র - শূল - শর,
 করিলেন লীলা-ছলে ছেদন। ৩১

কালিকা তখন, করি বিদারণ
 বৈরীগণে—শূল করি ক্ষেপণ,
 ঋট্টাঙ্গের বলে বিদলি সকলে,
 সম্মুখে দেবীর করে ভ্রমণ। ৩২

কমণ্ডলু - বারি, বরিষণ করি,
 যে-যে-দিকে ধায় ব্রহ্মাণী তবে,
 বল-বীৰ্য্য-হত, তেজ-বিরহিত,
 করিলা অমনি অরাতি সবে। ৩৩

আর মাহেশ্বরী সে ত্রিশূল ধরি,
 ধরিয়া বৈষ্ণবী চক্র আপন,
 শক্তি-অস্ত্র ধরি কোপেতে কৌমারী,
 —করেন নিধন দানব-গণ। ৩৪

নিক্ষেপি অশনি, ঐন্দ্রীও আপনি,
 শত শত সেই দৈত্য-দানবে,
 করে বিদারিত, ভূতলে পাতিত,
 —রুধির-প্রবাহ বহিল তবে। ৩৫

তুণ্ডের প্রহারে বিদগ্ধ কাহারে,
 কা'র করে বক্ষ দস্তাগ্রে ক্ষত,
 চক্রে বিদারিত, ভূমে নিপাতিত,
 করেন বারাহী অশুরে কত । ৩৬

বিদারি নথরে, কত বা অপনে
 গ্রাসে নারসিংহী মহা অশুরে ;
 ঘোরনাদ করি, দিগাকাশ গুরি,
 লাগিলা ভ্রমিতে সেই সময়ে । ৩৭

শিবদূতী রোমে, ঘোর অগ্রহাসে,
 সংহারি অশুরে পাড়ে ভুললে ;
 সে দেবী তখন, করিলা ভঙ্কণ,
 পতিত সে সব অশুর দনে । ৩৮

কুদ্ধ মাতৃগণ, একপে মথন
 করে নানা মতে অশুর দল ;
 তা'দেখি তখন, ঘরে পলায়ন,
 যতেক দানব-সৈনিক-বল । ৩৯

পলায়ন - রত, হয়ে বিমদ্বিত
 মাতৃগণ - করে দানব সখ, --
 হেরি ক্রোধভরে, আইল সময়ে,
 রক্তবীজ নামে মহা দানব । ৪০

দেহ হতে তার, রক্ত-বিন্দু-ধার,
 হইল পতিত ভূমে যেমনি,—
 তাহারি মতন, ধরায় তখন,
 হইল উদ্ভব দৈত্য অমনি । ৪১

করে গদা ধরি, সে মহা সুরারি,
 ইন্দ্র-শক্তি সনে করিল রণ ;
 ঐন্দ্রীও তখন, বজ্রেতে আপন,
 রক্তবীজে রণে করে তাড়ন । ৪২

কুলিশ-আহত তাহার স্বরিত
 হইল বাহির রুধির-ধার—
 তা'হতে উদ্ভূত, হ'ল নোদ্ধা কত,
 —সেরূপ আকৃতি-বল সবার । ৪৩

দেহ হতে তার, রক্ত বিন্দু-ধার,
 যতই তখন হল পতিত,
 তা' সম বিক্রান্ত, বল-বার্ণাবন্ত,
 ততই পুরুষ হইল জাত । ৪৪

শোণিত-সম্ভব পুরুষ সে সব,
 করিল তখন ঘোর মনর—
 সহ নাহু মবে, ভয়ধর-ভাবে,
 নিক্ষেপি ভীষণ শত্রু-নিকর । ৪৫

যবে পুনরায়, অশনির ঘায়
 হল ক্ষত তার শির যেমনি—
 রূপির বহিল,— তা' হতে জন্মিল
 পুরুষ সহস্র কত অমনি । ৪৬

বৈষ্ণবীও তারে, চক্রের প্রহারে,
 করিলা আহত সেই সমরে ;
 ঐক্ৰীও তখন, করিলা তাড়ন,
 ধরি গদা সেই অস্তুরেশ্বরে । ৪৭

চক্রে বৈষ্ণবীর ছিন্ন সে অস্তুর,
 তার রক্ত-শ্রোত হতে তখন,
 তাহার সমান জন্মিল মহান্
 সহস্র অস্তুর ব্যাপি ভুবন । ৪৮

কোনারী আসিয়া শক্তি আঘাতিয়া,
 আঘাতিয়া আসি বারাহী তবে,
 মাহেশ্বরী পরে ত্রিশূল - প্রহারে,
 --আঘাতিলা রক্তবীজ দানবে । ৪৯

সেও মহাস্তুর, রক্তবীজাস্তুর,
 সমুদ্রীপ্ত হয়ে ষোণের ভরে,—
 তবে একে একে, সব মাতৃকাকে,
 করিল আহত গদা-প্রহারে । ৫০

শক্তি-শূল যত অস্ত্রেতে আহত
 সে অসুর হতে ধরণি-গায়—
 যে স্রোত শোণিত হল প্রবাহিত,
 শত শত দৈত্য জন্মিল তায় । ৫১

দৈত্য-রক্ত-জাত, সেই দৈত্য যত,
 করিল বাাপ্ত সর্ব ভুবন ;
 তাহাতে সকল দেবতার দল,
 হল মহাভয়ে ভীত তপন । ৫২

সেই সুর-গণ, বিবাদে মগন-
 হেরিয়া চণ্ডিকা ছরা তখন,—
 কহিলেন পরে সেই কালিকারে.
 “চামুণ্ডে ! বদন কর বাদন । ৫৩

“মন শস্ম-পাত- প্রহার - সঞ্জাত
 রক্ত-বিন্দু-জাত অসুর-গণে—
 রক্ত-বিন্দু সহ, গ্রহণ করহ,
 ছরা বেগভরে তুমি বদনে । ৫৪

“এই রূপে জাত, মহাসুর যত,
 করিয়া ভক্ষণ বিচর রণে,
 এক্রূপে এ দৈত্য, হলে ক্ষীণ-রক্ত,
 লভিবে নিশ্চয় নিধন ক্ষণে :

ভক্ষণে তোমার, নাহি হবে আর
রণে উগ্র অস্ত্র অসুর-গণে ।” ৫৫।৫৬

ঠারে এ বচন কহিয়া তখন,
সেই দৈত্যে দেবী শূলেতে হানে ;
কালীও তখন করিলা গ্রহণ
রক্তবীজ-রক্ত নিজ বদনে । ৫৭

সে দৈত্য গদায়, দেবী চাঁড়কায়,
করিল আঘাত তখন সেথা,—
গদার প্রহারে, সে দেবী-শরীরে,
না হল সঞ্চার কিঞ্চিৎ ব্যথা । ৫৮

কিন্তু সে আহত দৈত্য দেহ-জাত
বিপুল রুধির হ’ল ক্ষরণ,—
যে রুধির ঝরে চামুণ্ডা সত্ত্বরে
করিলা বদনে তাহা গ্রহণ । ৫৯

শোণিত পতনে, সে কালী-আননে,
জ্বলিল যে মহা অসুর-গণ,
চামুণ্ডা সত্ত্বরে, গ্রাসিলা সবানে,
—রুধির তাহার করিলা পান । ৬০

দেবীও তখন,— চামুণ্ডা যখন
রুধির তাহার করিলা পান,—

নাশে রক্তবীজে, শূল-শর-বজ্রে
প্রহারিরা ঋষ্টি আর কুপাণ । ৬১

সেই মহাসুর, রক্তবীজাসুর,
হইরে আহত অস্ত্র-নিকরে,
রক্তহীন হয়ে, যাইল পড়িয়ে,
ওহে মহীপাল ! ধরণি'পরে । ৬২

তখন, রাজন্ ! সেই সুরগণ,
লভিলা অতুল আনন্দ প্রাণে ;
দেব-দেহ-জাত, মাতৃগণ যত,
নাচিলা উন্নত শোণিত-পানে । ৬৩



নবম মাহাত্ম্য ।

চণ্ডিকায় নমস্কার ।



কহিলা নৃপতি—১

এই রক্তবীজ-সংহার-আখ্যানে

ওহে ভগবন্!

দেবীর চরিত্র- মাহাত্ম্য বিচিত্র,

আমায় আপনি করিলা কীর্তন । ২

‘করিল কি কাজ শুস্ত ও নিশুস্ত

অতি ক্রোধান্বিত’--

অভিলাষ মম, শুনিবারে পুনঃ,

‘এবে রক্তবীজ হইলে নিহত ?’ ৩

কহিলেন ঋষি—৪

অতুলিত কোপ করে শুস্ত আর

নিশুস্ত অসুর,—

রণে হলে হত রক্তবীজ দৈত্য,

হলে হত আর অগ্র দৈত্য শূর । ৫

মহাসেনা - বল নিরখি নিহত

ক্রোধেতে মগন—

নিশ্চয় তখন করিল ধাবন,

লইয়া প্রধান দৈত্য-সৈন্ত-গণ। ৬

তাহার পশ্চাতে অগ্রে পার্শ্বদেশে

মহাসুর যত,

দংশি ক্রোধভরে, নিজ গুষ্ঠাধরে,

ধাইল করিতে দেবীকে নিহত। ৭

স্বলে বেষ্টিত শুভ্রও বিক্রান্ত,

মাতৃগণ সনে

সমরে যুকিয়া,— আইল ধাইয়া,

উদ্দীপ্ত ক্রোধেতে চণ্ডিকা-নিধনে। ৮

শুভ্র ও নিশ্চয়ে তবে দেবী সনে

হল যোর রণ,

শর - বরিষণ, অতীব ভীষণ,

—যথা মেঘে-মেঘে বারি-বরিষণ! ৯

অসুর - নিক্ষিপ্ত শর করি ছিন্ন

শায়ক - নিকরে,

চণ্ডিকা বিবিধ, লইয়া আয়ুধ,

আঘাতিলা অঙ্গে দানব-ঈশ্বরে। ১০

ধরি তীক্ষ্ণ খড়্গ চর্ম্ম দীপ্তিময়
 নিশ্চিন্ত তখন,
 দেবীর বাহন— কেশরী - রতন,
 শিরোপরে তার করিল তাড়ন । ১১

প্রহারি বাহনে, খরপ্রে সে দেবী
 ছেঁদিলা হরায়
 নিশ্চিন্ত-রূপাণ শ্রেষ্ঠ খরশান,
 সহ চর্ম্ম অষ্ট - চক্র - ভূষাময় । ১২

ছিন্ন খড়্গ-চর্ম্ম ; নিক্ষেপে তখন
 শক্তি সে অস্বর,—
 সম্মুখে আসিতে, দেবী চক্রাবাতে
 দ্বিখণ্ডে করিলা দৈত্য-শক্তি চূর । ১৩

তবে ধরে শূল নিশ্চিন্ত অস্বর
 —ক্রোধে প্রঙ্কলিত,
 নষ্টির আঘাতে, সে দেবী ভ্রমিতে,
 আগত সে শূল করিলা চূর্ণিত । ১৪

তবে সে অস্বর চণ্ডিকার প্রতি
 করিয়া ঘূর্ণিত—
 গদা নিক্ষেপিলে, দেবীর ত্রিশূলে
 বিদীর্ণ সে গদা হল ভস্মীভূত । ১৫

কুঠার - করেছে সেই দৈত্যবর
 হইলে ধাবিত,
 প্রহারি তাহারে, শায়ক - নিকরে,
 ধরাতলে দেবী করিলা পাতিত। ১৬

ভীম পরাক্রান্ত ভ্রাতা সে নিশ্চয়
 হইলে পতিত,
 গুপ্ত দৈত্যপতি, ক্রুদ্ধ হয়ে অতি,
 অধিকা-নিধনে হইল ধাবিত। ১৭

অতুলিত—অতি উচ্চ অষ্টভুজে
 —দিব্য অঙ্গধারী,
 ব্যাপিয়া তখন অসীম গগণ,
 সে দৈত্য শোভিত ছিল রথোপরি। ১৮

আসিছে সে হেরি, তবে শঙ্ক দেবী
 করিলা বাদন ;
 ধনুকেতে আর ছিলার টঙ্কার
 অতীব হুঃসহ—করিলা তখন। ১৯

করিলেন পূর্ণ নিজ ঘণ্টা-স্বনে
 সর্ব্ব দিগাকাশ ;
 সমস্ত দলুজ- সেনা-বল-তেজ,
 যা'হতে তখন হইল বিনাশ। ২০

তখন কেশরী করি মহানাদ

—করিল পূরিত

পৃথিবী, আকাশ, আর দিক দশ ;

—মাতঙ্গ-মত্ততা যাহে বিদূরিত । ২১

উঠি লক্ষ দিরা করিলা কালিকা

করেতে তাড়িত—

আকাশ-অবনি ; যত পূর্ব-ধ্বনি

—নিনাদে তাঁহার হল তিরোহিত । ২২

অতি অমঙ্গল বোর অট্টহাস

হাসে শিবদূতী,—

সে শব্দে ত্রাসিত হল দৈত্য যত,

—হল মহাকুদ্ধ শুভ্র দৈত্যপতি । ২৩

“তিষ্ঠ—তিষ্ঠ, ছুরায়ন্ !” কহিলেন

আশ্রকা যখনি,

আকাশ-সংস্থিত, সুর-গণ যত,

জয়-জয়-ধ্বনি করিলা তখনি । ২৪

আসি শুভ্র—নিষ্কেপিল যেই শক্তি

দাঁপি ভয়ঙ্কর,—

বহ্নি-পুঞ্জ-ভাতি ধাবিত সে শক্তি,

‘মহোক্ষা’তে দেবী করিলা নিবার । ২৫

হল ব্যাপ্ত তবে শুভ-সিংহনাদে

সৰ্কী চরাচর,—

আচ্ছন্ন সে স্বর হল, ক্ষিতীধর !

তার প্রতিবাত-শব্দে ভয়ঙ্কর । ২৬

ছেদিলেন দেবী নিজ উগ্র শরে

শুভ - মুক্ত - শর --

হাজার-হাজার— শত শত বার ;

ছেদিলও শুভ দেবী-ক্ষিপ্ত-শর । ২৭

তবে সে চণ্ডিকা ক্রুদ্ধা হয়ে শূলে

প্রহারিলা তারে ;

হয়ে প্রহারিত, হইয়া মূচ্ছিত,

পড়িল সে শুভ ভূমিতল'পরে । ২৮

নিশুম্ব তখন নভিয়া চেতন

ধরি শরাসন,

কেশরী-কালীকে, আর সে দেবীকে,

আঘাতিল করি বাণ বরিষণ । ২৯

প্রকাশি অযতভূজ দৈত্যপতি

— শুভ দিতি - সূত,

তবে পুনরায়, দেবী চণ্ডিকায়,

চক্র - প্রহরণে করিল আত্ম । ৩০

তখন হুর্গম - বিপদ - নাশিনী
 হুর্গা ভগবতী,
 মহা রোষ - ভরে স্বশর - নিকরে,
 ছেদিলা সে চক্র শায়ক-সংহতি। ৩১

নিশুস্ত দানব তবে বেগে গদা
 করিয়া গ্রহণ,
 চণ্ডিকা নিধনে, দৈত্য-সেনাগণে
 হইয়া বেষ্টিত ধাইল তখন। ৩২

দৈত্য-নিষ্ফেপিত সে গদা চণ্ডিকা
 স্বরায় তখন,
 ছেদিলা রূপাণে— তীক্ষ্ণ খরশানে;
 সে অস্তর শূল করিল গ্রহণ। ৩৩

আইলে নিশুস্ত অমর - মর্দন
 শূল ধরি করে,
 তার বক্ষঃস্থলে, বেগে ক্ষিপ্ত শূলে
 বিধিলেন তবে চণ্ডিকা সত্তরে। ৩৪

শূল-বিদারিত দৈত্য - হৃদি হতে
 পুরুষ অপর—
 মহা বলে বলী, মহা বীর্যাশালী,
 “তিষ্ঠ তিষ্ঠ” বলি হইল বাহিব। ৩৫

উচ্চ - শব্দময় হাশ্ব করি দেবী

রূপাণে তখন,

নিজ্জান্ত সে বীর পুরুষের শির

ছেদিলা—হল সে ভূতলে পতন । ৩৬

ছিন্ন করি গ্রাবা তীক্ষ্ণ দস্তে তবে

ভঙ্কিল কেশরী

দানব - সংহতি ; কালী-শিবদূতী

গ্রাসিলা এরূপে অপর সুরারি । ৩৭

হয়ে ছিন্ন ভিন্ন কৌমারী-শক্তিতে,

কত মহাসুর

পলাইল দলে ; মস্ত্র-পুত জলে,

করিলা ব্রহ্মাণী অস্ত্র দৈত্যে দূর । ৩৮

পড়ে ছিন্ন হয়ে অসুর অপরে

মাহেশ্বরী-শূলে ;

কেহ বা চূর্ণীত, হইয়া আহত

বারাহীর তুণ্ডে—পড়িল ভূতলে । ৩৯

বৈষ্ণবী-চক্রেতে খণ্ড খণ্ড হল

কত বা অসুর ;

ঐন্দ্রী-হস্ত হতে মুক্ত-বজ্রাঘাতে,

হল দৈত্য কত সেইরূপে চূর । ৪০

কত হত হল—কতবা পলা'ল

মহারণ হতে ;

কালী, শিবদূতী, আর যুগপতি,

করিলা ভক্ষণ অন্ত কত দৈত্যে । ৪১



দশম মাহাত্ম্য ।

চণ্ডিকায় নমস্কার ।



কহিলেন ঋষি—১

ব্রাতা প্রাণ সম নিশুস্ত - নিধন,
—নিধন দম্বজ সেনাগণ,
শুস্ত নিরখিয়ে, মহাক্রুদ্ধ হয়ে,
কহিলেক তবে এ বচন । ২

“কর পরিহার, দুর্গে ! অহঙ্কার,
—দৃষ্টা তুমি বল - অভিমানে ;
লইয়া আশ্রয়, অগ্র শক্তি - চয়,
যুঝিছ যে তুমি অতি মানে !”৩

কহিলেন দেবী—৪

“দ্বিতীয়া অপর, কে আছে আমার ?
 সুধু একা আমি এ জগতে ;
 এ সব শক্তি, আমারি বিভূতি,
 হের, ছুঁ, পশিছে আমাতে !”৫

হইলা বিলয়, সেই সমুদয়
 ব্রহ্মাণী - প্রমুখ দেবী যত—
 সেই দেবী-দেহে ;— একমাত্র তাহে,
 অম্বিকা রহিলা বিরাজিত । ৬

কহিলেন দেবী—৭

“বিভূতি বিস্তারি, বহু - মূর্তি ধরি
 ছিন্ন রণে,—স্থির হও তুমি ;—
 সে রূপ আমার করিয়া সংহার
 রহি রণে—এবে একাকিনী ।”৮

কহিলেন ঋষি—২

সুর-গণ আর অসুর নিকর
 —সকলেতে হেরিল তখন,
 দেবী—শুভ আর, উভয় মাঝার,
 বাধিল কি নিদারুণ রণ ! ১০

শর-বরিষণে, শস্ত্র খরশানে,
 অস্ত্রে আর অতি নিদারুণ,
 তাঁদের মাঝার হইল আবার
 সর্ব - লোক - ভয়ঙ্কর-রণ ! ১১

অধিকা তখন, করিলা ক্ষেপণ,
 শত শত দিব্য-অস্ত্র-জাল ;
 দৈত্যেস্ত্র তাহারি প্রতিরোধ-কারী
 প্রহরণে ভাঙ্গে সে সকল । ১২

সে দৈত্য-নিষ্কিপ্ত যত দিব্য অস্ত্র,
 ভাঙ্গিলেন পরম - ঈশ্বরী—
 লীলা-ছল করি, ভৈরব-হুঙ্কারি,
 —অট্ট - অট্ট - নিনাদ উচ্চারি । ১৩

বর্ষি শত শর, সে মহা অস্তুর,
 আচ্ছাদিল দেবীরে তখন ;
 সে দেবীও তবে, ছেদিলেন কোপে,
 শরজালে তার শরাসন । ১৪

ছিন্ন শরাসন— দৈত্যেস্ত্র তখন
 শক্তি - অস্ত্র করিল গ্রহণ ;
 চক্রেতে আঘাতি, কর-স্থিত শক্তি,
 তবে দেবী করিলা ছেদন । ১৫

তবে লয়ে অসি— ভানু-তেজ-রাশি,
 লয়ে চন্দ্র—শত - চন্দ্র - যুত,
 দৈত্য-অধিপতি, সে দেবীর প্রতি,
 সেই কালে হইল ধাবিত । ১৬

আগত তাহার সেই খড়্গে—আর
 রবি - কর - নির্মল - ফলকে,
 চণ্ডিকা তখনি ছেদিল আপানি,
 ধনুর্শূঙ্ক নিশিত শায়কে । ১৭

তবে অশ্বহীন, সারথি - বিহীন,
 হয়ে শুস্ত ছিন্ন - শরাসন,
 করিল গ্রহণ মুদার ভীষণ,
 করিবারে অশ্বিকা - নিধন । ১৮

ছেদিল তাহার ধাবিত মুদার,
 দেবী তাঁক্ষ বাণ বরধিয়া ;
 তবু দেবা প্রতি, ধায় দৈত্যপতি,
 মহাবেগে মুষ্টি উত্তোলিয়া । ১৯

সে দৈত্য-প্রধান, করিল তখন
 দেবী-হৃদে সে মুষ্টি-পাতন ;
 দেবীও তাহারে, করের প্রহারে,
 বক্ষঃস্থলে করিলা তাড়ন । ২০

দৈত্যরাজ তায়, করতল - ঘায়,
 হইয়া তখন অভিভূত—
 পড়িল ধরণি ; আবার তখনি
 সে দানব হইল উখিত । ২১

দেবীরে ধরিয়া, উর্দ্ধে লক্ষ দিয়া,
 সে অসুর উঠিল গগণে ;
 চণ্ডিকাও তায়— রহি নিরাশয়,
 যুকিলেন তবু তার সনে । ২২

তখন গগণে গুপ্ত-চণ্ডী-সনে,
 প্রথমেতে হল পরস্পর
 বাহু-যুদ্ধ,—যায় সিরু - ঋষি - চয়
 হয়েছিল বিস্মিত অন্তর । ২৩

তবে বাহু-রণে, দৈত্য - গুপ্ত-সনে
 যুকিয়া অস্বিকা বহুক্ষণ,
 তুলি উর্দ্ধোপরি, বিঘূর্ণিত করি,
 ফেলে তারে ভূতলে তখন । ২৪

হইয়া নিষ্কিণ্ড— ছরায়্যা সে দৈত্য
 ধরাতলে হইলে পতিত,—
 করি অভিলাষ চণ্ডিকা-বিনাশ,
 মুষ্টি তুলি হইল ধাবিত । ২৫

দেবী অতঃপরে, সমাগত হেবে
 সেই সর্ক - অসুর - ঈশ্বরে,
 শূল-অস্ত্রে ভেদি, সে দানব-হৃদি,
 —পাড়িলা তাহারে পৃথ্বী'পরে । ২৬

দেবী-শূলে ক্ষত— লভিয়ে পঞ্চস্ব,
 হইল সে ভূতলে পতিত ;—
 সমগ্র এ ধরা, সঙ্গীপা সাগরা,
 সঅচল করি বিচলিত । ২৭


হলে বিনাশিত দুর্মতি সে দৈত্য,
 স্ননির্মল হইল গগণ ;
 হইল প্রসন্ন নিখিল ভুবন,
 —মহা শাস্তি লভিল তখন । ২৮

নিধনে তাহার, যেই বারিধর,
 ছিল উদ্ধা - উৎপাত - শঙ্কিত—
 হল শাস্ত-ভাব ; প্রবাহিনী সব,
 পূর্ক - পথে হল প্রবাহিত । ২৯

শস্ত হলে হত, হর্ষ - পূর্ণ - চিত্ত
 হইলেন সর্ক - সুর - গণ ;

গন্ধৰ্ব - নিকরে, সুললিত স্বরে,
 গাহিলেক সঙ্গীত তখন ;
 নাচিল অপ্সর ; গন্ধৰ্ব্ব অপ্সর,
 মনোহর করিল বাদন । ৩০।৩১

হয়ে অমুকুল বহিল অনিল,
 প্রকাশিল সুপ্রভা তপন,
 করিয়া ধ্বনিত শাস্ত দিক্ যত
 — প্রশান্ত জলিল হতাশন । ৩২



একাদশ মাহাত্ম্য ।

চণ্ডিকায় নমস্কার ।



কহিলেন ঋষি—১

দেবী হতে হলে হত সে মহা অসুর-নাথ,
ইন্দ্রে - লাভে সিদ্ধ-আশ প্রফুল্ল-আনন
ইন্দ্র আদি সুর-গণ, অগ্রে করি হতাশন,
করে স্তুতি কাত্যায়নী দেবীরে তখন । ২

সুপ্রসন্ন হও, দেবি ! নিখিল জগত্ প্রতি,
হে মাতঃ শরণাগত - সন্তাপ - হারিণি !
তুষ্টা হও, বিশ্বেশ্বরী ! রক্ষহ এ বিশ্ব তুমি,
তুমি, দেবি ! চরাচর - ঈশ্বরী আপনি । ৩

ব্রহ্মাণ্ড-আধার - রূপা হও মাগো তুমি একা,
তুমিই যে মহী-রূপে আছ অবস্থিত ;
হে অনন্ত - বীর্যময়ি ! বারি-রূপে করি স্থিতি
তুমিই এ সব লোক কর আপ্যায়িত । ৪

অনন্ত - প্রভাব - ময়া বৈষ্ণবী-শক্তি তুমি,
 হও বিশ্ব - বীজ, পরা - মায়া - স্বরূপিণী—
 মোহিত এ সব যাহে ; হে দেবি ! প্রসন্না হলে,
 হও ভব-ধামে মুক্তি - কারণ আপনি । ৫

সর্ব বিদ্যা হয়, দেবি ! বিভিন্ন রূপ তোমারি,
 তব অংশ-ভূতা হয় ভবে নারী সবে ;
 মাতৃ-রূপে ব্যাপ্ত একা তুমি—হও স্তব্যা-শ্রেষ্ঠা,
 পরা উক্তি আছে কিবা—কি স্ততি সম্ভবে ? ৬

তুমিই যখন সর্ব - স্বরূপিণী,
 করিলে তোমার স্ততি—দেবী তুমি
 হও স্বর্গ আর মুক্তি-প্রদায়িনী ;—
 স্ততি-তরে কিবা আছে মহা বাণী ? ৭

সকল জীবের হৃদয় মাঝারে
 আছ অধিষ্ঠিত বুদ্ধি - রূপে তুমি ;
 তুমিই প্রদান' স্বর্গ-মোক্ষ-ফল,—
 প্রণমি তোমায়—দেবি ! নারায়ণি ! ৮

কলা-কাষ্ঠা-আদি কাল-স্বরূপেতে
 হও পরিণাম - প্রদায়িনী তুমি ;
 তুমি হও শক্তি বিশ্ব-ধ্বংস-কারী,—
 প্রণমি তোমায়—দেবি ! নারায়ণি ! ৯

সৰ্ব - মঙ্গলের মঙ্গল - রূপিণী,
 তুমি হও, শিবে! সৰ্বার্থ-সাধিনী ;
 তুমি ত্রিনয়নী, আশ্রয়-রূপিণী,—
 প্রণমি তোমায়—গৌরি! নারায়ণি! ১০

সৃজন - পালন - বিনাশ - কারণ-
 শক্তি - স্বরূপিণী—তুমি সনাতনী ;
 তুমি গুণময়ী ত্রিগুণ-ধারিণী,—
 প্রণমি তোমায়—দেবি! নারায়ণি! ১১

যে শরণাগত যে দীন-কাতর—
 তুমি মা তাদের ত্রাণ - পরায়ণী ;
 তুমিই সবার তাপ-বিনাশিনী ;—
 প্রণমি তোমায়—দেবি! নারায়ণি! ১২

মরাল - যোজিত - বিমান - চারিণী
 তুমি মা ব্রহ্মাণী - মুরতি - ধারিণী ;
 কুশ হতে পূত বারি-বরষিণী ;—
 প্রণমি তোমায়—দেবি! নারায়ণি! ১৩

তুমি হও মহা - বৃষত - বাহিনী,
 ত্রিশূল - শশাঙ্ক - ভুজঙ্গ - ধারিণী ;
 তুমি মহেশ্বর - শক্তি - স্বরূপিণী,—
 প্রণমি তোমায়—দেবি! নারায়ণি! ১৪

বেষ্টিতা ময়ূর - কুক্কট - নিকরে,
 মনোরমা, মহা - শক্তি - ধারিণী ;
 বিরাজিতা তুমি কোমারী-রূপেতে,—
 প্রণমি তোমায়—দেবি ! নারায়ণি ! ১৫

শঙ্খ - চক্র আর গদা-শারঙ্গাদি
 দিব্য - প্রহরণ - বিভূষিতা তুমি ;
 হও গো প্রসন্না—বৈষ্ণবী-রূপিণি !—
 প্রণমি তোমায়—দেবি ! নারায়ণি ! ১৬

উগ্র-মহা-চক্র তুমি মা ধারিণী,
 দশনে ধরণী - উদ্ধার - কারিণী ;
 তুমি হও, শিবে ! বরাহ-রূপিণী,—
 প্রণমি তোমায়—দেবি ! নারায়ণি ! ১৭

ত্রিভুবন - ত্রাণ করিবারে তুমি
 —বধিতে দানবে উদ্যম - কারিণী—
 ভীমা- নারসিংহী - মুরতি - ধারিণী,
 প্রণমি তোমায়—দেবি ! নারায়ণি ! ১৮

মহা-বজ্র-ধরা, কিরীট-শোভিতা,
 তুমিই প্রদীপ্ত - সহস্র - নয়নী ;
 ব্রহ্ম-প্রাণ-হরা ইন্দ্র-শক্তি তুমি,—
 প্রণমি তোমায়—দেবি ! নারায়ণি ! ১৯

শিবদূতী-রূপে নাশিলে অস্মরে

—তুমি মাগো মহা-শক্তি-শালিনী ;

ঘোর-রূপা তুমি, ভীম-নির্নাদিনী,—

প্রণমি তোমায়—দেবি ! নারায়ণি ! ২০

তুমি সে দশনে ভীষণ - বদনা,

তুমি মা কপাল - মালা - বিভূষণী ;

তুমি মা চামুণ্ডে ! মুণ্ড-বিমথিনী,—

প্রণমি তোমায়—দেবি ! নারায়ণি ! ২১

তুমি লক্ষ্মী, লজ্জা, তুমি মহাবিদ্যা,

শ্রদ্ধা, স্বধা, পুষ্টি, মহারাত্রি তুমি ;

তুমি নিত্য, মহা-অবিদ্যা-রূপিণী,—

প্রণমি তোমায়—দেবি ! নারায়ণি ! ২২

বিভূতি, নিয়তি, তুমি সরস্বতী,

মেধা, শ্রেষ্ঠা তুমি, তামসী, শিবানি ;

হৃৎগো প্রসন্না তুমি মা ঈশ্বরী !—

প্রণমি তোমায়—দেবি ! নারায়ণি ! ২৩

সৰ্ব্ব-স্বরূপিণী, সৰ্ব্ব - শক্তিময়ী,

তুমি হও, দেবি ! ঈশ্বরী সবার ;

ভয় হতে কর আমা সবে ত্রাণ,—

দেবি ! হুর্গে ! তোমা করি নমস্কার । ২৪

মাতঃ! ত্রিনয়ন - বিভূষিত এই
 অতি মনোহর বদন তোমার,
 সর্ষ-ভূত হতে রক্ষুক্ মোদের ;—
 কাত্যায়নি! তোমা করি নমস্কার। ২৫

সর্ষ-দৈত্য-নাশী অতি ভয়ঙ্কর
 ভীম - দীপ্তিময় ত্রিশূল তোমার,
 ভয় হতে মাগো রক্ষুক্ মোদের ;—
 ভদ্রকালি! তোমা করি নমস্কার। ২৬

যে ঘণ্টা-নির্ধোষ ব্যাশিয়া ভুবন
 দৈত্য - কুল - ত্তেঙ্গ করিল হরণ,
 পাপ হতে তাহা রক্ষুক্ মোদের—
 পুত্রে যথা পিতা করয়ে রক্ষণ। ২৭

দৈত্য-রক্ত-মেদ-পঙ্কতে চর্চিত
 কিরণ - প্রদীপ্ত রূপাণ তোমার,
 কক্ষুক্, চণ্ডিকে! মঙ্গল বিধান ;—
 আমরা তোমাতে করি নমস্কার। ২৮

তুষ্ঠা তুমি হও যদি বিনাশ অশেষ ব্যাধি,
 সকল অভীষ্ট - কাম নাশ রুষ্ঠা হয়ে ;
 তোমার আশ্রিত নরে বিপদ কভুনা ধরে,
 আশ্রয় লভয়ে জীব তোমারি আশ্রয়ে। ২৯

নানা-রূপ রূপ ধরি— বহুভাগে ভিন্ন করি,
 দেবি ! আজি নিজ মূর্তি করিয়া গ্রহণ,
 ধর্ম-বৈরী দৈত্যদলে, হে অশ্বিকে ! বিনাশিলে ;
 —অন্তে কেবা পারে তাহা করিতে সাধন ? ৩০

কেবা আছে তোমা বিনা— বিদ্যাতে শাস্ত্রেতে নানা,
 —বিবেক-বিকাশী আদ্য-বাক্য-মাঝে আর ?
 নমস্ব-মোহ-গহ্বরে, কিম্বা মহা অন্ধকারে,
 ঘুরায় বিষম কেবা এ বিশ্ব-সংসার ? ৩১

সেথা সর্প বিষধর, যেথা রাক্ষস - নিকর,
 অরতি-সংহতি যেথা—যেথা দস্যু-দল,
 যেথা ঘোর দাবানল, অথবা জলধি - তল,
 —রহি সেথা রক্ষ তুমি এ বিশ্ব-মণ্ডল । ৩২

বিশ্বেশ্বরী হও তুমি, পালিছ বিশ্ব আপনি,
 তুমি বিশ্বাস্বিকা—বিশ্ব করিছ ধারণ ;
 বিশ্বপতি-বন্দ্যা তুমি, বিশ্বের আশ্রয় - ভূমি
 হয়—তোমা ভক্তি-ভরে বিনত যে জন । ৩৩

মোরা ভীত শত্রু-ভয়ে— রক্ষহ প্রসন্ন হইয়ে,
 —এবে দেবি ! দৈত্যে বধি রক্ষিলে যেমন ;
 মহা উপসর্গ যত— উৎপাত-বাধা-জনিত,
 বিশ্ব-পাপ হারা আর করহ দমন । ৩৪

দেবি ! বিশ্বার্ক্তি-হারিণি ! প্রসন্না হও আপনি
 প্রণত সকলে ;
 ত্রিলোক-বাসী-আরাধ্যা, হও মা তুমি বরদা
 এ লোক-মণ্ডলে । ৩৫

কহিলেন দেবী—৩৬

হে সুর-মণ্ডলি ! আমি— হই বর - প্রদায়িনী ;
 করহ কামনা
 যে বর তোমরা চিতে, দিব তাহা বিশ্ব-হিতে,
 —করহ প্রার্থনা । ৩৭

কহিলেন দ্বেবগণ—৩৮

হে অখিলেশ্বরি ! মাতঃ ! ত্রিলোকের বাধা যত
 —যাহে প্রশমিত,
 যেই কশ্মে হয় হত মোদের অরাতি যত,
 —কর তা' সাধিত । ৩৯

কহিলেন দেবী—৪০

বৈবস্বত মন্বন্তর— অষ্টাবিংশ যুগ তার
 আসিবে যখন,
 অশ্রু মহাস্নর হয়ে— শুভ্র ও নিশুভ্র - দ্বয়ে
 জন্মিবে তখন । ৪১

হইবে কীর্তিত তায়, 'ভীমাদেবী' এ আখ্যায়
মম নাম-খ্যাতি । ৫২

'অরুণাখ্য' দৈত্য যবে ত্রিভুবনে ঘটাইবে
বিঘ্ন ভয়ঙ্কর,
ঘটপদ্ অগণন ভ্রমরা - রূপ ধারণ
করি অতঃপর ;— ৫৩

ত্রিলোক-মঙ্গল-তরে, আমি সে মহা অস্থরে
করিব সংহার ;
'ভ্রামরী' বলিয়া তবে, সদা স্তুতি লোক সবে
করিবে আমার । ৫৪

বিঘ্ন যত দৈত্য হতে উপজিবে হেন মতে
—যথনি যথনি,
সেই কালে অবতরি, করিব সংহার অরি
—তথনি তথনি । ৫৫

দ্বাদশ মাহাত্ম্য ।

চণ্ডিকায় নমস্কার ।



কহিলেন দেবী—১

এই স্তবে তুমিষে আমায়
হয়ে সমাহিত নিত্য যেই জন,
বাধা - বিঘ্ন সকল তাহার
স্বনিশ্চয় আমি করিব হরণ । ২

‘মধু আর কৈটভ’-নিপাত,
আর মহাস্থর ‘মহিষ’-নিধন,
সে রূপ ‘নিশ্চিন্ত - শুশ্রু’-বধ,
যেই নরগণ করিবে কীর্তন ;—৩

অষ্টমী কি তিথি চতুর্দশী
কিঞ্চা নবমীতে যেই নরগণ,
ভক্তি সহ এক - মনে মম
মাহাত্ম্য পরম করিবে শ্রবণ ;—৪

না র'বে তাদের পাপ কিছু—

পাপ-হেতু আর আপদ না র'বে,
না হইবে দরিদ্রতা কভু,
বান্ধব-বিয়োগ কিম্বা নাহি হবে । ৫

বৈরী-ভয় নাহি র'বে তার,

নাহি র'বে ভয় রাজা-দক্ষ্য-হতে,
না রহিবে ভয় কদাচিৎ
সলিল - অনল - আয়ুধ - হইতে । ৬

এই হেতু সদা এক-চিত্তে

করিবে শ্রবণ অথবা পঠন,
এ মোর মাহাত্ম্য ভক্তিভরে,—
যে হেতু ইহাই মহা-স্বস্ত্যয়ন । ৭

উপসর্গ অশেষ - প্রকার—

মহামারী হ'তে যাহা সমুদ্ভূত,
সেইরূপ উৎপাত ত্রিবিধ,—
এ মম মাহাত্ম্যে হয় প্রশমিত । ৮

যে আলায়ে এ মাহাত্ম্য মম

হয় প্রতিদিন সম্যক্ পঠিত,
নাহি আমি ত্যজি সে ভবন,
সেই স্থানে আমি সদা বিরাজিত । ৯

পূজাকালে আর মহোৎসবে,
 কিম্বা অগ্নিকার্যে আর বলিদানে,
 এ সকল মাহাত্ম্য আমার
 উচিত সতত শ্রবণ - পঠনে। ১০

জ্ঞানী কিম্বা জ্ঞানহীন-জনে,
 করয়ে যদ্যপি পূজা - বলিদান—
 কিম্বা যদি করে বহ্নি-হোম,
 আমি করি তাহা প্রীতিতে গ্রহণ। ১১

বর্ষে বর্ষে শরৎ - ঋতুতে
 মহা-পূজা মম করে যেই জন,
 সে পূজায় ভক্তি - সহকারে
 এ মাহাত্ম্য মম করিলে শ্রবণ ;—১২

প্রসাদে আমার নরগণ
 সর্ব - বিঘ্ন - হতে হইবে উদ্ধার—
 হবে ধন - ধাত্ত - পুত্র - যুত,
 নাহিক সংশয় ইথে কিছু আর। ১৩

শুনিলে মাহাত্ম্য এই মম—
 শুভময় মোর জন্ম - বিবরণ,
 আর মোর রণে পরাক্রম,
 —হয় ভয়হীন পুরুষ সে জন। ১৪

শুনে যেই মাহাত্ম্য আমার—
 সে নরের হয় রিপু-কুল-ক্ষয়,
 হয় আর কল্যাণ - সাধন,
 সংবর্দ্ধিত আর বংশ তার হয় । ১৫

সর্বরূপ শান্তি-ক্রিয়া-কালে,
 সেইরূপ আর দুঃস্বপ্ন - দর্শন—
 কিম্বা উগ্র-গ্রহ-ব্যাদি-কালে,
 করিবে আমার মাহাত্ম্য-শ্রবণ ;—১৬

শান্তি হয় উদ্বেগ - নিচয়,
 বায়; ভয়ঙ্কর গ্রহ - পীড়া যত,
 বা দুঃস্বপ্ন দেখে নরগণ—
 স্নস্বপ্নে তাহাই হয় পবিত্রত ; ১৭

বালগ্রহে হলে অভিভূত—
 হয় সে শিশুর শান্তির কারণ,
 শিবের স্নহদ - বিচ্ছেদে—
 করে স্নথকর মিত্রতা - স্থাপন । ১৮

এ মাহাত্ম্য-পাঠে—হয় যত
 দুর্ভক্ত-দলের মহা - বন - ক্ষয়,

হয় ইথে বিনাশ সাধিত

রাক্ষস - পিশাচ - ভূতযোনি - চয় ; ১৯

এ সব মাহাত্ম্য মম পাঠে

পারে সন্নিকটে রাখিতে আমায় । ২০

পশু-পুষ্প-অর্ঘ্য-ধূপে আর

হোমে, ভালরূপে ব্রাহ্মণ-ভোজনে,

অভিষেক দ্রব্যে, গন্ধ-দীপে,

অন্য নানাবিধ ভোগ্য-বস্তু-দানে,—২১

প্রতিদিন বৎসর ধরিয়া

পূজা হেতু মম জন্মে যেই প্রীতি,

একবার এ মহা মাহাত্ম্য

শুনালে আমায়—হয় সেই প্রীতি । ২২

এই মম জনম - কীর্তন

করিলে শ্রবণ—হরে পাপ যত,

রোগে করে আরোগ্য-প্রদান,

ভূত-যোনি হতে করয়ে রক্ষিত । ২৩

দুঃ - দৈত্য - নিধন - ঘটত

রণস্থলে যেই চরিত্র আমার,

করিলে শ্রবণ — মানবের

বৈরী হতে ভয় নাহি থাকে আর । ২৪

যেই স্তব করিলে তোমরা,
 করিলা যে স্তব ব্রহ্মর্ষি-সংহতি,
 যেই স্তব করিলা বিধাতা,
 —সেই সব স্তবে দেয় শুভমতি । ২৫

দম্ব্যদলে বেষ্টিলে প্রাস্তরে,
 অরণ্যে বেষ্টিত হলে দাবানলে,
 অথবা নির্জ্বল শূন্যস্থানে
 হইলে আক্রান্ত অরাতির দলে,—২৬

সিংহ-ব্যাব্র পশ্চাৎ ধাইলে,
 ধাইলে বা বনে বনহস্তী-দলে,
 বধা হলে ক্রুদ্ধ রাজাদেশে,
 অথবা হইলে আবদ্ধ শৃঙ্খলে,—২৭

রহি পোতে মহার্ঘব-মাঝে
 বিঘৃণিত হলে প্রভঞ্জন - বলে,
 কিম্বা কভু অতি নিদারুণ
 সংগ্রাম-সময়ে শস্ত্র-পাত-কালে, ২৮

ঘোরতর সর্ক বিঘ্ন-কালে
 হইলে ব্যথিত বেদনা-পীড়নে,—
 হয় নর বিমুক্ত সঙ্কটে,
 —আমার এ হেন মাহাত্ম্য-স্মরণে । ২৯

মোর এই মাহাত্ম্য-স্মরণে—

সিংহ আদি জন্তু দস্যু-বৈরীগণ,

আমারি এ প্রভাব হইতে

দূরদেশে সবে করে পলায়ন। ৩

কহিলেন ঋষি—৩১

এ বচন কহি ভগবতী

সে চণ্ডিকা চণ্ড-বিক্রম-শালিনী,

দর্শক - দেবতা - সমক্ষেতে

অস্তর্হিতা সেথা হইলা তখনি ! ৩:

নষ্ট - শক্র সেই সুর-গণ

নির্ভয় সকলে হইয়া তখন,

পূর্বমত ভুঞ্জি যজ্ঞ - ভাগ

স্ব-স্ব-অধিকার করিলা গ্রহণ। ৩৫

বিশ্ব - ধ্বংসী অতুল - বিক্রমী

সুরারি সে শুভ্রে অতীব ভীষণ,

আর সে নিশুভ্রে মহাবলী,

দেবী রণস্থলে করিলে নিধন.

রণ - শেষ অসুর - সংহতি

পাতাল - প্রবেশ করিল তখন। ৩৪।৩৫

আর সেই দেবী ভগবতী
 হ'লে(ও) নিত্য তিনি—তবু হে রাজন !
 পুনঃ পুনঃ হয়ে আবিভূত,
 জগত্ - সংসার করেন পালন । ৩৬


মোহিত করেন বিশ্ব তিনি,
 তিনিই করেন এ বিশ্ব প্রসব ;
 দেন তিনি—করিলে প্রার্থনা—
 তুষ্টা হয়ে তদ্ব জ্ঞান ও বৈভব । ৩৭

মহাপ্রলয়ের কালে তিনি
 মহাকালী - রূপা—ওহে নগবর !
 মহামারী - স্বরূপ ধরিয়া
 হন ব্যাপ্ত এই সর্ক - চরাচর । ৩৮

লয় কালে তিনি মহামারী,
 জন্মভীনা—হন সৃষ্টি-রূপা তিনি,
 স্তম্ভিত-কালে সর্ক-ভূত-প্রাণী
 করেন পালন তিনি সনাতনী । ৩৯

অভ্যাদয়ে মানবের গৃহে
 হন তিনি লক্ষ্মী—বুদ্ধি প্রদায়িনী,
 সেইরূপ তিনিই অভাবে
 বিনাশ-কারিণী অলক্ষ্মী-রূপিণী । ৪০

গন্ধ পুষ্প ধূপ আদি দানে—
 করিলে তাঁহার পূজা আর স্তুতি,
 দেন তিনি সম্পদ - সম্ভান,
 আর দেন তিনি ধর্ম্মে শুভ-মতি । ৪১



ত্রয়োদশ মাহাত্ম্য ।

চণ্ডীকায় নমস্কার ।



কহিলেন ঋষি—১

এই অতি শ্রেষ্ঠ দেবীর মাহাত্ম্য,
করিমু কীর্তন তোমা, হে রাজন !
এ প্রভাবময়ী হন সেই দেবী,
—যাঁহা হতে হয় এ বিশ্ব - ধারণ ; ২
বিষ্ণু - ভগবান্- মায়া তিনি হন,
—তাঁহা হতে লাভ হয় তত্ত্ব-জ্ঞান । ৩

তুমি, এই বৈশ্ব, কিম্বা জ্ঞানী যত,
অথবা অপর যে আছে যেথায়,
আছ এবে মুগ্ধ, আছিলে মোহিত
পাইবেও মোহ তাঁ'হতে নিশ্চয় । ৪

হয়ে নিরাহার— কভু স্বপ্নাহার
 সংঘমি ইন্দ্রিয় তদগত - মনে,
 করিয়া নিঃশ্বত, নিজ গাত্র - রক্ত
 দিলা বলি তবে তাহারা হুজনে । ১১

সংযত - হৃদয়ে, করিলে এক্রুপে
 তিন বর্ষ - কাল দেবীর সাধন,
 তুষ্টা হয়ে দেবী— চণ্ডী জগদ্ধাত্রী,
 প্রত্যক্ষ হইয়া কহিলা বচন । ১২

কহিলেন দেবী—১৩

প্রার্থহ যা' তুমি, ওহে নৃপমণি
 চাহ তুমি যাহা, হে বৈশ্ব-নন্দন !
 হইয়া সন্তুষ্ট দিব সে সমস্ত
 —আমার নিকট কর তা' গ্রহণ । ১৪

কহিলেন মার্কণ্ডেয়—১৫

মাগিলা এ বর,— তবে নৃপব:
 “পর-জন্মে ভোগ রাজত্ব অক্ষয়,
 ইহ-জন্মে আর নিজ রাজ্য-লাভ
 —বৈরী - কুল - বল বলে করি ক্ষয় ।” ১৬

কহিলেন মার্কণ্ডেয়—২৫

দেবী এইরূপে, তাঁদের দুজনে,
 দিইলেন বর যেরূপ বাঞ্ছিত ;
 তাহারা তুষিলে স্তবে ভক্তি-ভরে,
 হইলা তখনি দেবী অস্তহিত । ২৬।২৭

দেবীর সকাশে, এ বর লভিয়ে,
 ভূপতি সুরথ ক্ষত্রিয়-ভূষণ,
 হইবেন মনু নামেতে সাবর্ণি,
 —সূর্য্য হতে করি জনম-গ্রহণ । ২৮।২৯

মার্কণ্ডেয় পুরাণান্তর্গত

দেবী-মাহাত্ম্য



পরিশিষ্ট

মাহাত্ম্য ।



পূর্ব ভাষ ।



চণ্ডীর এই পদ্যানুবাদ উপলক্ষে মূলগ্রন্থ সম্বন্ধে দুই চারিটি কথা বলিবার প্রয়োজন আছে। আমি এস্থলে তাহা বলিবার অভিপ্রায় করিয়াছি। কিন্তু তাহার পূর্বে, এই অনুবাদের সহিত আমার কি সম্বন্ধ—তাহা উল্লেখ করা কর্তব্য।

চণ্ডী আমাদের ধর্মগ্রন্থ। ধর্মগ্রন্থের যতই প্রচার হয়—ততই মঙ্গল। মূলচণ্ডী হিন্দুর গৃহে পূজা-পার্বণে পঠিত হইয়া থাকে বটে, কিন্তু অল্প লোকেই তাহার অর্থ গ্রহণ করেন। ধর্মগ্রন্থের আরম্ভি অপেক্ষা, অর্থ গ্রহণ যে সমধিক ফলপ্রদ, তাহা আর বলিতে হইবে না। এক্ষণে আমাদের দেশের অধিকাংশ লোকই সংস্কৃত জানেন না। সুতরাং যাঁহারা চণ্ডীর অর্থগ্রহণ করিতে ইচ্ছা করেন, মূলগ্রন্থের অনুবাদ পড়িয়া তাঁহাদের প্রায়ই সে ইচ্ছা পূর্ণ করিতে হয়। ভাষা গদ্যানুবাদ কখন সুখ-পাঠ্য হয় না। ছন্দ-স্বর-তালের কি এক অদ্ভুত প্রাণস্পর্শী মোহিনী শক্তি আছে—ছন্দ ও সুরের সহিত অর্থ ও ভাবের কি এক আশ্চর্য্য সম্বন্ধ আছে যে, সুর ও ছন্দের সহিত কোন কথা বলিতে পারিলে, তাহা বড় হৃদয়-গাহী হইয়া অন্তরে দৃঢ় অঙ্কিত হইয়া যায় ;—গদ্যে তাহা সম্ভব হয় না। এইজন্য বোধহয় আমাদের সকল শাস্ত্রগ্রন্থই ছন্দে রচিত। এইজন্যই চণ্ডীর সুখ-পাঠ্য পদ্যানুবাদের প্রয়োজন।

কিন্তু সহজ ও সাধারণের পাঠ্য পদ্যানুবাদ কেবল বর্ণানুবাদ হইলেই হয় না। অনুবাদে শুধু শব্দ-প্রয়োগ-কৌশল বা Literary gymnastics এর পরিচয় দেওয়াই যথেষ্ট নহে। মূলে যে মাধুর্যা—যে লালিত্য—যে প্রাণ থাকে, মূলের যে মোহিনী শক্তি থাকে, অনুবাদে তাহা যথাসম্ভব রক্ষা করিতে হয়; অথচ মূলের সহিত যতদূর ঐক্য রাখা সম্ভব—তাহারও বিশেষ চেষ্টা করিতে হয়।

এ পর্যন্ত চণ্ডীর দুইখানি পদ্যানুবাদ প্রকাশিত হইয়াছে দেখা যায়। তাহার মধ্যে পণ্ডিত রামগতি ঞায়রত্ন মহাশয়ের অনুবাদ এক্ষণে দুস্তাপ্য। আর কবির নবীন চন্দ্র সেনের অনুবাদ, অক্ষরানুবাদ বলিয়া, সাধারণের পাঠোপযোগী নহে।

সুতরাং চণ্ডীর সাধারণের পাঠ্য পদ্যানুবাদের বিশেষ প্রয়োজন আছে,—প্রথমে আমার এই ধারণা হয়। এইজন্য অনধিকার সত্ত্বেও, আমি চণ্ডীর অনুবাদে প্রবৃত্ত হই, ও কয়েকটি শ্লোকের অনুবাদও করি। পরে আমার সৌন্দর্য-সদৃশ স্নেহাস্পদ আত্মীয় শ্রীমান্ মহেন্দ্র নাথ মিত্রকে এই অনুবাদ করিতে অনুরোধ করি। মহেন্দ্র কর্তৃক এই অনুবাদ, আমি আদ্যোপান্ত দেখিয়া দিয়াছি। আমার বিবেচনায় ইহা অধিকাংশ স্থলেই উৎকৃষ্ট হইয়াছে। এত উৎকৃষ্ট হইবে, তাহা আমি প্রথমে আশা করি নাই। যাহা হউক, এই অনুবাদের দোষ-গুণ বিচার করিবার আমার অধিকার নাই।—সে বিচার-ভার পাঠকের।

এক্ষণে মূল চণ্ডী-গ্রন্থ সম্বন্ধে—চণ্ডীর মাহাত্ম্য সম্বন্ধে, এখানে যাহা উল্লেখের প্রয়োজন—তাহাই বলিতে আরম্ভ করিব।

শ্রীদেবেন্দ্র বিজয় বসু।

চণ্ডী-মাহাত্ম্য ।

—§—

চণ্ডী—হিন্দুর, বিশেষতঃ শাক্ত সম্প্রদায়ের প্রধান ধর্মগ্রন্থ । হিন্দু মাত্রেই চণ্ডীর বিশেষ আদর করিয়া থাকেন । চণ্ডীতে অনেক নূতন দার্শনিক তত্ত্বের, ও মূল ধর্ম-তত্ত্বের অবতারণা আছে । চণ্ডীর উপাখ্যানে ও স্তোত্রে অনেক গুঢ় তত্ত্ব নিহিত আছে । আমি এস্থলে সে সকল তত্ত্ব বুদ্ধিতে চেষ্টা করিব । তাহা হইলে হিন্দুর নিকট চণ্ডীর কেন এত আদর—এত সম্মান—এত পূজা, কেন চণ্ডী আমাদের এক প্রধান ধর্ম-গ্রন্থ—তাহা বুদ্ধিতে পারিব ।

হিন্দুর প্রায় সকল ধর্ম-কর্মই চণ্ডী-পাঠ বিহিত । চণ্ডীতেই উক্ত হইয়াছে—

“পূজাকালে আর মহোৎসবে,

কিম্বা অগ্নিকার্যো আর বলিদানে,

এ সকল মাহাত্ম্য আমার

উচিত সতত শ্রবণ - পঠনে ।

* * *

সর্বরূপ শাস্তি - ক্রিয়া - কালে,

সেইরূপ আর চঃস্বপ্ন-দর্শন—

কিম্বা উগ্র - গ্রহ - ব্যাধি- কালে,

করিবে আমার মাহাত্ম্য-শ্রবণ।”

চণ্ডী-পাঠের ফলও অসীম। চণ্ডীতে উক্ত হইয়াছে—

“না র’বে তাদের পাপ কিছু,—

পাপ-হেতু আর বিপদ না র’বে,

না হইবে দরিদ্রতা কভু,

বান্ধব-বিয়োগ কিম্বা নাহি হবে।

বৈরী-ভয় নাহি র’বে তার,

নাহি র’বে ভয় রাজা দম্ব্য হতে,

না রহিবে ভয় কদাচিৎ,

সলিল - অনল - আয়ুধ হইতে।”

এই চণ্ডী-পাঠের ফল “বারাহী-তন্ত্রেও” বর্ণিত আছে তাহার শেষে আছে—

“চণ্ড্যাঃ শতাবৃত্তি পাঠাৎ সৰ্ব্বাঃসিদ্ধান্তি সিদ্ধয়ঃ।”

যেখানে চণ্ডী-পাঠ হয়, কথিত আছে—জগন্মাতা চণ্ডী সেখানে স্বয়ং উপস্থিত থাকেন। ইহাও চণ্ডীতে উক্ত হইয়াছে—

“এ সব মাহাত্ম্য মম পাঠে,

পারে সন্নিকটে রাখিতে আমায়।”

শাক্ত সম্প্রদায় চণ্ডী-পাঠের এইরূপ অসীম ফলের কথা বিশ্বাস করেন। এইজন্ত প্রত্যেক শাক্তের গৃহে পূজা পার্কণে—সকল ধর্ম-কর্মেই চণ্ডী-পাঠ হইয়া থাকে। ইহা ব্যতীত, চণ্ডীর শ্লোক মন্ত্র-রূপে উচ্চারিত হয়। তন্ত্রে আছে—

“তস্মিন্ দেব্যা স্তবে পুণ্যে মন্ত্ৰাঃ সপ্তশতং শিবে।”

বেদ যেমন মন্ত্র-রূপে উচ্চারিত হইত, চণ্ডীও সেইরূপ মন্ত্র-রূপে পাঠ করিতে হয়। বেদ-পাঠে এক্ষণে অল্প লোকেই সমর্থ। এখন

বেদের পরিবর্তে, শাক্তগণ চণ্ডী-পাঠই করিয়া থাকেন। বৈদিক যজ্ঞকালে যেমন বেদ-মন্ত্র উচ্চারিত ও উদ্‌গীত হইত, এক্ষণে পূজা-পার্কর্ষণে সেইরূপ চণ্ডী-পাঠ হইয়া থাকে। বৈদিক ভারত এখন তান্ত্রিক হইয়াছে।—বেদ-প্রধান ভারতবর্ষ এখন চণ্ডী-প্রধান হইয়াছে। ভারতবর্ষ হিন্দু-প্রধান দেশ। এক্ষণে এই ভারত-বর্ষে বোধহয় শাক্তের সঙ্খ্যাই অধিক। সুতরাং চণ্ডী-পাঠের কিরূপ বহুল বিস্তার—তাহা সহজেই উপলব্ধি করিতে পারি।

চণ্ডী যে কেবল পূজা-পার্কর্ষণে স্বস্ত্যয়নে পঠিত হয়—তাহা নহে। এমন অনেক হিন্দু আছেন, যাহারা প্রত্যহ অন্ততঃ এক-বারও চণ্ডী-পাঠ করিয়া থাকেন। বোধহয়, জগতে কোন গ্রন্থই নাই—যাহা সমগ্র এতবার পঠিত হইয়াছে। ইহা হইতে ধর্ম-জগতে চণ্ডীগ্রন্থের স্থান কত উচ্চে—তাহা আমরা উপলব্ধি করিতে পারি।

যে গ্রন্থ এত অধিক পঠিত হয়-- যাহার পাঠে এত অধিক ফল হিন্দুরা বিশ্বাস করেন, সে গ্রন্থ-পাঠের বিধানেরও বড় বাঁধাবাঁধি আছে। “ চিদাম্বর-তন্ত্রে ” চণ্ডীপাঠ-বিধান সম্বন্ধে, মার্কণ্ডেয় ঋষির প্রতি ব্রহ্ম-বাক্য যাহা উল্লিখিত হইয়াছে তাহা এই-

“ অর্গলং কীলকঞ্চাদৌ পঠিত্বা কবচং পাঠেৎ ।

জপেৎ সম্প্রশতীং পশ্চাৎ ক্রম এষ শিবোদিত ॥”

চণ্ডী-পাঠের পূর্বে চণ্ডী-গ্রন্থকে আধারে স্থাপন করিতে হয়। প্রথমে চণ্ডীর পূজা ধ্যান করিয়া অর্গল পাঠ করিতে হয়; তাহার পর চণ্ডীর ধ্যান করিয়া কীলক ও কবচ পাঠ করিতে হয়; আবার দেবীর ধ্যান করিতে হয়। ইহা ব্যতীত “ দেবী-স্কন্ধ ” জপ

করিতে হয়। এইরূপ উপক্রমের দ্বারা যখন চণ্ডী-পাঠের জন্ত মন প্রস্তুত হয়, তখন চণ্ডী-পাঠের সংকল্প করিয়া শুদ্ধচিত্তে চণ্ডীপাঠ করিতে হয়। ক্ষুট-বাক্য উচ্চারণ করিয়া চণ্ডী পাঠ করাই নিয়ম।

চণ্ডী-পাঠের এতই বাঁধাবঁধি। আবার যিনি চণ্ডী পাঠ করেন, তাঁহাকে একাগ্র চিত্তে পড়িয়া যাইতে হইবে; অধ্যায়ের মধ্যে কোথাও পাঠ বন্ধ করিলে চলিবে না। চণ্ডী পাঠে যদি কোথাও কোন ভুল হয়, তবে গৃহস্থ সৰ্বনাশ হইল মনে করেন। সেই আপদ দূর করিবার জন্ত, তাঁহাকে স্বস্তায়নাদি করিয়া কোনরূপে মনকে প্রবোধ দিতে হয়। ইহা বা তীত, যিনি চণ্ডী পাঠ করেন, তাঁহাকে প্রতিবার পাঠ সমাপ্ত করিয়া—

“ যদক্ষরং পরিভ্রষ্টং মাত্রাহীনঞ্চ যদ্ববেৎ ।

পূর্ণং ভবতু তং সৰ্ব্বং স্বং প্রসাদান্নহেষ্ণরি ॥”

প্রভৃতি প্রার্থনা করিতে হয়।

এস্থলে যাহা উল্লিখিত হইল, তাহা হইতে বুঝিতে পারা যায় যে, চণ্ডী হিন্দুর নিকট কিরূপ পূজিত—হিন্দু চণ্ডীকে কি চক্ষে দেখিয়া থাকেন। যে চণ্ডীর স্থান ধর্ম-জগতে এত উচ্চে, তাহাতে কি আছে—তাহা আমাদের সকলেরই জানা কর্তব্য। চণ্ডীতে কোন্ কোন্ ধর্ম-তত্ত্ব বুকান আছে, চণ্ডীর ধর্ম-তত্ত্বের দার্শনিক ভিত্তি কি—তাহা আমাদের বুঝিতে হইবে। কিন্তু এস্থলে সে সকল কথা বিস্তারিত বলিবার স্থান নাই। এই চণ্ডী-গ্রন্থে কি আছে, তাহাই কেবল এস্থলে সংক্ষেপে বুঝিতে চেষ্টা করিব মাত্র।

আমরা এস্থলে চণ্ডীর মূল তত্ত্বগুলি বুঝিতে চেষ্টা করিব বটে,

কিন্তু চণ্ডীর সমালোচনায় প্রবৃত্ত হইব না । কেন না, ধর্মগ্রন্থের সমালোচনা কর্তব্য নহে । ষাঁহারা সেই গ্রন্থোক্ত ধর্মে বিশ্বাসবান্, তাঁহারা প্রায়ই নিরপেক্ষ সমালোচনা করেন না, অথবা করিতে পারেন না । আর ষাঁহারা সেই ধর্মে বিশ্বাসবান্ নহেন, সমালোচনা-কালে তাঁহারা অনেক সময়ে অযথা দোষানুসন্ধান করেন । ধর্মগ্রন্থের সম্পূর্ণ নিরপেক্ষ সমালোচনা কদাচিৎ সম্ভব ;—আর সম্ভব হইলেও, তাহা সম্প্রদায় বিশেষের ধর্ম-বিশ্বাসে আঘাত করিতে পারে । এ নিমিত্ত একরূপ সমালোচনা কর্তব্য নহে ।

তাহার পর, হিন্দুর নিকটে ‘ ধর্ম ’—অস্তরের সামগ্রী । ধার্মিক কখন ধর্মকে বাহিরে দেখাইতে চাহেন না ।—যেমন হিন্দু কুল-বধূকে অন্দরের বাহিরে দেখিলে ব্যথিত হন, তেমনই নিজের ধর্ম-মতও বাহিরে সমালোচিত হইতে দেখিলে, হিন্দু হুঃখিত হইয়া থাকেন । হিন্দু মাঝেই কখন নিজ ইষ্ট-দেবতার নাম প্রকাশ করেন না—বীজ-মন্ত্র উচ্চারণ করেন না—গুরুর নাম মুখে আনেন না । হিন্দু অস্তরে তান্ত্রিক হইয়াও “ সত্যায় বৈষ্ণব-মাচরেং ” বলিয়া, তাঁহার প্রকৃত ধর্ম-মত অস্তরের অন্ততম স্থানে লুকাইয়া রাখেন । হিন্দু গোপনে নির্জনে উপাসনা করেন ; দলবদ্ধ হইয়া সত্য বসিয়া কখন উপাসনা করেন না । সূত্রাৎ হিন্দুর নিকট তাঁহার ধর্ম-মত সমালোচনা, কখন আদৃত বা উপাদেয় হইতে পারে না । আর সেই সমালোচনা প্রশংসা-মূলকই হউক, কিম্বা দোষানুসন্ধান-প্রবৃত্তি-মূলকই হউক, সকল প্রকারেই তাহা হিন্দুর নিকট দুঃখনীয় । এ কারণ আমরা এস্থলে চণ্ডী-গ্রন্থের সমালোচনা করিব না ; চণ্ডীতে কি আছে, এস্থলে তাহাই উল্লেখ করিব মাত্র ।

ধর্ম-মত সমালোচনা না করিবার অল্প কারণও আছে। কিন্তু দর্শন-শাস্ত্রে বিশেষ প্রবেশ না থাকিলে, সেই কথা বুঝা যাইবে না। আমাদের দেশের প্রায় সকল দার্শনিক ও আধুনিক প্রধান পাশ্চাত্য দার্শনিক পণ্ডিতগণের মতে, তর্ক ও যুক্তি দ্বারা ধর্মের মূল তত্ত্ব লাভ করিবার উপায় নাই। সে কারণ কোন ধর্ম-মত সমালোচনার বিশেষ ফল নাই—তাহার দ্বারা কোন বিশেষ সত্য আবিষ্কার করা যায় না।

এই চণ্ডী—মার্কণ্ডেয় পুরাণের অন্তর্গত। হিন্দুরা বিশ্বাস করেন যে, এই মার্কণ্ডেয় পুরাণ মূলতঃ ত্রিকাল-দর্শী মার্কণ্ডেয় ঋষি-প্রোক্ত। সেই ঋষি-প্রোক্ত চণ্ডী-বাহায়্য পরে অল্প কর্তৃক লিপিবদ্ধ হইয়াছিল, ইহা মার্কণ্ডেয় পুরাণ হইতেই বুঝা যায়। কিন্তু কে ইহা প্রথমে লিপিবদ্ধ করেন—কোন সময়েই বা লিপিবদ্ধ হয়, তাহা এক্ষণে নির্ণয় করিবার আর উপায় নাই।

তবে এস্থলে এইমাত্র বলা যাইতে পারে যে, চণ্ডী অতি প্রাচীন গ্রন্থ। মার্কণ্ডেয় পুরাণ মূল মহাভারতের পরে রচিত। কেন না, মার্কণ্ডেয় পুরাণের প্রথমেই মহাভারত সম্বন্ধে প্রশ্ন জিজ্ঞাসা আছে দেখা যায়। ইহা হইতে বুঝা যায় যে, গীতা—চণ্ডীর পূর্ববর্তী গ্রন্থ। গীতা—মহাভারতের অন্তর্গত; ইহা মহাভারতের প্রক্ষিপ্ত অংশ নহে। সে কথা এখানে প্রমাণ করিবার আবশ্যক নাই। মহাভারত যখন মার্কণ্ডেয় পুরাণের পূর্ববর্তী গ্রন্থ, তখন বলিতেই হইবে যে চণ্ডী গীতার পরে রচিত। কত পরে রচিত, তাহা এক্ষণে আর নির্ণয় করিবার উপায় নাই।

চণ্ডীর সহিত গীতার বিশেষ সাদৃশ্য আছে। চণ্ডীতে 'নন্দ

দশোদার' কথাও উল্লিখিত আছে। তাহার পর দেখা যায় যে, গীতা যেমন বৈষ্ণবদের—চণ্ডীও তেমনই শাক্তদের প্রধান ধর্মগ্রন্থ। আমরা দেখিতে পাই, গীতার ঞায় চণ্ডীতেও সাত শত শ্লোক থাকা স্বীকৃত হইয়াছে। বাস্তবিক কেবল শ্লোক হিসাবে ধরিলে, চণ্ডীতে সর্বসমেত ৫৭৯ শ্লোক আছে। তবে ইহাকে সপ্তশতী মন্ত্র-গ্রন্থ করিবার জন্ত, ইহাতে সাত শত শ্লোক থাকা কল্পনা করা হইয়াছে ; এবং চণ্ডীর 'উবাচ' প্রভৃতিকে এক একটা স্বতন্ত্র শ্লোক ধরিয়া, তবে সপ্তশত শ্লোক পূরণ করা হইয়াছে, ইহা বলা যাইতে পারে। আবার অত্র দিকে এসম্বন্ধে বলিতে পারা যায় যে, গীতার অনুকরণে যে চণ্ডীতে এইরূপ সাত শত শ্লোক কল্পনা করা হইয়াছে—ইহা বলিবার কোন কারণ নাই। কেন না, মন্ত্র-রূপে যে কয়েকটি কথা দেখানে একবারে বা একাধিক ক্রমে উচ্চারণ করিতে হয়— সেখানে সে কয়েকটি কথাই একটি মন্ত্র-রূপে পরিগৃহীত হইয়াছে। এই ভাবে গণনা করিয়া চণ্ডীতে সাত শত মন্ত্র পাওয়া যায় বলিয়া, চণ্ডীকে সপ্তশতী বলা হইয়াছে।

চণ্ডী-রচনার কাল-নির্ণয় করিবার, এখন আর উপায় নাই বলিয়া বোধ হয়। তবে চণ্ডী যে কালেই রচিত হউক, ইহা যে অমর— চিরকালের সম্পত্তি—সমগ্র মানবজাতির সম্পত্তি, তাহা নিরপেক্ষ বুদ্ধিমান পণ্ডিত মাত্রেই স্বীকার করিতে বাধ্য হইবেন। চণ্ডী-গ্রন্থ কালের কোন অদৃষ্ট অজ্ঞাত দ্বার দিয়া আসিয়াছে—তাহা আমরা জানি না বটে, যে শ্রোতস্বিনী অমৃত-বারি দান করিয়া জনপদ-বিশেষকে বর্ণ-প্রসাবনা করিয়াছে—তাহার মূল-উৎপত্তি-স্থান আমরা খুঁজিয়া পাই না বটে, কিন্তু তাহাতে কিছুই আসিয়া যায় না। এইরূপ

অমর গ্রন্থ সম্বন্ধে, আমাদের কাল-নির্গম-প্রবৃত্তি-কণ্ডুয়ন নিবৃত্তি হইলে—বিশেষ ক্ষতি নাই। যে সমস্ত অমূল্য গ্রন্থ-রত্ন কালের কঠোর অগ্নি-পরীক্ষায় উত্তীর্ণ হইয়া অমরতা লাভ করিয়াছে, সে সকল মহাগ্রন্থ চিরকালের সম্পত্তি। যতদিন হিন্দুজাতি থাকিবে—যতদিন ভাষা থাকিবে—এমন কি যতদিন মানবজাতি থাকিবে, ততদিন সেই সকল মহাগ্রন্থের লোপ হইবার সম্ভাবনা নাই।

আমরা পূর্বে বলিয়াছি যে, চণ্ডী—ধর্মগ্রন্থ-স্বরূপে সমালোচ্য নহে। সেইজন্ত কাব্য-স্বরূপেও চণ্ডীর সমালোচনা অকর্তব্য। অবশ্য চণ্ডীতে কাব্যাংশে প্রশংসার বিষয় যথেষ্ট আছে; কিন্তু চণ্ডী কাব্য নহে—ধর্মগ্রন্থ। কাব্য-সমালোচনার যে উপকরণ, সেই উপকরণে ধর্মগ্রন্থের সমালোচনা চলে না। ধর্মগ্রন্থ কাব্যাংশে উৎকৃষ্ট হয় ভালই,—না হইলেও ক্ষতি নাই। তবে ইহা বলিতে হইবে যে, দর্শন ও কাব্যের সম্মিলনেই ধর্মগ্রন্থের উৎপত্তি। যিনি শ্রেষ্ঠ দার্শনিক—তিনি তত্ত্ব-দ্রষ্টা। আর যিনি কবি—তিনি দ্রষ্টা ও স্রষ্টা। যাহারা কবি-গুরু ও দার্শনিক-শ্রেষ্ঠ, সেই মহাপুরুষগণই মূল ধর্মগ্রন্থের প্রবর্তক। তাহারা ই ‘আপ্ত-ঋষি’। বেদের মন্ত্র-দ্রষ্টা ঋষিগণ কবি-শ্রেষ্ঠ ছিলেন। স্বয়ং স্রষ্টাই আদি-কবি—পুরাণ।

অতএব ধর্মগ্রন্থ মাত্রেই কাব্যাংশ আছে। অনেক ধর্মগ্রন্থই উৎকৃষ্ট কাব্য। তথাপি কেবল কাব্য-স্বরূপে ধর্মগ্রন্থের সমালোচনা কর্তব্য নহে। ধর্মগ্রন্থের কবি, ধর্মের মূল-তত্ত্বগুলিকে সহজ অলঙ্কারে অলঙ্কৃত করিয়া, সে গুলিকে সাধারণের বুদ্ধি-গ্রাহ

করিয়া দেন। তাঁহারা সাধারণ (Abstract) সত্যগুলিকে বিশেষ (Concrete) আকৃতি দিয়া, সাধারণের গ্রহণ-যোগ্য করিয়া দেন। কখন রূপকে—কখন বা উপাখ্যানের সাহায্যে, সেই সকল সত্য প্রচার করেন। এইজন্য অনেক উপাখ্যান ও রূপক-বর্ণনা ধর্ম-গ্রন্থে প্রবেশ লাভ করিয়াছে। এইজন্যই ধর্ম-গ্রন্থ সমূহে কাব্যাংশ আছে ;— কিন্তু তাহা আমাদের সমালোচ্য নহে।

চণ্ডীর রচনা সম্বন্ধে এস্থলে কিছু বলা আবশ্যিক। চণ্ডীর রচনা অতি মনোহর—অতি উপাদেয়, তাহা এক বাক্যে সকলেই স্বীকার করেন। এই রচনা এত মনোহর যে, চণ্ডীপাঠ-কালে বোধহয় যেন কতই মধুর সঙ্গীত-ধ্বনি হইতেছে! চণ্ডীতে গীতি-কাব্যের স্থায় যে লালিত্য—যে মাধুর্য্য আছে, তাহা বর্ণনাতীত। বিশেষতঃ চণ্ডীতে যে কয়েকটি স্তোত্র আছে, তাহার মধুরতা এত অধিক—এতদূর হৃদয়-গ্রাহী ও মন-মুগ্ধ-কর যে, যিনিই তাহা মন-নিবেশ পূসক যথারাতি আবৃত্তি করিতে চেষ্টা করিয়াছেন, বা আবৃত্তি শুনিয়াছেন, তিনিই একবাক্যে তাহা স্বীকার করিতে বাধ্য হইবেন। বাস্তবিকই তাহা ‘কাণের ভিতর দিয়া মরমে পশিয়া প্রাণ আকুল করিয়া তুলে।’ ইহাতে কি যেন মাদকতা আছে, যাহাতে দাবককে অনেক সময় উন্মত্ত করিয়া দেয়! এইজন্য বোধ হয় চণ্ডীর আবৃত্তি হিন্দুর নিকট এত পবিত্র—এত প্রয়োজন। এইজন্যই বোধ হয়, চণ্ডীর শ্লোক গুলিকে মন্ত্র বলা হয়। মন্ত্রের প্রকৃত উচ্চারণেই কার্য্য হয়, তখন তাহার অর্থ-গ্রহণ না হইলেও ক্ষতি নাই। মন্ত্র-উচ্চারণ-কালে একরূপ সুর ও তাল, এবং তৎসহ একরূপ অনুকম্পন উৎপন্ন হয়, তাহা আমাদের মনের ও সমস্ত

শরীরের উপর কার্য্য করে। সেই ক্রিয়া-ফলে একরূপ অপূর্ণ শক্তি উৎপন্ন হয়—তাহা ধর্ম্ম-সাধনের বিশেষ উপযোগী। ইহা ব্যতীত মন্ত্রের উচ্চারণ দ্বারা মনের একাগ্রতা জন্মে। সেই একাগ্রতা আমাদের নিবৃত্তির পথে—সংযমের পথে লইয়া যায়। এই একাগ্রতা-সাধনই ধর্ম্ম-সাধনের প্রথম সোপান। যাহা হউক, মন্ত্রের কি প্রয়োজন তাহা এতলে আর অধিক বলিবার আবশ্যক নাই। চণ্ডী যে মন্ত্র-রূপে পাঠ করা হয়, এবং সেইজন্য চণ্ডীপাঠ হইতে শ্রেষ্ঠ ফল লাভ হয় বলিয়া শাস্ত্রে যে উল্লিখিত হইয়াছে, তাহা অনেক হিন্দুই বিশ্বাস করেন। এতলে সে সম্বন্ধে আর কিছু উল্লেখের প্রয়োজন নাই।

এক্ষণে চণ্ডীতে ধর্ম্ম-তত্ত্ব কিরূপে বিস্তারিত হইয়াছে, তাহা আমরা দেখিতে চেষ্টা করিব। চণ্ডীর প্রারম্ভে আমরা দেখিতে পাই যে, সুরথ ভূপতি কিরূপে অষ্টম মন্ত্র হইয়াছিলেন—তাহারই বিবরণ বর্ণিত আছে। এই বিবরণ উপলক্ষ্য করিয়া চণ্ডীর মাহাত্ম্য কীর্ত্তন করা হইয়াছে। সুরথ—স্বারোচিষ-মহাস্তর-কালে চৈত্রবংশীয় একজন সামান্য ভূপতি ছিলেন মাত্র। তিনি কিরূপে “স্বধু মহামায়া-প্রভাব-আশ্রয়ে মন্বন্তর-অধিপতি” হইতে পারিয়াছিলেন, তাহাই চণ্ডীতে দেখান হইয়াছে।

সুরথ রাজা অপত্য-নির্কিংশেবে প্রজাপালন করিতেন। পরে শূকর-ভোজী অসভ্যজাতির অধিপতিগণ তাঁহার শত্রু হইয়া উঠিল। তাহাদের সহিত সংগ্রামে সুরথ ভূপতি পরাজিত হইয়া, নিজ রাজধানীতে ফিরিয়া আসিলেন। সেখানেও শত্রুরা তাঁহাকে আক্রমণ করিয়া পরাজয় করিল। অবসর বুঝিয়া, তাঁহার বিশ্বাস-বাতক

অমাত্যগণ তাঁহার “কোষ-বল” অপহরণ করিয়া লইল। তখন সুরথ রাজা মনের ছুখে গহন কাননে মৃগয়া ছলনা করিয়া চলিয়া গেলেন ; এবং তথায় মুনিশিষ্য-শোভিত প্রশান্ত ঋষিদাকীর্ণ মেঘস ঋষির আশ্রমে বাস করিতে লাগিলেন। তথাপি সুরথ রাজার রাজ্যের প্রতি মমতা দূর হইল না। তিনি সেই চিন্তার ভ্রিয়মাণ হইয়া কাল যাপন করিতে লাগিলেন।

সেই সময়ে এক দিন সমাধি নামে এক বৈশ্য, আত্মীয়-স্বজন কর্তৃক হত-সর্বস্ব হইয়া ও স্ত্রী-পুত্র কর্তৃক তাড়িত হইয়া, সেই আশ্রম-অভিমুখে আসিতেছিল। সুরথ রাজার সহিত সমাধির সাক্ষাৎ হইল। সুরথ রাজা দেখিলেন যে, তিনিও যেমন তাঁহার রাজ্যের প্রতি মমতায়ুক্ত—এই বৈশ্যও তেমনই তাহার সেই বিশ্বাস-ঘাতক ক্রুর পুত্র - পরিবারের উপর মমতায়ুক্ত! রাজা বৈশ্যকে বলিলেন—

“ধন-লোভে লুক্ক যেই দারা-সুত
করেছে দূর তোমার,—
তাহদের প্রতি, কেন তব মন,
স্নেহবদ্ধ হয়ে ধায় ?”

তখন বৈশ্য উত্তর করিল—

* * * *
“কি করিব আমি— নারে নিষ্ঠুরতা
বাঁধিতে আমার মন !
* * * *

বিরূপ স্বজন,— প্রণয়-প্রবণ
 মন যে তাদের প্রতি ;
 জানিয়াও তবু— না জানি স্বরূপ,
 কিবা ইহা, মহামতি ?”

তখন সুরথ রাজা বুঝিলেন তাঁহারও যে দশা—এই বৈশ্ণবও সেই দশা। উভয়েই বেশ বুঝিতেছেন যে, একরূপ মমতা নিতান্ত অকর্তব্য। কিঙ্ক তাঁহাদের নিজ চিন্তের উপর আয়ত্ত নাই ;— তাঁহারা জানিয়াও অজ্ঞানীর মত কাজ করিতেছেন। তখন উভয়ে এই ব্যাপার—এই রহস্য বুঝিবার জন্ত মেধস ঋষির সমীপে গমন করিলেন। রাজা ঋষিকে জিজ্ঞাসা করিলেন—

* * * *

“কেন বিনা নিজ চিত্ত-আয়ত্ততা,
 হৃৎখে মন মগ্ন হয় !
 জানিয়াও তবু, অজ্ঞানীর মত,
 হতেছে মমতা মম,—
 রাজ্যে—আর তার নিখিল বিভাগে,
 কি হেতু, মুনি সত্তম ?
 ইনিও তাঁড়িত,— ভৃত্য-ভাৰ্গ্যা-স্মৃতে
 হয়েছেন নিগহীত ;
 সংতাক্ত স্বজনে, তা’ সবার তরে,
 কেন তবু স্নেহাস্থিত ?

* * * *

কহ মহাভাগ ! জনমে কেমনে,
 জ্ঞানীরও মোহ এমন,
 বিবেক-বিহীন আমা দুজন্যর
 এ মৃত্যুতা যে কারণ ।”

এই স্থলে জীবনের বড় বিষম সমস্যার কথা উল্লেখ করা হইয়াছে। যিনিই একটু ভাবিয়া দেখিবেন—তিনিই বুঝিবেন যে, তাঁহার নিজ চিন্তের উপর কোন আয়ত্ত নাই। তাঁহার প্রবৃত্তি যেক্রপ—তিনি সেইক্রপ কার্য করেন। সেই প্রবৃত্তিকে দমন করিবার তাঁহার ক্ষমতা নাই। আমাদের কোন স্বাধীনতা নাই। আমাদের জ্ঞানের এমন সাধ্য নাই যে, সে প্রবৃত্তির উপর আধিপত্য করে। আমরা প্রবৃত্তি-চালিত। আমাদের প্রকৃতি যদি আমাদের বশে নহে, তবে ইহা কাহার দ্বারা চালিত ? এ বড় বিষম সমস্যা। মেধস ঋষি এই সমস্যার উত্তর দিয়াছিলেন। তিনি বলিলেন—

“সত্য বটে জ্ঞানী মানবের জাতি,
 —কিন্তু একা নহে তারা ;
 যেহেতু নিশ্চয় জ্ঞানী সবে হয়
 পশু - পক্ষী - মৃগ যারা।
 পক্ষী-মৃগে যাহা— মানুষেতে তাহা,
 —তুল্য ইহাদের জ্ঞান
 হয় যেইক্রপ,— অল্প বৃত্তি-চয়,
 উভয়ে হয় সমান।

জ্ঞান আছে তবু, দেখ মোহবশে
 ক্ষুধাতুর পক্ষীগণ ,
 শাবক-চঞ্চুতে, মুখস্থিত কণা
 সাদরে করে অর্পণ।
 এই নরগণ, ওহে নরবর !
 করে অভিলাষ স্মৃতে,—
 নহে কিসে লোভে— উপকার-আশে,
 —নার কিহে নিরথিতে ?
 তথাপি তাহারা মমতার ঘোরে
 মোহের গহ্বরে পশে ;
 সংসার-স্থিতির কারণ যেজন,
 —তাঁরি মহামায়া - বশে ।”

এই কথা হইতে আমরা বুঝিলাম যে, চিত্ত-বৃত্তি পশু
 পক্ষী মনুষ্য প্রভৃতি সকলেরই সমান। আর বিষয়-জ্ঞানও
 সকল জীবের একরূপ। কিন্তু সকল জীবেরই এই জ্ঞান মোহ-
 বদ্ধ। এ মোহ-মমতা আসে কোথা হইতে ? কে এরূপে জ্ঞানকে
 আবদ্ধ করে—কে আমাদের প্রবৃত্তিকে চালিত করে ? ইহার এই
 উত্তর যে, যিনি সংসার-স্থিতির কারণ—সেই হরির মহামায়াই
 আমাদের জ্ঞানকে আবদ্ধ করেন, আমাদের প্রবৃত্তিকে পরিচালিত
 করেন, বিশ্বকে বিমুগ্ধ করিয়া রাখেন। আমরা কলের পুতুলের
 মত চলিতে থাকি। কিন্তু এই মহামায়া কে ?

“তিনিই নিশ্চয় দেবী ভগবতী,
 তিনি মহামায়া হন ;

জ্ঞানীদের চিত্ত করেন মোহিত,
 বলে করি আকর্ষণ ।
 তাঁহতে প্রসব এ বিশ্ব জগত্ ;
 সেই মহামায়া ইনি,—

* * *

তিনি পরাবিদ্যা, মুক্তির কারণ,
 তিনি হন সনাতনী ;
 তিনিই সংসারে বন্ধনের হেতু,
 সবার ঈশ্বরী তিনি । ”

মেধস ঋষি এইরূপ বুঝাইলেন । তথাপি স্মরণ নৃপতি
 জিজ্ঞাসা করিলেন—

“কেবা দেবী সেই— মহামায়া যাঁরে,
 কহিলা, দেব, আপনি ?”

ঋষি উত্তর করিলেন—

“নিত্যা হন তিনি, জগত্-রূপিণী
 তাঁহে ব্যাপ্ত এই সব ;
 তবু নানাভাবে, আমার নিকটে,
 শুন তাঁর সমুদ্ভব ।
 দেব-কার্য্য যবে করিতে সাধন,
 হন তিনি আবিভূত,—
 হয়ে নিত্যা তবু, ‘উৎপন্ন’ বলিয়া,
 হন লোকে অভিহিত ।”

যিনি নিত্য—এই বিশ্ব-ব্রহ্মাণ্ড যাহার আকার, যাহাতে এই বিশ্ব প্রতিষ্ঠিত, যিনি নিখিল জগৎ ব্যাপিয়া অবস্থিত, তাঁহার আবার উৎপত্তি কি? এই উৎপত্তির অর্থ—বিশেষ-বিকাশ, দেব-কার্য্য জন্ত বিশেষ আবির্ভাব বা অবতার। এই অবতারের কথা গীতাতেও আছে—

“যথনি ধর্ম্মের মানি হয়, হে ভারত !
অধর্ম্মের অভ্যুত্থান হয় যেই কালে,—
সেই কালে করি আমি আমাকে সৃজন।
সাধুজন-পরিভ্রাণ, দ্রুত - নিধন
করিবারে—করিবারে ধর্ম্ম - সংস্থাপন,
যুগে যুগে করি আমি জনম গ্রহণ।”

আমরা চণ্ডী হইতে দেখিতে পাই যে, যিনি মহামায়া—যিনি বিষ্ণুর মহাশক্তি, তিনিই দেবকার্য্য-সাধন জন্ত অবতীর্ণ হন বা উৎপন্ন হন। আর মানব-কার্য্য-সাধন জন্ত—ধর্ম্ম-সংস্থাপন ও দ্রুত-নিধন জন্ত, স্বয়ং ভগবানই আপনাকে মায়া-বলে সৃজন করেন। —মানবের জয় হউক।

সে যাহা হউক, আমরা চণ্ডীতে দেবীর এই বিশেষ আবির্ভাবের তিনটি বিবরণ দেখিতে পাই। এই তিন আবির্ভাবের উপাখ্যান দ্বারাই চণ্ডীর মহাত্ম্য বুকান হইয়াছে। চণ্ডীর প্রথম উপাখ্যান—মধু-কৈটভ-বধ। এই উপাখ্যানে সৃষ্টি-বিবরণ বিবৃত হইয়াছে—

“প্রলয়ে জগত্ করি একাধ্ব,
বিষ্ণু প্রভু ভগবান,

অনন্ত শয়নে ছিলেন যখন
 যোগ - নিদ্রাতে মগন ;—
 বিকট তখন, অসুর দুজন,
 —‘মধু ও কৈটভ’ খ্যাত,
 বিষ্ণু-কর্ণ-মলে জন্মি সমুদাত
 ব্রহ্মারে করিতে হত।”

ব্রহ্মা নিরুপায়। হরি তখন যোগ-নিদ্রা-মগ্ন। সে যোগ-
 নিদ্রা হরিকে ত্যাগ না করিলে, হরি জাগিবেন না। ব্রহ্মা
 কেবল সৃষ্টি করেন,—পালন বা সংহার-শক্তি তাঁহার নাই।
 হরি বা বিষ্ণুই জগতের পালয়িতা ;—তিনিই জগৎ রক্ষার্থে
 অসুর সংহার করেন। হরি নিদ্রোথিত হইলে, তিনি এই দুই
 অসুর বিনাশ করিয়া ব্রহ্মাকে রক্ষা করিবেন। এইজন্ত
 ব্রহ্মা—

“হরিরে জাগাতে একাগ্র-হৃদয়ে,
 হরি - নেত্র - নিবাসিনী
 সে যোগ-নিদ্রারে, স্তবে তুষ্ট করে,
 স্থিতি - লয় - করী যিনি।”

তখন ব্রহ্মার স্তবে তুষ্ট হইয়া নিদ্রা-রূপা তামসী দেবী—

“হরির নয়ন হৃদয় - আনন
 বাহ - বক্ষ - নাসা হতে—
 হয়ে আবিভূত, রহিলা—অযোনি
 ব্রহ্মার দর্শন - পথে।”

তখন ভগবান হরি জাগরিত হইলেন; এবং মধু ও কৈটভ অম্বরের সহিত মহা যুদ্ধ করিয়া, তাহাদের বিনাশ সাধন করিলেন।

এই উপাখ্যানে, আমরা সৃষ্টি সম্বন্ধে মূল-তত্ত্বের আভাস পাই। আমরা বুঝিতে পারি যে, এই সৃষ্টির পূর্বে কেবল মাত্র তমই বিদ্যমান ছিল। এই তামসশক্তিই বিষ্ণুর মহামায়া। তাঁহার দ্বারা পরম পুরুষ ভগবান স্বয়ং অভিভূত ছিলেন। সৃষ্টির প্রথমে এই তম-শক্তি নিখিল কিঞ্চিৎ ব্যাপিয়া অতুল প্রভাবে বিদ্যমান ছিল। ক্রমে সেই তম-শক্তি হীন-তেজ হইলে, তাহা হইতে সত্ত্ব ও রজ-শক্তির স্ফূরণ হয়। ক্রমে সেই সত্ত্ব-শক্তির দ্বারা তম-শক্তি অভিভূত হইয়া পড়ে;—তখন রজ-শক্তি হইতে, জৈব-সৃষ্টি আরম্ভ হয়।

তবে এই কথা বুঝিতে হইলে, আরও ছুই একটি দার্শনিক তত্ত্ব মনে করিতে হইবে। সাংখ্য-মতে সত্ত্ব-রজ-তম এই ত্রিগুণের সাম্য-বস্থাই মূল-প্রকৃতি। প্রলয়ের অবস্থায়, এই ত্রিগুণের এইরূপ সাম্যাবস্থা থাকে। সকল গুণই সমান বলবান—পরস্পরের দ্বারা পরস্পর অভিভূত; সুতরাং কোন গুণের ক্রিয়াই তখন থাকে না—কোন গুণেরই বিশেষ বিকাশ থাকে না। সৃষ্টির প্রাক্কালে, সেই অব্যক্ত ত্রিগুণাত্মিক প্রকৃতির গুণ-ক্ষোভ হয়। কেন না, তখন ভগবান পরম পুরুষ হিরণ্যগর্ভ-রূপে সেই প্রকৃতিতে আধিষ্ঠিত হন। এই গুণ-ক্ষোভ হইলে, প্রথমেই তম-শক্তি ব্যক্তরূপে মূর্ত্তিমতী হওয়ায়—ক্রমে তাহা হইতে তামস বা প্রাকৃত সৃষ্টি হইতে থাকে। আরও সেই তম-শক্তির

বিকাশের সহিত, সত্ত্ব ও রজ-শক্তির ক্ষুণ্ণিত্ব হয়। কিন্তু তাহার প্রথমে তম-শক্তির দ্বারা অভিভূত থাকে।

চণ্ডীর এই সৃষ্টি-উপাখ্যানে দেখিতে পাই যে, প্রলয়ের পর সৃষ্টি-কার্য্য প্রথম আরম্ভ হইয়াছিল,—তখন সত্ত্ব-শক্তির অধিষ্ঠাতা বিষ্ণু—নিদ্রিত; আর রজ-শক্তির আশ্রয় ব্রহ্মা—নিষ্ক্রিয়। বিষ্ণুর কর্ণ-মলার সহিত শ্রবণ-ইন্দ্রিয়-গ্রাহ্য শব্দ-তন্মাত্রের ও আকাশ-ভূতের যে সম্বন্ধ আছে, তাহা হইতে এস্থলে ‘মধু-কৈটভ’ কাহাকে উপলক্ষিত হইয়াছে—তাহা অনুমান করা যায়। সৃষ্টির প্রথমে জড়-শব্দ-তন্মাত্র ও তাহার আধার আকাশ-ভূতাদির সৃষ্টি হইয়াছিল। কিন্তু তখন সেই তামস্ প্রকৃতির উদ্দাম-ক্রিয়া হইতে জড়-ব্রহ্মাও সৃষ্ট ও বর্দ্ধিত হইলেও, তাহা তখনও জৈব-সৃষ্টির উপযুক্ত হয় নাই; কেন না, তখনও নারায়ণ বিষ্ণু তম-প্রভাব বা যোগ-নিদ্রা ত্যাগ করিয়া, সৃষ্টি পালনে নিরত হন নাই। তাহার পর, তম-শক্তি নিয়মিত হইয়া রজ-ক্রিয়ার আরম্ভ হইলে, সেই রজ-শক্তির ক্ষোভ-হেতু ক্রমে সত্ত্ব-শক্তির বিকাশ হইল—অর্থাৎ তখন নারায়ণ জাগরিত হইলেন। এবং সত্ত্ব-শক্তির ক্ষুরণ-হেতু তম-শক্তি অভিভূত হইল—নিয়মিত হইল—তামস্ ক্রিয়া সংবত হইল; ক্রমে ব্রহ্মাও জীব-বাসোপযোগী হইল। ইহাই রূপকে বিষ্ণুর জাগরণ ও বিষ্ণু কর্তৃক মধু-কৈটভ-বধ বলিয়া বর্ণিত হইয়াছে বোধ হয়। যাহা হউক এস্থলে রূপক ভেদ করিয়া মূল অর্থ ও কূট ছন্দের দার্শনিক তত্ত্ব গ্রহণের চেষ্টা করিবার বিশেষ প্রয়োজন নাই। আমরা এক্ষণে চণ্ডীর দ্বিতীয় উপাখ্যান কি—তাহাই বৃত্তিতে চেষ্টা করিব।

এই দ্বিতীয় উপাখ্যান—মহিষাসুর-বধ। মহিষাসুর বড় দুর্দান্ত অসুর। তাহার সহিত ইন্দ্র আদি দেবতার মহা সংগ্রাম হয়। তাহাতে দেবতারা পরাজিত হইয়া রণে ভঙ্গ দিয়া পলায়ন করেন।—

“সে ছরান্না অসুরের বলে,
স্বর্গ-চ্যুত হয়ে দেব-গণ,
যত সব মর্ত্যবাসী সম,
ভূমণ্ডলে করে বিচরণ।”

আর এদিকে যুদ্ধে জয়লাভ করিয়া—

“সূর্য্য, চন্দ্র, যম, পুরন্দর,
বরুণ, পবন, ছত্ৰাশন,
আর সব দেব - অধিকার,
সে অসুর করেছে গ্রহণ।”

ইহাতে দেবতারার নিরুপায় হইয়া ব্রহ্মাকে অগ্রে করিয়া শিব ও নারায়ণের নিকট উপস্থিত হইলেন ও দুঃখের কথা জানাইলেন। তখন হরি-হরের ক্রোধ জন্মিল।—

“অতঃপর পূর্ণ মহাকোপে,
চক্রধর - ব্রহ্মা - ধূর্জটির
বদন-মণ্ডল হতে তবে,
মহাতেজ হইল বাহির।
ইন্দ্র আদি অস্ত্র দেবতার
দেহ হতে হইয়া নিঃসৃত—
দীপ্ত - তেজ - পুঞ্জ স্তমহান,
তা' সহিত হইল মিলিত।

* * *

তবে সৰ্ব্ব - দেব - দেহ - জাত,
সেই তেজ - পুঞ্জ - নিরূপম
মিলি — পরিণত নারী - রূপে,
—রূপালোকে ব্যাপি ত্রিভুবন ।”

এক. এক দেবতার নিঃসৃত তেজ হইতে, সেই দেবীর এক এক অঙ্গ উৎপন্ন হইয়াছিল। সেই সৰ্ব্ব-দেব-শক্তি-সমুদ্ভূত দেবীকে, তখন দেবগণ নিজ নিজ অস্ত্রাদি প্রদান করিলেন। এইরূপে সেই দেবী মহামায়ার দ্বিতীয়বার উৎপত্তি হইয়াছিল। এই দেবী—সকল দেবতার একীভূত শক্তিমাত্র। দেবগণের শক্তি পৃথক্ নহে—তাহা এক। পৃথক্ ভাবে দেবগণের শক্তি ধারণা করা কর্তব্য নহে। চণ্ডীতে দেখান হইয়াছে যে, সেরূপ পৃথক্ভূত শক্তির কোন বিশেষ সামর্থ্য নাই। তাহাতেই দেবগণ পৃথক্ভাবে অসুর জয় করিতে পারেন নাই। যখন তাঁহাদের শক্তি একীভূত হইল, তখনই তাহা অসুর-বিনাশ-সামর্থ্য সম্পন্ন হইয়াছিল। দেবগণের মহৎ বল একই—“মহৎ দেবানাং অসুরত্বং একং”।—শক্তি-উক্ত এই মহা সত্য (১) এস্থলে বোধ হয় রূপকে বুঝাইয়া দেওয়া হইয়াছে।

যাহা হউক, সেই দেবী এইরূপে সমুদ্ভূত হইয়া ভয়ঙ্কর নিনাদ করিলেন। তাহাতে ত্রিলোক স্তম্ভিত হইল। মহিষাসুর সেই

(১) ঋক্বেদের তৃতীয় মণ্ডলের ৫৫ সূক্ত জটব্য। এই সূক্তে ২২টি ঋক্ আছে। প্রত্যেক ঋকের শেষে আছে—“মহৎ দেবানাং অসুরত্বং একং।” এই তবুই এই সূক্তে বুঝান হইয়াছে।

শব্দ অনুসরণ করিয়া দেবী প্রতি ধাবিত হইল। মহিষাসুরের অনেক সেনাপতি ছিল। তাহারা--চিকুর, চামর, উদগ্র, মহাহস্ত, অসিলোম, পরিবারিত, বিড়ালাক্ষ, উদ্ধত, বাস্কল, তাম্র, অক্ষক, উগ্রবীৰ্য্য, ছুঙ্কর, ছুঁখু নামে আখ্যাত। মহিষাসুরের সেনাও অগণিত ছিল। সে সেই সমুদয় সেনাবল ও সেনাপতি লইয়া দেবীকে আক্রমণ করিল।—তখন দেবাসুরে মহাযুদ্ধ বাধিল।

দেবী একা—কেবল তাঁহার বাহন সিংহই তাঁহার একমাত্র সহায়। কিন্তু

“রণে রণ-রঙ্গিণী অধিকা
যেই শ্বাস করেন মোচন,
সদ্য শত সহস্র প্রমথে
পরিণত সে শ্বাস তখন।”

তখন এই প্রমথ-সেনা-দলের সহিত অসুর-সেনার তুমুল যুদ্ধ বাধিল। ক্রমে অসুর-সেনা দলে দলে নিহত হইতে লাগিল। কিন্তু—

“ছিন্ন-শির তথাপি কেহবা,
পড়ি পুনঃ করয়ে উত্থান;
কবন্ধেরা যুঝে দেবী-সনে
ধরিয়া ভীষণ প্রহরণ।”

এইরূপে মহা সমর হইল—

“যেথা হল সেই মহা রণ—
পড়ি সেথা অসুরের দল,
আর পড়ি অশ্ব গজ রথ
—অগম্য করিল মহীতল।”

যাহা হউক—

* * *
 “নিমেষে অসুর - মহাচমু,
 করিলেন অশ্বিকা নিধন ।”

তাহার পর, মহিষাসুরের সেনানীগণের সহ দেবী যুদ্ধ করিয়া একে একে তাহাদিগকে বিনাশ করিয়া শেষে মহিষাসুরকে বধ করিলেন ।

* * * “উল্লঙ্ঘনে দেবী
 করি আরোহণ সে মহাসুরে,
 চরণে চাপিয়া কণ্ঠদেশ তার
 করিলা তাড়িত শূল-প্রহারে ।
 দেবী-পদাক্রান্ত হয়ে সে তখন,
 নিজ মুখ হ’তে করিল তবে
 অর্দ্ধেক শরীর যেমন বাহির,
 —হইল নিরস্ত দেবী-প্রভাবে ।
 অর্দ্ধ-নিঃসারিত হয়ে মহাসুর,
 তবুও হইল সমরে রত ;
 মহা অসি-ঘাতে কাটি শির তার,
 করিলা সে দেবী ভূমে পাতিত ।”

ইহাই বোধ হয় দেবীর শারদীয়া দশভূজা মূর্তি । আর বোধ হয় এই মহিষাসুরের সহিত যুদ্ধের সময়েই দেবী জগদ্ধাত্রী-মূর্তি ধারণ করিয়াছিলেন । মায়াবী মহিষাসুর নানামূর্তি ধরিয়া যুদ্ধ করিয়াছিল । সে যখন পুরুষ-রূপে যুদ্ধ করিয়াছিল—দেবী তখন তাহার মস্তক ছেদন করেন ।

* * * "তখন সে পুনঃ
 হ'ল পরিণত মহাবারণে ।
 মহাসিংহে সেই শুণ্ডেতে আপন,
 করি আকর্ষণ করে গর্জন,—
 আকর্ষণকারী সে শুণ্ড তখনি
 খড়্গাঘাতে দেবী করে ছেদন।"

সে যাহা হ'উক মহিষাসুর বধ হইলো, দেবগণ মহা আনন্দিত
 হইয়া ভগবতী চণ্ডীর স্তব করিলেন । সেই স্তবে তুষ্টা হইয়া, দেবী
 ঠাঁহাদিগকে বর গ্রহণ করিতে বলিলেন । দেবগণ প্রার্থনা
 করিলেন—

* * *
 "করিও হরণ বিপদ বিষম,
 —যখনি মোরা স্মরণ করি ।
 আর যে মানব, গাহি এই স্তব,
 তুধিবে তোমা, বিমলাননে !
 হকৃ বৃদ্ধি তার ধন দারা আর
 সম্পদ, ঋদ্ধি-বিতব-সনে ;
 আর মা অধিকে ! তুমি আমাদিগে,
 রহ প্রসন্ন সকল ক্ষণে ।"

দেবী "তাহাই হ'উক" বলিয়া অস্তুর্হিতা হইলেন । ইহাই চণ্ডীর
 দ্বিতীয় উপাখ্যান ।

• "দেব-দেহ হতে সজ্জতা যেমতে
 দেবী—ত্রিলোক-হিত-কারিণী ।"

তাহাই এই দ্বিতীয় উপাখ্যানে দেখান হইয়াছে—অর্থাৎ দেব-
গণের শক্তি যে এক, এই কথাই এস্থলে উপাখ্যান-ছলে বঝান
হইয়াছে ।

চণ্ডীর তৃতীয় উপাখ্যান—শুস্ত-নিশুস্ত-বধ । এই উপাখ্যানেও
চণ্ডীর বিশেষ আবির্ভাবের কারণ দেখান হইয়াছে ;—

“করিতে নিধন ছুষ্ট দৈত্যগণ,

আর নিশুস্ত - শুস্ত হুজন—

করিতে সাধন লোক-সংরক্ষণ,

আর দেবতা-হিত-কারণ,—

যেৰূপে আবার সম্ভব তাঁহার

—গৌরী-আকার করি ধারণ।”

এই আখ্যানে তাহাই বিবৃত হইয়াছে । এবারেও শুস্ত-নিশুস্ত
দুই অসুর ইন্দ্রাদি দেবগণের প্রভুত্ব কাড়িয়া লইয়াছিল । তখন—

“ত্রিদিব-তাড়িত অধিকার-চ্যুত

করিলে সে ছই অসুরে,

সর্ব সুরগণ করিলা স্মরণ

অপরাজিতা সে দেবীরে ।”

সে সময়ে দেবতাদের মনে পড়িল—

“দিয়াছিল তিন বর আমাসবে—

‘আপদে স্মরিবে যখনি,

তখনি নাশিব তোমাদের সব

বিষম বিপদ আপনি ।”

তাই দেবতা সকলে হিমালয়-শিখরে গমন করিয়া, সেই

বিষ্ণুমায়া দেবীর স্তব করিতে আরম্ভ করিলেন। দেবী তখন হিমাচল-কুণ্ডা পার্শ্বতী-রূপে হিমালয়ে বাস করিতেছিলেন। যখন অমর-মণ্ডলী স্তব করিতেছিলেন ;

“তখন স্নানেতে জাহ্নবী-জলেতে
যেতেছিল দেবী পার্শ্বতী।”

সেই পার্শ্বতী-রূপে দেবী দেবতাদের সেই স্তব বুঝিতে পারিলেন না ;—কেন না, তখন ঐহার সেই মূর্ত্তি সাধারণ নারী-মূর্ত্তি। তিনি জিজ্ঞাসা করিলেন—

“কর স্তুতি সবে কাহারে ?”

কিন্তু এই কথা বলিতে বলিতে—

“তঁার দেহ-কোষ হইতে সম্ভবি,
দেবী ‘শিবা’ তবে উদ্ভবে।”

এইরূপে পার্শ্বতীর দেহ-কোষ হইতে দেবী ‘শিবা’ আবির্ভূত হইলেন। প্রতি জীবের অন্তরেই দেবী বিরাজিতা। সকল জীবই ব্রহ্ম। কিন্তু তিনি জীবরূপে পঞ্চ-কোষে আবৃত। সেই আবরণ দূর করিতে পারিলে—সেই কোষ মধ্যে প্রবেশ করিতে পারিলে, প্রত্যেক জীব-অন্তরেই আমরা সেই ব্রহ্মময়ী দেবীকে দেখিতে পাই। যাহা হউক, এস্থলে পার্শ্বতীর দেহ-কোষ হইতে, দেবীর বিশেষ আবির্ভাব হইয়াছিল। এইজন্য এই শিবা—দেবী অম্বিকা—‘কৌষিকী’ নামে আখ্যাতা হইয়াছিলেন। ইহাই ‘গৌরী-আকার করি ধারণ’ দেবীর উদ্ভব। যখন পার্শ্বতীর দেহ-কোষ হইতে এইরূপে কৌষিকীর আবির্ভাব হইল, তখন পার্শ্বতী কালী হইয়া গেলেন।

“তাহার উদ্ভবে— সে দেবী পার্শ্বতী
 হলেন তামস্ - বরণী ;
 তাই সে ‘কালিকা’ নামেতে আখ্যাতা
 —হলেন হিমাদ্রি - বাসিনী।”

তাহার পর, ‘অতি মনোহর অপরূপ-রূপ-ধারিণী’ অষ্টিকাকে
 শুভ-নিশ্চয়ের কিঙ্কর চণ্ড-মুণ্ড দেখিতে পাইল। তাহারা গিয়া,
 দৈত্যেশ্বর শুভকে সেই অদ্ভুত রূপবতী রমণীর কথা নিবেদন
 করিল।—

“বাথানিলা তারা শুভ দৈতা-নাথে —
 ‘রয়েছে কে এক রমণী !
 উজ্জলি হিমাদ্রি, ওহে মহারাজ !
 অতীব মানস - মোহিনী !
 এমন সুন্দর রূপ মনোহর
 কেহ কভু কোথা দেখেনি !

* * *

দীপ্তি-দিশ্মণ্ডল লাবণ্য-ছটায়
 স্ত্রী-রত্ন সে চারু-অঙ্গিনী,
 রহেছে নেহার, ওহে দৈত্যেশ্বর !
 —নেহারিতে যোগ্য আপনি !
 একপে দৈত্যোক্ত ! রত্ন-রাজি যত
 করেছ সংগ্রহ আপনি ;
 কেন না গ্রহণ কর তবে এই
 রমণী - রতন কল্যাণী ?”

এই কথা শুনিয়া, দৈত্যপতি শুভ্র সূগ্রীবকে দূত করিয়া
অশ্বিকারু নিকট পাঠাইয়া দিলেন ; বলিলেন—

“যাহে প্রীতি-ভরে আসে সে রমণী,
—করহ তা’তুমি অচিরে।”

তখন সূগ্রীব গিয়া, দেবীকে দৈত্যপতি শুভ্রের কথা জানাইল।
দেবী শুভ্র-বাক্য শ্রবণ করিয়া বলিলেন যে, তিনি না বুঝিয়া পূর্বে
এই প্রতিজ্ঞা করিয়াছেন—

“যে করিবে চূর্ণ বল দর্প মম,
—যে মোরে জিনিষে সমরে,
জগতে যে মোর বলে তুল্য বলী,
—বরিব পতিত্বে তাহারে।”

সুতরাং দৈত্যেশ্বর শুভ্র তাঁহাকে রণে জয় করিয়া পাণি-গ্রহণ
করুন,—সূগ্রীবের নিকটে এই কথা শুনিয়া, শুভ্রের ক্রোধ
হইল। তখন তিনি সেনাধ্যক্ষ ধুম্রলোচনকে আদেশ করিলেন—

“ত্বরা তুমি, হে ধুম্রলোচন !
বেষ্টিত হইয়া সৈন্তগণ,
কেশ আকর্ষিয়ে বিহ্বল করিয়ে
কর হৃষ্টে বলে আনয়ন।”

ধুম্রলোচন শুভ্র-আজ্ঞা পাইয়া, ষাইট হাজার সৈন্ত লইয়া
দেবীকে ধরিয়া আনিতে গেল। কিন্তু শেষে—

“যেন হৃহঙ্কারে, সে অশ্বিকা তারে,
ভস্মীভূত করিলা ‘তখন।’”

আর দেবীর বাহন সিংহ—

“নিমেষ-মাঝারে নিঃশেষিত করে

সমুদয় সেই সেনাগণ ।”

শুভ্র সে সংবাদ পাইয়া অপর ছই সেনানী চণ্ড ও মুণ্ডকে পাঠাইলেন । চণ্ড-মুণ্ড সসৈন্তে যাইয়া দেবীকে আক্রমণ করিল । তখন দেবী অশ্বিকার মহা ক্রোধ জন্মিল ।—ক্রোধে তাঁহার বদন মসীবর্ণ হইয়া গেল । এবং—

“ক্রকুটি কুটিল আর ললাট-ফলক তাঁর

হইতে তখনি,

রূপাণ-পাশ-ধারিণী, বাহিরিলা কালী যিনি

করাল বদনী ।”

এইরূপে অশ্বিকার ললাট হইতে কালীর আবির্ভাব হইল । পূর্বে পার্বতীর দেহ-কোষ হইতে অশ্বিকা নিজ্জাস্তা হইলে, পার্বতী কালী হইয়া গিয়া—কালিকা নামে হিমালয়ে অবস্থিতি করিতে ছিলেন । এক্ষণে অশ্বিকার দেহ হইতে আর এক কালী নিজ্জাস্তা হইলেন । এই কালীই চণ্ড-মুণ্ডের সহিত ঘোর যুদ্ধ করিলেন ; সমুদয় সেনাবল ধ্বংস করিয়া, পরে চণ্ড-মুণ্ডের শিরচ্ছেদ করিলেন । এবং সেই চণ্ড-মুণ্ডের ছিন্ন শিরলইয়া গিয়া, দেবী অশ্বিকাকে উপহার দিলেন ।—

“কালিকা তখন তাঁরে, ঘোর আট্টহাস্ত-ভরে,

কহিলা বচন ;—

এই মহাপশু ছই— চণ্ড-মুণ্ডে আমি হৃদিই,

তোমা উপহার

এই যুদ্ধ-যজ্ঞ তরে, নিজে শুভ্র-নিশুভ্ররে

করহ সংহার ।”

দেবী কালিকারে কহিলেন—

“চণ্ড-মুণ্ড-মুণ্ড লয়ে, আমার নিকটে ধয়ে
আইলা যখন,
হে দেবি! এ ত্রিভুবনে, হবে গো চামুণ্ডা নামে,
খ্যাত এ কারণ।”

এদিকে চণ্ড-মুণ্ড সসৈন্তে নিহত হইয়াছে গুনিয়া, শুভ্র ও
নিশুভ্র সমবেত সেনাবল ও সেনাপতিগণ সঙ্গে লইয়া যুদ্ধ করিতে
আসিলেন। গুস্তের সেনা অসংখ্য। কিন্তু অতৃদিকে একা
দেবী অম্বিকা, আর তাঁহার দেহ-সম্ভূক্তা চামুণ্ডা;—আর একমাত্র
সহায় সেই বাহন সিংহ। এমন সময়—

“হেন অবসরে দেব-হিত-তরে
করিতে দেবারি-দৈত্যা-নিধন,
বিষ্ণু-গুহ-ভব বিরিকি-বাসব
—সে সব দেবতা-শক্তিগণ,
তাঁদের শরীর হইতে বাহির
সম্বিত বীর্ঘ্য-বলে তখন—
নিজ নিজ রূপে চণ্ডীকা-সমীপে,
আইলা ধাইয়া, ওহে রাজন!
যে দেবের রূপ হয় যেইরূপ
ভূষণ-বাহন যেরূপ যার
সে দেব-শক্তি যুঝিতে অরাতি
আইলা ধরিয়া সে রূপ তাঁর।”

এইরূপে ব্রহ্মাণী, মাহেশ্বরী, কৌমারী, বৈষ্ণবী, বারাহী,

নারসিংহী, ঐশ্বরী—এই সমস্ত দেব-শক্তি পরিবৃত্ত হইয়া স্বয়ং শঙ্কর সেখানে উপস্থিত হইলেন ; এবং অধিকাকে কহিলেন, আমার প্রীতির জন্ত এই সকল অসুর নাশ কর । তখন দেবীর দেহ হইতে অতি ভয়ঙ্করী চণ্ডীকা-শক্তি নিজ্জাস্তা হইল । ইনি সেই সময়ে শিবকে দূত করিয়া দৈত্যরাজ শুস্তের নিকট পাঠাইয়া ছিলেন বলিয়া, ইহার নাম হইল ‘শিবদূতী’ । উক্ত সাত দেব-শক্তি, আর এই চণ্ডীকা-শক্তি শিবদূতী, এই আট শক্তিই—আমাদের অষ্ট-মাতৃকা । এই মাতৃকাগণের সহিত অসুর-সৈন্তের ঘোরতর সমর বাঁধিল । অসুর সৈন্ত দলে দলে বিনষ্ট হইতে লাগিল । তখন—

“ক্রুদ্ধ মাতৃগণ, এক্ষেপে মছন,
করে নানা মতে অসুর-দল ;
তা’ দেখি তখন, করে পলায়ন,
যতেক দানব-সৈনিক-বল ।
পলায়ন-রত, হয়ে বিমদ্বিত
মাতৃগণ-করে দানব সব,
হেরি ক্রোধভরে, আইল সমরে,
রক্তবীজ নামে মহা দানব ।”

রক্তবীজ বড় হৃদ্যস্ত ভয়ঙ্কর—অসুর । সে বড় মায়াবী । তাহার এক বিন্দু রক্ত মাটিতে পড়িলে, তখনই অমনই তাহার সদৃশ আর এক রক্তবীজ উৎপন্ন হয় । সুতরাং মাতৃগণ কিছুতেই এই মায়াবী মহাসুরকে পরাস্ত করিতে পারিলেন না । তখন—

“সেই সুরগণ, বিষাদে মগন,
হেরিয়া চণ্ডীকা স্বরা তখন,

কহিলেন পরে সেই কালিকারে,

‘চামুণ্ডে! বদন কর ব্যাদান ।

মম শত্রু-পাত- প্রহার-সঞ্জাত

রক্ত-বিন্দু - জাত অসুরগণে—

রক্ত-বিন্দু সহ, গ্রহণ করহ,

হুয়া বেগভরে তুমি বদনে ।”

এইরূপে অধিকা—চামুণ্ডা উভয়ে মিলিত হইয়া, রক্তবীজকে নিহত করিলেন ।

তখন স্বয়ং গুপ্ত ও নিগুপ্ত যুদ্ধ করিতে আসিলেন । মাতৃগণ, অধিকা ও চামুণ্ডার সহিত তাহাদের যুদ্ধ আরম্ভ হইল । সে অতি ভয়ঙ্কর যুদ্ধ ! মূল চণ্ডী না পড়িলে তাহা বুঝা যায় না । সে যুদ্ধের বর্ণনা পড়িয়াই প্রাণে ভয়ের লক্ষণ হয় ;— সে যুদ্ধ যেন প্রত্যক্ষ দেখিতেছি বলিয়া বোধ হয় । বর্ণনা এত চমৎকার ! কখন গুপ্ত অতি উচ্চ আট হাত বাহির করিয়া, রথে চড়িয়া যুঝিতে লাগিল—

“অতুলিত—অতি উচ্চ অষ্টভুজে

—দিব্য অস্ত্রধারী,

ব্যাপিয়া তখন অসীম গগন,

সে দৈত্য শোভিত ছিল রথোপরি ।”

কখন বা দশ সহস্র বাহু বিস্তার করিয়া যুদ্ধ করিল—

“প্রসারি অবুত ভুজ দৈত্যপতি

—গুপ্ত দিতি - স্ত,

তবে পুনরায়, দেবী চণ্ডীকায়,

চক্র প্রহরণে করিল আবৃত ।”

আর কতরূপে কত যে বাণ বর্ষণ হইল—তাহার সংখ্যা হয় না ।
যাহা হউক, শেষে নিশ্চিন্ত হত হইল । শুষ্কের বহু সৈন্ত বিনষ্ট
হইল ।

এবার দৈত্যপতি শুষ্ক একা হতাবশেষ সৈন্ত লইয়া, যুদ্ধ করিতে
আসিল । এবং অতি ক্রোধান্বিত হইয়া অধিকাকে কহিল—

“কর পরিহার, হুর্গে ! অহঙ্কার,
—হুঁটা তুমি বল-অভিमानে ;
লইয়া আশ্রয়, অস্ত শক্তি-চর,
যুঝিছ যে তুমি অতি মানে !”

তাহার উত্তরে দেবী কহিলেন—

দ্বিতীয়া অপর, কে আছে আমার ?
স্বধু একা আমি এ জগতে ;
এ সব শক্তি, আমারি বিভূতি,
হের, হুঁট, পশিছে আমাতে ।”

তখন মহা অদ্ভুত ব্যাপার ঘটিল ! অষ্ট-মাতৃকা, ও চানুণ্ডা,
সকলেই সেই দেবী অধিকার শরীরে প্রবেশ করিলেন—

“হইলা বিলস, সেই সমুদয়
ব্রহ্মাণী-প্রমুখ দেবী যত—
সেই দেবী-দেহে ;— একমাত্র তাহে
অধিকা রহিলা বিরাজিত ।”

তখন দেবী বলিলেন—

“বিভূতি বিস্তারি, বহু মূর্তি ধরি
ছিন্ন রণে,—স্থির হও তুমি ;—

সে রূপ আমার করিয়া সংহার
রহি রণে—এবে একাকিনী।”

তাহার পর দেবীর সহিত গুপ্তের ভয়ঙ্কর অদ্ভুত সমর আরম্ভ হইল। কখন ভূমি-তলে—কখন আকাশ-মার্গে—দ্বন্দ্ব-যুদ্ধ হইতে লাগিল। শেষে দেবী শূলে বিদ্ধ করিয়া গুপ্তের বিনাশ সাধনে করিলেন। তখন—

“হলে বিনাশিত হুঙ্কারি সে দৈত্য,
সুনির্মল হইল পগণ;
হইল প্রসন্ন নিখিল ভুবন,
—মহাশাস্তি লভিল তখন।
নিধনে তাহার, যেই বারিধর,
ছিল উদা-উৎপাত-শঙ্কিত—
হল শাস্ত-ভাব; প্রবাহিনী সব,
পূর্ব-পথে হল প্রবাহিত।

* * * *

হরে অক্ষুণ্ণ বহিল অনিল,
প্রকাশিল সুপ্রভা তপন,
করিয়া ধনিত শাস্ত দিক ঘত
—প্রশান্ত জলিল হতাশন।”

গুপ্ত হত হইলে, দেবগণ তুষ্ট হইয়া দেবী কাভ্যায়নীর স্তব করিলেন। তাহাতে দেবী তুষ্টা হইয়া বর দিতে চাহিলে, দেবগণ প্রার্থনা করিলেন—

“হে অধিলেশ্বরি! মাতঃ! ত্রিলোকের বাধা যত

—ধাহে প্রশমিত,

যেই কশ্বে হয় হত মোদের অরাতি যত

—কর তা’ সাবিত।”

তখন ভবিষ্যতে দেবী কোন্ কোন্ সময়ে আবির্ভূত হইবেন, তাহা বলিয়া দিলেন। বৈবস্বত-মহাস্তরে অষ্টবিংশ যুগে, অন্ন রূপ ধারণ করিয়া শুভ্র-নিশুভ্র-দৈত্য জন্ম গ্রহণ করিবে। দেবী নন্দ-গোপ-গৃহে যশোদা-গর্ভে সম্ভূতা হইয়া, তাহাদিগকে সংহার করিবেন, ও বিদ্যাচল-বাসিনী হইবেন। এই শুভ্র ও কংস এক কিনা, তাহা বলা যায় না। এইরূপে তিনি ‘বৈপ্র-চিত্ত’ দানব বধ করিয়া ‘রক্তদম্ভা’ নামে আখ্যাত হইবেন; শত বর্ষের অনারুষ্টি ও হুর্ভিক্ষ দূর করিয়া, ‘শতাক্ষী’ ও ‘শাকস্তুরী’ নামে অভিহিত হইবেন; ‘দুর্গ’ অসুরকে সংহার করিয়া ‘দুর্গা’ নামে বিখ্যাত হইবেন; এবং অন্ন দানবগণকে বধ করিয়া ‘ভীমা’ ও ‘ভ্রামরী’ নামে কীর্তিত হইবেন। দেবী আরও আশ্বাস দিলেন—

“ত্রিলোক-মঙ্গল-তরে, আমি সে মহা অস্তুরে
করিব সংহার;

* * *

বিষ যত দৈত্য হ’তে উপজিবে হেন মতে
—যথনি যথনি।

সেইকালে অবতরি, করিব সংহার তরি
—তথনি তথনি।”

তাহার পর চণ্ডিকা এই "চণ্ডী-মাহাত্ম্য" কীর্তন করিয়া
অন্তর্হিত হইলেন। তখন দেবগণও নিশ্চিন্ত হইলেন।

এই উপাখ্যান শেষ করিয়া মেধস ঋষি বলিলেন—

“আর সেই দেবী ভগবতী
হ’লে নিত্যা তিনি তবু হে রাজন্ !

পুনঃ পুনঃ হয়ে আবির্ভূত,
জগত্-সংসার করে পালন।”

মেধস ঋষি আরও বলিলেন—

“এই অতি শ্রেষ্ঠ দেবীর মাহাত্ম্য,
করিমু কীর্তন তোমা, হে রাজন্ !

যে প্রভাবময়ী হন সেই দেবী,
যাঁহা হতে হয় এ বিশ্ব - ধারণ ;

বিষ্ণু ভগবান্ - মায়া তিনি হন,
তাঁহা হতে লাভ হয় তবু - জ্ঞান।

তুমি, এই বৈশ্ব, কিম্বা জ্ঞানী যত,
অথবা অপর যে আছে যেথায়,

আছ এবে মুগ্ধ, আছিলে মোহিত,
পাইবেও মোহ তাঁ’হতে নিশ্চয়।”

মেধস-ঋষি-বর্ণিত এই সকল উপাখ্যান হইতে, সুরথ ও সমাধি
দেবীর মাহাত্ম্য বুঝিলেন। তখন তাঁহারা ষথারীতি দেবীর পূজা
আরম্ভ করিলেন। তিন বৎসর গত হইলে, দেবী জগদ্ধাত্রী
প্রসন্ন হইয়া, তাঁহাদিগকে দেখা দিলেন, ও অভিলষিত বর প্রদান
করিলেন। দেবীর বর-প্রভাবে, সুরথ নৃপতি হত-রাজ্য পুনঃ

প্রাপ্ত হইলেন, ও পরজন্মে বৈবস্বত মনু হইলেন। আর বৈশ্ব সমাধি জ্ঞানলাভ করিয়া ক্রমে মুক্তি-লাভ করিলেন। ইহাই চণ্ডী-গ্রন্থের উপাখ্যান।

এই উপাখ্যান হইতে আমরা বুঝিলাম যে, যখনই অমৃতের প্রার্থনা হয়, দানবোখিত বাধা উপস্থিত হয়—তখনই দেবীর আবির্ভাব হয়। তিনি অরি-কুল ক্ষয় করেন। সুধু তাহাই নহে।—এই আবির্ভাবের বিবরণ হইতে, আমরা দেবীর স্বরূপ কতক বুঝিতে পারি। তিনি একা অদ্বিতীয়া। তাঁহার আর দ্বিতীয় কেহ নাই। তবে তিনি কখন তামস্ শক্তি-রূপে পরম-পুরুষকে অভিভূত করিয়া, প্রলয়ে অখিল জগৎ আপনাতে বিলীন করিয়া রাখেন; আবার কখন শক্তিমান পরম-পুরুষ হইতে পৃথক্ হইয়া কার্য্য করেন; কখন বা নানা দেবতার শক্তি-রূপে বিভক্ত ভাবে—নানা রূপে প্রতীয়মান হন। কিন্তু বাস্তবিক সে সকল দেব-শক্তি তাঁহারই বিভিন্ন বিকাশ মাত্র। মহিষাসুর-বধ উপাখ্যানে আমরা দেখিয়াছি—সৰ্ব-দেবশক্তি সমবেত হইয়া তাঁহার আবির্ভাব হয়। আর শুভ-নিশুভ-বধে দেখিলাম—তিনি পার্কর্তী-রূপে হিমাচলে বাস করিতেছিলেন। তাঁহারই দেহকোষ হইতে অপরূপ নারী-মূর্তির আবির্ভাব হইলে—পার্কর্তী ‘কালিকা’ হইলেন। আবার সেই অপরূপ নারী-দেহ হইতে ভয়ঙ্করী চামুণ্ডার আবির্ভাব হইল। তাহার পর দেখিলাম—মাতৃ রূপিণী দেব-শক্তিগণ তাঁহার সহায়-রূপে কার্য্য করিতেছেন। আবার তাহার পরে, তাঁহারা চণ্ডীকারই সঙ্গে বিলীন হইয়া, তাঁহার সহিত একীভূত হইয়া যাইতেছেন। একই শক্তি কেমন করিয়া ‘বহু’ হইতেছেন—

কেমন করিয়া আবার সেই বহু 'এক' হইয়া যাইতেছেন,—এই মহাশক্তি-তত্ত্ব—চণ্ডীর এই সকল উপাখ্যানে বর্ণিত আছে। যে মহাশক্তি এই জগৎ-রূপে প্রকাশিত—যিনি জগতকে আধার-স্বরূপে ধরিয়া আছেন, সেই মহাশক্তির মহাবিকাশ আমরা এইরূপে কিঞ্চিৎ জানিতে পারি।

সে যাহা হউক, এই সকল উপাখ্যানে আরও গূঢ় তত্ত্ব নিহিত আছে। ইহা বলা যাইতে পারে যে এই সকল উপাখ্যানে, রূপক-ছলে অনেক সত্য বুদ্ধান আছে। অবশ্য যাহারা বিশ্বাসবান হিন্দু, তাঁহারা এই রূপকের কথা বিশ্বাস করিবেন না। তাঁহাদের মতে চণ্ডী প্রতি অক্ষরে অক্ষরে সত্য—ইহাতে সত্য ঘটনাই বিবৃত হইয়াছে। তাঁহাদের মতে চণ্ডীতে কোথাও রূপক নাই। তাঁহারা মনে করেন, দেবাসুর-যুদ্ধ যথার্থ ঘটনা। এ সম্বন্ধে আমরা এই বলিতে পারি যে, এইরূপ দেবাসুর-সংগ্রাম প্রায় সকল ধর্ম্মই বিবৃত আছে। বেদে দেবাসুর-যুদ্ধের কথা আছে। পুরাণের ত কথাই নাই। পারসীদের জেন্দা অবস্তায় এই দেবাসুরের কথা আছে। ইহুদী, খ্রীষ্টান বা মুসলমান—সকলেই দেবদূতগণের সহিত শয়তানের যুদ্ধ স্বীকার করেন। যাহারা মনে করেন, এই সকল উপাখ্যান রূপক মাত্র,—তাঁহারা অল্প রূপে এই সকল উপাখ্যান ব্যাখ্যা করেন। তদনুসারে চণ্ডীর সৃষ্টি ব্যাখ্যা মূলক প্রথম উপাখ্যান ছাড়িয়া দিয়া, শেষ দুই উপাখ্যানের তিন প্রকার অর্থ হইতে পারে—ঐতিহাসিক, বৈজ্ঞানিক ও আধ্যাত্মিক।

ঐতিহাসিক ব্যাখ্যা এই যে, অসভ্য অবস্থায় মানবকে বস্তুজগতের সহিত সংগ্রাম করিতে হইত। তখন অধিকাংশ স্থানে ঘোর অর-

গ্যানী পরিব্যাপ্ত ছিল। চারিদিক হিংস্র জন্তুর আবাসভূমি ছিল। সেই কালে মনুষ্যকে বন্যজন্তুর সহিত সংগ্রাম করিয়া অগ্রসর হইতে হইত। তাহার পর মানুষ যখন অপেক্ষাকৃত সভ্য হইল, তখন অসভ্য বন্যজাতির সহিত সংগ্রাম করিতে হইত। বিবর্তন-নিয়মে জগতের উন্নতি-কল্পে, এইরূপ সংগ্রাম করিয়াই মানুষকে ক্রমে ক্রমে অগ্রসর হইতে হইয়াছে। আর সমগ্র মানবজাতি সম্বন্ধে যে কথা—আর্য্যজাতি সম্বন্ধেও সেই কথা। আর্য্যজাতিও এইরূপ সংগ্রাম করিয়া তবে তাঁহাদের অধিকার বিস্তার করিয়াছিলেন,—এ কথা আধুনিক পণ্ডিতগণও বিশ্বাস করেন। চণ্ডীর এই শেষ দুই উপাখ্যান—সেই সংগ্রামের ইতিহাস হইতে পারে। মহিষা-সুরের সেনানীগণের নাম হইতে, কতকটা এই অনুমান সম্ভব বলিয়া বোধ হয়।

বৈজ্ঞানিক ব্যাখ্যা এই যে, জগতে আমরা দুইটি বিপরীত শক্তির ক্রিয়া বরাবর দেখিতে পাই। একটি তামসিক, আর একটি সাত্ত্বিক। একটির পরিণাম অবনতি, আর একটির পরিণাম উন্নতি। একটিতে জড়ত্বের বৃদ্ধি করে, অপরটিতে জীবত্বের বিকাশ করে। জগতের যত ক্রমোন্নতি হয়, তত জড়-শক্তি সঙ্কুচিত হয়—জৈব-শক্তি প্রসারিত হয়। ইহার ফলে জীবের ক্রমোন্নতি হয়। এই পৃথিবী জীব সৃষ্টির উপযোগী হইলে, প্রথমে নিম্নতর জীব মৎস্তাদির সৃষ্টি হয়—পরে সরীসৃপাদির বিকাশ হয়। পৃথিবীতে মনুষ্যের আবির্ভাবের পূর্বে, ভীষণ বন্য পশুদিগের বিশেষ প্রাচুর্য্য ছিল। সেই সকল পশুজাতির কতকটা উচ্ছেদ হইয়া, মানব জাতির উন্নতি আরম্ভ হইয়াছে। তাহার পর, অসভ্য

মানুষের বা নরাকৃতি পশুর ক্রমোন্নতিতে, সভ্য মানুষের অধিকার বিস্তার হইয়াছে। সুতরাং আমরা মনে করিতে পারি যে, চণ্ডীর এই দুই উপাখ্যানে এই বৈজ্ঞানিক তত্ত্বের আভাষ দেওয়া আছে মহিষাসুর-বধ উপাখ্যানে, বনু হিংস্র পশুদের, অথবা পাশব-শক্তির অভিভবের কথা বর্ণিত হইয়াছে। সেইরূপ শুভ-নিশুভ-বধ উপাখ্যানে, অসভ্য মানবজাতির রাক্ষস-শক্তিকে অভিভূত করিয়া, মানবের দেব-শক্তির বিকাশ বর্ণিত হইয়াছে।

আধ্যাত্মিক ব্যাখ্যা সম্বন্ধে অধিক কথা বলিবার আবশ্যক নাই। মানবগণ সাধারণতঃ দুই শ্রেণীতে বিভক্ত—আসুর ও দেব। মানব-প্রকৃতি দুইরূপ—আসুর ও দৈব। একথা গীতায় পাওয়া যায়। প্রত্যেক মানবের অন্তরে, এই দৈব ও আসুর প্রকৃতির সংগ্রাম চলে। প্রথম অবস্থায় মানব আসুর-প্রকৃতি-সম্পন্ন থাকে; ক্রমে ক্রমে মানবে দৈব-প্রকৃতির বিকাশ হয়। ক্রমে দৈব-প্রকৃতির পরিণতি হইতে থাকে—আসুর প্রকৃতির সঙ্কীর্ণ হইয়া আসে। ক্রমে দৈব-প্রকৃতির পূর্ণ বিকাশ হয়। যে পর্য্যন্ত তাহা না হয়, সে পর্য্যন্ত মানব-অন্তরে সৰ্ব্বদা এই দৈব ও আসুর প্রকৃতির মধ্যে সংগ্রাম চলিতে থাকে। আসুর-প্রকৃতি দুই প্রকার;—তামসিক ও রাজসিক। তামসিক প্রকৃতি—পশু-প্রকৃতি। প্রথমে মানবের মনে, এই পশু-ভাবের বিশেষ বিকাশ থাকে। আর রাজসিক প্রকৃতি—সৰ্কগ্রাসী রাক্ষস-প্রকৃতি। গীতায় ইহার বর্ণনা আছে। অতএব ইহা বলা যাইতে পারে যে, মহিষাসুর-যুদ্ধ—এই পাশব-প্রকৃতির সহিত মানবের দেব-প্রকৃতির আসুরিক যুদ্ধ। আর শুভ-নিশুভের যুদ্ধ—মানবের রাক্ষস-

প্রকৃতির সহিত দেব-প্রকৃতির এই যুদ্ধ। এই যুদ্ধে মানবের কোন হাত নাই—কোন স্বাধীনতা নাই। প্রকৃতির নিয়মে স্বভাবতই এই সংগ্রাম চলিতে থাকে। তাহার ফলে, জীবের আপূরণ বা ক্রমোন্নতি হয়। আমরা চণ্ডীতে দেখিতে পাই—এই দেবী চণ্ডীই প্রকৃতি-রূপে আমাদের অন্তরে অবস্থিতা ; তিনিই আমাদের নিয়মিত করেন,—আমাদের স্বাধীনতা বা জ্ঞান কিছুই নাই। সুতরাং প্রকৃতি-রূপে তিনিই আমাদের অন্তরে এই সংগ্রাম করিতে থাকেন। চণ্ডীতেই আছে—তিনিই দেব-শক্তি, আর তিনিই অন্নদিকে অম্লর-শক্তি-রূপে বিকাশিতা। তিনি ব্যতীত আর অন্ন শক্তি নাই। সুতরাং আমাদের অন্তরে, তিনিই আপনার সহিত আপনি সংগ্রাম করেন,—আমাদের আপূরণ করেন—আমাদিগকে উন্নত করেন—মুক্তির পথে লইয়া যান।

এইরূপে অনুমান করা যাইতে পারে যে, চণ্ডীর এই দুই উপাখ্যানের এই আধ্যাত্মিক ব্যাখ্যা সঙ্গত। আর জগৎ সম্বন্ধে যে কথা, আমাদের দেহ সম্বন্ধেও তা সেই কথা। ব্রহ্মাণ্ডের ও ভাণ্ডের একই নিয়ম। উভয়ের একই উপাদান—একই পরিণাম। Macrocosm ও Microcosm তত্ত্ব একই। এই জ্ঞান এক বিজ্ঞানেই সৰ্ব বিজ্ঞান লাভ হয়। এই মহান্ সত্য শ্রুতিতে বার বার উল্লিখিত হইয়াছে। এইজ্ঞান তত্ত্বে—দেহ মধ্যে সূর্য্য চন্দ্র প্রভৃতির জগতের সকল পদার্থ ধারণা করিবার বিধান আছে। আর এইজ্ঞানই রামায়ণ, মহাভারত, গীতা—সৰ্বত্রই দেখিতেছি, প্রথম সহজ ঐতিহাসিক অর্থ ছাড়িয়া—এক্কেণে আধ্যাত্মিক ব্যাখ্যার চেষ্টা হইতেছে। অনেক স্থলে সে অর্থ সঙ্গতও হইয়া থাকে।

সে যাহা হউক, এই সকল উপাখ্যান হইতে চণ্ডীর উল্লিখিত তত্ত্ব যতদূর আমরা বুঝিতে পারি—তাহা এস্থলে সংক্ষেপে উল্লিখিত হইল। কিন্তু চণ্ডী-উক্ত শক্তি-তত্ত্ব—চণ্ডীর অন্তর্গত চারিটি স্তোত্রেই বিশেষরূপে বিবৃত আছে। চণ্ডীতে যে চণ্ডী-মাহাত্ম্য কীর্তিত হইয়াছে, এই কয়টি স্তোত্র হইতেই সেই মাহাত্ম্য বিশেষ রূপে বুঝা যায়। সুতরাং এস্থলে সংক্ষেপে এই সকল স্তোত্রের কথা উল্লেখ করিতে হইবে।

আমরা চণ্ডীর প্রথমেই দেখিয়াছি যে, মেঘস ঋষি চণ্ডী-মাহাত্ম্য বুঝাইবার পূর্বে বলিয়াছেন যে, সকল প্রাণী—

* * *
 “মমতার ঘোরে
 মোহের গহ্বরে পশে ;
 সংসার-স্থিতির কারণ যে জন,
 —তীরি মহামায়া বশে।”

আরও বলিয়াছেন—

* * *
 “জগতের পতি হরি,—
 তীরি যোগ-নিদ্রা— এই মহামায়া
 রাখে বিশ্ব মুক্ত করি।
 তিনিই নিশ্চয় দেবী ভগবতী,
 তিনি মহামায়া হন।”

সুধু তাহাই নহে—

“তী” হতে প্রসব এ বিশ্ব জগত্।”

* * *

এই মহামায়া—

“নিত্যা হন তিনি, জগত্-রূপিণী,
 তাঁহে ব্যাপ্ত এই সব।”

মেধস ঋষি এইরূপে এই মহামায়ার স্বরূপ বুঝাইয়াছেন।
 তাহার পর হরিকে জাগরিত করিবার জন্ত, ব্রহ্মা এই মহামায়ার
 যে স্তব করেন, তাহা হইতে দেবীর স্বরূপ আমরা আরও স্পষ্ট
 বুঝিতে পারি। ব্রহ্মা স্তব করিয়াছিলেন—

“তুমি মজ্জ স্বাহা, স্বধা, বসট্কার ;
 তুমি নিত্যা স্বর-রূপে ;

* * *
 তুমিই সকল করহ ধারণ,
 এ বিশ্ব কর সৃজন ;
 তুমি সদা, দেবি ! করহ পালন,
 অস্তিম্বে কর ভক্ষণ।
 হও সৃষ্টি-কালে সৃষ্টি-রূপা তুমি,
 পালনে স্থিতি - রূপিণী ;
 তুমি, জগন্ময়ি ! অস্তে জগতের
 হও সংহার - কারিণী।
 তুমি মহামায়া, হও মহাবিদ্যা,
 মহামেধা, মহামুতি ;
 হও মহামোহ দেব-অন্থয়ের
 তুমি সমষ্টি - শক্তি।

হও সবাকার তুমিই শ্রুতি
 —ত্রিগুণ - বিকাশ - কারী ;
 তুমি কালরাত্রি, মহারাত্রি তুমি,
 —দারুণ মোহ - শরীরী ।

* * *

বিশ্ব-আত্মা তুমি,— বস্তু সদসত্
 যাহা কিছু আছে সব,
 সেই সবাকার শক্তি তুমি হও,
 —কি আর কল্পিব স্তব !

* * *

করি তোমা হতে শরীর গ্রহণ,
 আমি, বিষ্ণু আর ভব ।”

তাহার পর দ্বিতীয় স্তব । মহিষাসুর বধ হইলে, দেবগণ এই স্তব
 করিয়াছিলেন । আমরা এই স্তবের স্থান-বিশেষ উদ্ধৃত করিব—

“নিজ শক্তি - বলে যিনি ব্যাপ্ত এ জগতে,
 সৃষ্টি ধার সর্ব - দেব - শক্তি - সমষ্টিতে,

* * * *

* * * *

যিনি লক্ষ্মী - রূপা নিজে পুণ্যাত্মা ভবনে,
 থাকেন অলক্ষ্মী - রূপে পাপাত্মা - সদনে,

বিদ্বান্—সাধু-রুদরে বুদ্ধি—শ্রদ্ধা-রূপা হয়ে,
 নিবসেন লজ্জা - রূপে সুকলজ - জনে ।

* * * *

সৰ্ব-বিশ্ব-হেতু তুমি ; দোষের কারণ—
হরি-হর আদি কেহ না জানে কখন!

অপার, ত্রিগুণাধার, আশ্রয় তুমি সবার ;
অখিল জগত্ এই তব অংশভূত,
পরমা প্রকৃতি তুমি আদি অব্যাকৃত ।

* * * *

* * দেবী বেদ-স্বরূপিণী ;

হও শব্দ - রূপা, বিশ্ব-সস্তাপ-হারিণী,
ভগবতী বিশ্ব - সৃষ্টি - প্রবৃত্তি - রূপিণী ।

তুমি মেধা—জ্ঞাত যাহে সৰ্বশাস্ত্র-সার ;

তুমি হুর্গা—সহুর্গম ভব-পারাবার

তরিতে তুমি তরণি, অদ্বিতীয়া একা তুমি ;

তুমি লক্ষ্মী—একা বিষ্ণু-হৃদয় - বাসিনী,

তুমি গৌরী—চন্দ্রচূড়-হৃদি-বিহারিণী ।”

ইহার পর তৃতীয় স্তব । শুশ্রু-নিশুশ্রু কর্তৃক নিপীড়িত হইয়া,
দেবগণ এই স্তবে, এই বিষ্ণুমায়া দেবীকে তুষ্ণী করিয়াছিলেন ।
এই স্তব সৰ্বজন-প্রসিদ্ধ । এই স্তবে বৃদ্ধান হইয়াছে যে, দেবী
সৰ্ব-স্বরূপিণী । তিনি শিবা, প্রকৃতি, ভদ্রা, রোদ্রা, নিত্য্য ;
তিনি গৌরী, ধাত্রী ; তিনিই স্মৃথ-রূপা ; তিনি কল্যাণী, সিদ্ধি-
স্বরূপিণী ; তিনিই লক্ষ্মী, অলক্ষ্মী, শৰ্কানী, হুর্গা, কৃষ্ণা, ধুম্রবর্ণা,
প্রতিভা-রূপিণী । তিনি বিশ্ব-স্থিতি-রূপা, ক্রিয়া-কলাপ-রূপিণী ।
এই দেবীই সৰ্বভূতে বুদ্ধি, নিদ্রা, ক্ষুধা, ছায়া, শক্তি, তৃষ্ণা,
ক্ষান্তি, জাতি, লজ্জা, শাস্তি, শ্রদ্ধা, কাস্তি, লক্ষ্মী, বৃত্তি, স্মৃতি,

দয়া, তুষ্টি, দ্রাস্তি-রূপে অবস্থান করেন। আরও তিনিই সেই দেবী --

“যেই দেবী মাতৃ-রূপে
স্থিতা সৰ্ব-ভূতের অন্তরে,
নম তাঁরে—নম তাঁরে
বার বার নমস্কার তাঁরে।

* * *

ইন্দ্রিয়ের অধিষ্ঠাত্রী,
পঞ্চ-ভূতে যার অধিষ্ঠান,
সৰ্ব-ভূতে ব্যাপ্ত সদা,
দেবী তাঁরে প্রণাম—প্রণাম।
চৈতন্য-রূপেতে যিনি
সৰ্ব বিশ্ব ব্যাপি বিদ্যমান,
প্রণাম—প্রণাম তাঁরে—
বার বার তাঁহারে প্রণাম।

তাহার পর চতুর্থ স্তব। শুভ-নিশুভ-বধের পর, দেবগণ দেবীর এই স্তব করিয়াছিলেন। এই স্তবও অতি প্রসিদ্ধ। ইহা হইতে আমরা জানিতে পারি—এই দেবী চরাচরের ঈশ্বরী, সৰ্ব-ভূতা, স্বৰ্গ-মুক্তি-প্রদায়িনী, সৰ্ব-জীবের বুদ্ধি-রূপিণী। ইনি সৃষ্টি-স্থিতি-সংহারের শক্তি-ভূতা, গুণময়ী ও গুণের আধার স্বরূপা। ইনিই ব্রহ্মাণী, মাহেশ্বরী, কৌমারী, প্রভৃতি অষ্ট-মাতৃকা-রূপিণী।—

“ব্রহ্মাণ্ড-আধার-রূপা হও মাগো তুমি একা,
তুমিই যে মহী-রূপে আছ অবস্থিত ;

কিন্তু চণ্ডীর এই মহামায়া—মহাশক্তি—চিন্ময়ী। তিনি চৈতন্য-রূপে সর্ব-বিশ্ব ব্যাপিয়া আছেন। সর্বভূতে তিনি চৈতন্য-রূপে অধিষ্ঠিতা। সূতরাং সাংখ্যের প্রকৃতি ও বেদান্তের মায়া অপেক্ষা, এই শক্তিতে আরও কিছু আছে। কিন্তু সেই কিছু যে কি—তাহা চণ্ডীতে স্পষ্ট করিয়া উল্লিখিত হয় নাই। পরবর্তী শাক্ত-ধর্মগ্রন্থে বুঝান হইয়াছে যে, এই আদ্যাশক্তি ও ব্রহ্ম একই। ব্রহ্মের সহিত এই শক্তির বা মায়ার কোন প্রভেদ নাই। যিনি ব্রহ্ম—তিনিই এই দেবী মহামায়া। বৈদান্তিক, মায়া-অংশ বাদ দিয়া, ব্রহ্মকে বুঝিতে যান। আর শাক্ত পণ্ডিত, মায়ার সহিত ব্রহ্মকে একত্রে দেখেন। শাক্তগণ ব্রহ্মের সহিত এই মায়ার কোন প্রভেদ দেখেন না। এই মহাশক্তি বা মায়া বাদ দিলে, ব্রহ্ম কিছুই নহেন—তিনি কেবল শব মাত্র।

এই ব্রহ্ম-শক্তি হইতেই, সৃষ্টিতে ব্রহ্মা, বিষ্ণু ও শিবের উৎপত্তি কল্পিত হইয়াছে। এই মূল-প্রকৃতিতে যে সত্ত্ব রজ তম—তিন গুণের বিকাশ সৃষ্টিতে দেখা যায়, সেই তিন গুণের অবিষ্টা-পুরুষই—ব্রহ্মা, বিষ্ণু ও শিব নামে পুরাণে অভিহিত। এস্থলে সে সকল প্রসঙ্গের প্রয়োজন নাই।

এই রূপে আমরা দেখিতে পাই—চণ্ডীতে এই যে ‘শক্তিবাদ’ প্রচারিত হইয়াছে, ইহা জড়বাদ নহে। কেন না, এই শক্তি চৈতন্য-ময়ী—অথবা এই শক্তিই একাংশে চৈতন্য-রূপে জগতে ব্যাপ্ত। আর সেইজন্ত এই শক্তিবাদ—মায়াবাদ বা প্রকৃতিবাদ নহে। আধুনিক শাক্ত পণ্ডিতগণের শক্তিবাদ—অদ্বৈতবাদের রূপান্তর মাত্র। যাহা হউক, সে সকল দার্শনিক তত্ত্ব এস্থলে বুঝিবার প্রয়োজন নাই।

আমরা চণ্ডীর এই শক্তিবাদের প্রধান বিশেষত্ব উল্লেখ করিয়াছি। এই শক্তি চণ্ডী-মতে চিন্ময়ী। ব্রহ্ম সচ্চিদানন্দময়।—এই শক্তিও সচ্চিদানন্দময়ী। যাহাকে আমরা ব্রহ্মের শক্তি-রূপে কল্পনা করি—তিনিই এই মহামায়া। শক্তি ও শক্তিমান মধ্যে, মূলতঃ কোন প্রভেদ নাই। তবে জ্ঞানে আমরা এই একত্ব ধারণা করিতে অসমর্থ বলিয়া, তাহার পার্থক্য ধারণা করিতে বাধ্য হই। চণ্ডীর শক্তিবাদের দ্বিতীয় বিশেষত্ব এই যে, এই শক্তিকে মাতৃ-ভাবে ধারণা ও উপাসনা করা হয়। চণ্ডীতেই এই মাতৃ-ভাবে আরাধনা প্রথম প্রবর্তন হয়। চণ্ডীতে উক্ত হইয়াছে—এই দেবী মাতৃ-রূপে সর্বভূতে সংস্থিত। আর জগতে সকল নারীই এই জগন্মাতা মহাশক্তির অংশ।

জগতে আমরা দুইরূপ শক্তির বিকাশ দেখিতে পাই—এক ‘পিতৃশক্তি’ আর এক ‘মাতৃশক্তি’। এই পিতৃ-শক্তিকে পুরুষ-রূপে ও মাতৃ-শক্তিকে স্ত্রী-রূপে ধারণা করা হয়। মহামায়া—এই আদি মাতৃ-শক্তি। এই মাতৃ-শক্তি বিশ্ব-ব্রহ্মাণ্ডে সর্বত্র ব্যাপিয়া আছে; ইহাই জগৎকে রক্ষা করিতেছে—পোষণ করিতেছে। এই শক্তি-প্রভাবেই জীবজাতির রক্ষা ও বৃদ্ধি হইতেছে। বলিয়াছি ত এই মহাশক্তি—এই আদ্যাশক্তিই,—মাতৃ-শক্তি-রূপে বিকাশিত। এই জন্তু সেই সর্ব-মঙ্গল-দায়িনী শক্তিময়ী জননীর সাধনাই চণ্ডীতে বিহিত হইয়াছে। এই মাতৃ-ভাবে আদি জগৎ-শক্তিকে ধারণা করিবার মূলে, অতি নিগূঢ় দার্শনিক তত্ত্ব নিহিত আছে। নিগূঢ় ব্রহ্ম জ্ঞানে ধারণা হয় না। আমাদের জ্ঞান—সীমাবদ্ধ। ইহা কেবল সগুণ ব্রহ্ম ধারণা

করিতে পারে। সেই ব্রহ্ম—কেবল পুরুষ নহেন। তিনি পুরুষ-
 স্ত্রী এই দ্বৈত-ভাবময়—‘পিতা-মাতা’ স্বরূপে আমাদের জ্ঞানে
 প্রতিভাত। ইহাদের মধ্যে, শক্তি,—স্ত্রী বা প্রকৃতি-রূপিণী—
 জগন্মাতা। আর শক্তির আধার,—পুরুষ—পিতা। কিন্তু সেই
 অতি গূঢ় দার্শনিক তত্ত্বের বিস্তারিত উল্লেখ এস্থলে সম্ভব
 নহে।

যাহা হউক, আজি পর্যন্ত আর কোন দেশে—কোন দর্শনে—
 আদ্যাশক্তিকে এই মাতৃ-ভাব ধারণা করা হয় নাই।—কোন ধর্মে—
 এইরূপ মাতৃ-ভাবে উপাসনাও প্রবর্তিত হয় নাই। আশ্চর্য্য যে
 এমন কোমল মধুময় মর্শ্বস্পর্শী—এমন মন-প্রাণ-স্নিগ্ধকর উপাসনা,
 এমন জোর করিয়া ভগবানকে আপনার করিয়া লইয়া সাধনা, মার
 কাছে যেমন আবদার অভিমান চলে—তেমনই জোর করিয়া
 আবদার করিয়া আরাধনা, অদ্যাবধি আর কোথাও প্রবর্তিত হয়
 নাই। এই মহা মাতৃ-ভাবে আরাধনা—এক হিন্দু ব্যতীত জগতে
 সকল জাতির নিকট অজ্ঞাত। এক হিন্দু ব্যতীত, সকলেই এই
 মহা রসাস্বাদে বঞ্চিত। অমৃত-নিসান্দিনী ‘মা’ শব্দের মহিমা
 —তাহার অদ্ভুত শক্তি যিনি বুঝেন, তিনিই মাতৃ-ভাবে সাধনার মর্শ্ব
 হৃদয়ঙ্গম করিতে সক্ষম হইবেন। ইহার নিকট পিতৃ-ভাবে উপাসনা
 অনেক শক্তিহীন; বুঝি পতি-ভাবে মধুর রসের প্রেম-উপাসনাও
 ইহার সমতুল্য নহে। এই একমাত্র মহাতত্ত্ব প্রচার জ্ঞানই—
 চণ্ডীর অমরত্ব। এইজ্ঞান চণ্ডী—মহাধর্ম গ্রন্থ। এইজ্ঞানই চণ্ডী—
 সকল তত্ত্ব-জিজ্ঞাসুর নিকট বড় আদরের সামগ্রী।

চণ্ডীহইতে, আমরা আরও অনেক তত্ত্ব জানিতে পারি। কিন্তু

সে সমস্ত ভঙ্গের উল্লেখ এস্থলে সম্ভব নহে । তবে তাহার মধ্যে বিশেষ দুই একটির উল্লেখ করিব । চণ্ডীতে সাকার উপাসনার কথা আছে ; সকাম উপাসনার কথাও চণ্ডীতে কীৰ্ত্তিত আছে । আমাদের শাস্ত্র-মতে সকাম উপাসনা নিম্নাধিকারীর জ্ঞাত । কিন্তু চণ্ডীতে যে ঠিক এইরূপ বৃদ্ধান হইয়াছে— তাহা বোধ হয় না । চণ্ডীতে আমরা দেখিতে পাই, সুরথ ও সমাধি দুইজনে সংসার হইতে তাড়িত হইয়া দুঃখে বনে গিয়াছিল । ইঁহাদের মধ্যে সুরথ—ক্ষত্রিয়, উচ্চাধিকারী ; আর সমাধি—বৈশ্য, নিম্নাধিকারী । ইঁহারা উভয়ে মেঘস ঋষির নিকট চণ্ডীর মাহাত্ম্য শুনিয়া, নদীকূলে গিয়া দেবী চণ্ডীর মূৰ্ত্তয়ী মূৰ্ত্তি গড়িয়া, তিন বৎসর কাল ক্রমান্বয়ে তাঁহারই আরাধনা করেন । শেষে দেবী চণ্ডী প্রসন্না হইয়া মূৰ্ত্তিমতী হইলেন, ও তাঁহাদের অভিলষিত বর প্রদান করিলেন । এই বর লাভ করিয়া, সুরথ সে জন্মে নিজ রাজ্য ফিরিয়া পাইলেন, ও পর-জন্মে বৈবস্বত মনু হইলেন । আর এই বর লাভে, সমাধি বাঞ্ছিত জ্ঞান লাভ করিয়া, পরিণামে মুক্ত হইলেন । সুতরাং এস্থলে বোধহয় যে, সকাম সাধনাকে নিম্নতম সাধনা বলিয়া চণ্ডীতে ঠিক বৃদ্ধান হয় নাই । এইজন্ত আমরা চণ্ডীর স্তোত্রে দেখিতে পাই যে, তিনি যাঁহাদের প্রতি প্রসন্না— তাঁহারা ইহ-সংসারে সুখৈশ্বর্য্য ভোগ করেন, ও পর-কালে তাঁহাদের সদগতি হয়—পরিণামে মুক্তি হয় । চণ্ডীর দ্বিতীয় স্তোত্রের একস্থলে আছে—

“ প্রসন্না যাদের প্রতি, তাহারা নিরত

তোমা হতে লভে, দেবি ! অভ্যাদয় যত,

দেশে পূজা সেইজন, বুদ্ধি তার যশ-ধন,
 ধর্ম আদি চতুর্ভুজ নাহি হয় ক্ষয় ;
 তারা ধন্য—নিরুদ্ভিগ দারা-পুত্র রয়।”

সে যাহা হউক, চণ্ডী হইতে বুঝা যায় যে, এই সাকার
 উপাসনা হইতে ধর্মের মতি হয়—

গন্ধ পুষ্প ধূপ আদি দানে—
 করিলে তাহার পূজা আর স্তুতি,
 দেন তিনি সম্পদ-সম্ভান,
 আর দেন তিনি ধর্মের শুভ-মতি।

এই ধর্মের মতি হইতে, ক্রমে ধর্ম-পথে অগ্রসর হওয়া যায়।
 এবং পরিশেষে তাহা হইতেই মুক্তি-ইচ্ছা জন্মে। তখন সংসার-
 স্মৃথে বিরাগ উপস্থিত হয়। আবার চণ্ডীতেই আছে—

“ চিন্তার অতীত যিনি মুক্তির কারণ,
 কঠোর-সাধনা-লভ্যা ; যারে ঋষিগণ
 ইন্দ্রিয় সংযম করি সর্ব-দোষ পরিহরি
 চিন্তাকরে মোক্ষ-তরে তত্ত্বজ্ঞানে রতি,—
 সেই পরা-বিদ্যা তুমি দেবী ভগবতী।”

অতএব মুক্তির জন্ত সাধনা—সে বড় কঠিন সাধনা। শুধু
 সাকার উপাসনায় তাহা সিদ্ধ হয় না ;—সকাম সাধনাতেও তাহা
 লাভ হয় না। বৈশ্ব সমাধিও পূজা অর্চনায় দেবীকে প্রসন্ন
 করিয়া, আসক্তি-শূণ্য হইয়া, জ্ঞান প্রার্থনা করিয়াছিলেন ;—
 মুক্তি প্রার্থনা করেন নাই। কেন না, জ্ঞান নহিলে মুক্তি হয় না।
 আর সকাম আরাধনায় একেবারেও সে জ্ঞান লাভ হয় না।

দেবী সমাধিকে বর দিয়াছিলেন—জ্ঞান লাভ করিয়া, তাহা দ্বারাঃ
ক্রমে সিদ্ধ হইবে ।

তথাপি আমরা বলিতে বাধ্য যে, চণ্ডীতে কোথাও সকাম
সাধনাকে হেয় বলা হয় নাই । সকাম সাধনা পূর্বে বেদে
প্রবর্তিত ছিল । পরে নানা কারণে সেই সকাম ধর্মের লোপ হইয়
ভারতে বৈরাগ্যের বিস্তার হইয়াছিল । চণ্ডীতে সেই সকাম
সাধনার পুনঃ প্রচার দ্বারা, ধর্ম জগতে যুগান্তর উপস্থিত হইয়াছিল
জ্ঞানের ক্রমোন্নতি-বলে বা অধিকার-অনুসারে, সকাম সাধনা হইতে
ক্রমে ক্রমে নিষ্কাম সাধনায় আরোহণ করা যায় ; প্রতিমাতে ব
বস্ত্ত কিম্বা ব্যক্তি বিশেষেতে ঈশ্বর ধারণা হইতে ক্রমে ক্রমে বিশ্ব
রূপ ঈশ্বরের ধারণায়, ও শেষে এক অদ্বিতীয় ব্রহ্ম বা ব্রহ্ম-
শক্তির ধারণায় আরোহণ করিতে হয় ।—এই অতি নিগূঢ়-তত্ত্ব
চণ্ডী হইতে শাক্তগণ প্রথম আবিষ্কার করিয়া সাধনার স্তব স্থির
করিয়াছিলেন, এবং এইজন্ত তাঁহারা সকল প্রকার ধর্ম-সাধনা মধ্যে
এক অনন্ত সত্যের ধারণা করিয়াছিলেন । যাহা হউক, সে সকল
বিষয় এস্থলে আলোচ্য নহে ।

চণ্ডীতে যে অদ্ভুত শক্তিবাদ প্রচারিত হইয়াছে, তাহা চণ্ডীর
পূর্বে আর কোথাও পরিষ্কার রূপে উল্লিখিত হয় নাই । বেদে যে
দেবী-স্মৃতি আছে, তাহাতে স্পষ্টরূপে এই শক্তিবাদ বুঝান নাই ।
তবে চণ্ডী হইতে বুঝা যায় যে, এই দেবী-স্মৃতিতেই শক্তিবাদের
মূল বলিয়া, চণ্ডীতে ধরিয়া লওয়া হইয়াছে ।

বেদান্তে বা দর্শন-গ্রন্থে কোথাও শক্তিবাদ প্রচারিত হয় নাই ।
'তারি উপনিষদ' প্রভৃতি কতকগুলি শাক্ত উপনিষদ আছে বটে, কিং

তাহা নিতান্ত আধুনিক বলিয়া পণ্ডিতগণ স্বীকার করেন। পূর্বে বলিয়াছি যে, দর্শনের 'মায়াবাদ' বা 'প্রকৃতিবাদ' এই 'শক্তিবাদ' হইতে ভিন্ন। এই শক্তিবাদ পৌরাণিক। পুরাণের মধ্যে আবার মার্কণ্ডেয় পুরাণেই চণ্ডী-মাহাত্ম্য প্রথমেই বিবৃত হইয়াছিল বলিতে হইবে। 'ভগবতী পুরাণে' যে চণ্ডী-মাহাত্ম্য বিবৃত আছে, তাহা এই চণ্ডী হইতেই অনুকৃত বলিয়া বোধ হয়। 'কালিকা পুরাণ' ও 'দেবী পুরাণ' যে উপপুরাণ ও চণ্ডীর পরদর্ভী গ্রন্থ—তাহা সকলেই স্বীকার করিয়া থাকেন। অতএব স্বীকার করিতে হইবে যে, এই চণ্ডী-গ্রন্থেই শক্তিবাদ প্রথম প্রচারিত হইয়াছিল। এইজন্যই হিন্দুর নিকট চণ্ডীর এত আদর,—ধর্ম-জগতে চণ্ডীর স্থান এত উচ্চ। এই জন্যই বোধহয় শক্তিবাদের প্রথম-প্রবর্তক মার্কণ্ডেয় ঋষি ত্রিকাল-দর্শী, এবং ব্রহ্মার সাতদিন ব্যাপিয়া তাঁহার জীবন-কাল, ইহা পুরাণে উল্লিখিত হইয়া থাকে। যিনি এই শক্তিবাদ প্রবর্তন-কর্তা—যিনি মাতৃ-ভাবে সাধন-পথের প্রথম-প্রদর্শক, তিনি যে এইরূপে অমরত্ব লাভ করিবেন, ইহাতে আশ্চর্যের বিষয় কিছুই নাই।

এই শক্তিবাদ প্রচারিত হওয়াতে, ধর্ম-জগতে যে মহা বিপ্লব ঘটয়াছিল তাহার ফলে এই শক্তিবাদ এক সময় সমগ্র ভারতে পরিব্যপ্ত হইয়াছিল। এমন কি তিব্বত, চীন প্রভৃতি দূর দেশে, বৌদ্ধগণ এই শক্তিবাদ আংশিক-রূপে গ্রহণ করিয়াছিলেন। কিন্তু সে সকল কথাও এস্থলে উল্লেখের প্রয়োজন নাই।

যাহা হউক, যে মহাপুরুষ এই অদ্ভুত শক্তিবাদ প্রথম প্রচার করিয়াছিলেন—ধর্ম-জগতে ইহার প্রথম প্রতিষ্ঠা করিয়াছিলেন, তাঁহার জয় হউক। আমরা ক্ষুদ্র মানব—তাঁহার মহিমা বুঝিতে

অসমর্থ । আমরা তাঁহার এই শক্তিবাদের মৰ্ম বুঝিতেও অক্ষম ।

আমরা বিজ্ঞান-প্রসাদে বুঝিতে পারি যে, এক অনন্ত জড়-শক্তি এই জগৎ ব্যাপিয়া সর্বত্র বিদ্যমান আছে । সে শক্তি নিত্য,—তাহা এক । তবে তাহা রূপান্তর হইয়া, নানা রূপে আমাদের জ্ঞানে প্রকাশিত হয় । আমরা বিজ্ঞান-প্রসাদে আরও অনুমান করিতে পারি যে, যাহাকে আমরা জড়-পরমাণু বলি— তাহাও এই শক্তির রূপান্তর মাত্র । কিন্তু ইহার অধিক আর আমরা বুঝিতে পারি না । এক অনন্ত-চৈতন্য-শক্তি যে সর্ব-জগৎ ব্যাপিয়া বিরাজ করিতেছেন,—এ জড়-শক্তি যে তাহারই একরূপ অভিব্যক্তি মাত্র—জীবের জৈব-শক্তি, তাহার চিত্ত, জ্ঞান প্রভৃতি সমুদায়ই যে সেই অনন্ত-শক্তির বিভিন্ন বিকাশ মাত্র, তাহা আমরা ধারণা করিতে পারি না ।—এই মহাশক্তি যে মাতৃ-রূপে বিকাশিত হইয়া, জীবজাতির পোষণ ও আপূরণ করিতেছেন, এবং কি পুরুষ, কি স্ত্রী সকল জীবের অন্তরেই মাতৃ-ভাবে বিকাশিত হইয়া, তাহাদের স্বার্থ-বৃত্তি সংযত করিয়া দিয়া—পরার্থ-বৃত্তির ক্ষুর্ভি ও পরিণতি করিয়া দিয়া, জীবজাতির ও সমাজের উন্নতি বিধান করিতেছেন, তাহা সহজে আমরা ধারণা করিতে পারি না । * আমরা বুঝিতে পারি না যে, এই কার্যাত্মক জগতে নিয়ত যে কৰ্ম-চক্র প্রবর্তিত হইতেছে—তাহা এই শক্তিরই ক্রিয়া মাত্র । যে কিছু কৰ্ম, চিন্তা বা ভাব অতীতের গর্ভে বিলীন হইয়া যাইতেছে—তাহা এই

* আধুনিক বিলাতী পণ্ডিত ড্রামণ্ড (Drummond) তাঁহার Ascent of man নামক পুস্তকে এই কথা কঠক বুঝাইয়াছেন ।

শক্তিতেই অবস্থান করিতেছে ;—কিছুই লোপ হয় না।—কেবল ব্যক্ত হইতে অব্যক্তে বিলীন হইয়া যাইতেছে,—কভু বা অব্যক্ত হইতে ব্যক্ত-রূপে—বর্তমানে পরিণত হইতেছে। আমরা ধারণা করিতে পারি না যে, আমাদের আমিত্বকে এই শক্তির প্রবাহে মিশাইয়া দিতে পারিলে, সেই মহা যোগের অবস্থায় আমরাও ত্রিকাল-দর্শী হইতে পারি—মুক্ত হইতে পারি ;—দেশ-কাল-কারণ-স্থত্রের বাধা অতিক্রম করিয়া, জ্ঞানকে মায়া-বন্ধন হইতে মুক্ত করিতে পারি। আমরা ক্ষুদ্র মানব, সে সকল বড় কথা বুঝিতে সক্ষম নহি। সে দিন দুই একজন শ্রেষ্ঠ জার্মান দার্শনিক পণ্ডিত* একথা আভাষে বুঝিয়াছিলেন। কিন্তু তাহা এস্থলে উল্লেখের প্রয়োজন নাই ; পারিত সে সকল কথা পরে বুঝিতে চেষ্টা করিব।

* Shopenhaur's "World as Will & Idea" Hartmanns "Philosophy of the Unconditioned."

এই প্রস্তাব দীর্ঘ হইয়া পড়িয়াছে। চণ্ডীর শক্তিবাদ সম্বন্ধে যাহা বলিবার ছিল—তাহা শেষ করিতে হইতেছে। যদি সময় পাই তবে শক্তি-বাদের বিশেষ আলোচনার ইচ্ছা রহিল। যাহা হউক, যতদূর দেখা গেল তাহা হইতে বুঝা যাইবে যে, শক্তিবাদের মূলে অতি গভীর তত্ত্ব নিহিত আছে! চণ্ডীতে এই অদ্ভুত শক্তিবাদ প্রথম প্রচারিত বলিয়া, ধর্ম-জগতে চণ্ডীর স্থান এত উচ্চ। চণ্ডীতে অনন্ত মহাশক্তির স্বরূপ বুঝান আছে। আমরা চণ্ডী হইতেই, সেই মহাশক্তির পূজা করিতে শিখি ;—সেই অনন্ত-চিন্ময়ী-শক্তিকে মাতৃ-ভাবে ধারণা করিতে পারি ;—মাতৃভাবে তাঁহাকে আরাধনা করিতে শিখি। আমরা এই চণ্ডী হইতেই, প্রত্যেক নারীকে এই

মহামায়ার অংশ-রূপা জানিয়া—নারীকে মাতৃভাবে দেখিতে শিখি ; আমরা এই অনন্ত শক্তির দ্বারা চালিত, আমাদের নিজস্ব কিছুই নাই, ইহা বুঝিতে পারিয়া অহঙ্কার পরিহার করিয়া সেই ভগবতী আদ্যাশক্তির শরণ লইবার উপদেশ পাই ।

চণ্ডী—জ্ঞানীর নিকট জিজ্ঞাসুর নিকট শক্তিবাদ প্রচার করিয়া, জগতের অজ্ঞেয় তত্ত্ব জ্ঞানের বিষয়ীভূত করিয়া দিয়াছে । চণ্ডী—ভক্তের নিকট মাতৃভাবে ঈশ্বরোপাসনা প্রবর্তিত করিয়া, তাহার ভক্তি বৃত্তির পূর্ণ চরিতার্থতার উপায় করিয়া দিয়াছে । চণ্ডী—কর্মীর নিকট সকাম শক্তির পূজার বিধান প্রচারিত করিয়া, তাহা কর্ম-বৃত্তির উপযুক্ত অমুশীলন দ্বারা ধর্মরাজ্যে যাইবার তাহার যোগ্য একটা পথ দেখাইয়া দিয়াছে । চণ্ডী—আত্ম-সর্বস্ব স্বার্থপর আত্মরী লোকের নিকট তাহার ক্ষুদ্র সসীম আমিত্বের চারিদিকে অসীম অনন্ত শক্তির একরূপ অতি ভীষণ অথচ অতি স্নেহময় ভাব তাহার ধারণা-যোগ্য করিয়া প্রতিষ্ঠা পূর্বক, তাহার অভিমানকে সঙ্কীর্ণ করিয়া তাহার হৃদয়ে ধর্ম-বীজ বপন করিবার একরূপ উপায় করিয়া দিয়াছে । এই জগুই হিন্দুর নিকট চণ্ডীর এত আদর—এত সম্মান—এত পূজা । তাই চণ্ডী হিন্দুর নিকট অমৃত নিশ্চন্দিনী অপূর্ব গ্রন্থ হিন্দুর প্রত্যহ—পাঠ্য ধর্ম পুস্তক ।

বিলাতি পণ্ডিত রস্কিন গ্রন্থ সকলকে দুই শ্রেণীতে বিভাগ করিয়াছেন । কতকগুলি গ্রন্থ—চিরকালের (Books for all times) ; আর কতকগুলি—ক্ষণেকের (Books for the hour) । এই চণ্ডীগ্রন্থকে যাহারা ধর্ম-গ্রন্থ বলিয়া সম্মান করিতে না পারেন, তাহারাও চণ্ডীতেই এই অদ্বুত শক্তিবাদের প্রথম প্রচার

স্রষ্টা, ইহাকে চিরকালের সম্পত্তি—'Books for all times' বলিয়া আদর করিতে বাধ্য হইবেন। আজকাল শিক্ষিত সম্প্রদায় মধ্যে অনেকেই হিন্দু ধর্মে আস্থাবান। অনেকে গীতার আদর করিতে আরম্ভ করিয়াছেন। ক্রমে তাঁহারা গীতার ঞ্চায় চণ্ডীরও আদর করিবেন—সন্দেহ নাই। চণ্ডীগ্রন্থে গীতার ঞ্চয় ধারাবাহিক রূপে তত্ত্বালোচনা না থাকিলেও, তাহাঙ্কত যে সাধরণের বোধগম্য করিয়া অনেক মূল ধর্ম-তত্ত্ব আলোচিত হইয়াছে তাহা স্বীকার করিতেই হইবে।

এই ক্ষুদ্র আলোচনা হইতে, যদি কেহ চণ্ডীর আদর করিতে আরম্ভ করেন, চণ্ডীর শক্তিবাদ বৃদ্ধিতে চেষ্টা করেন,—জগতের মূল শক্তিকে মাতৃভাবে ধারণা ও উপাসনা করিতে শিক্ষা করেন, তবে আমাদের শ্রম সার্থক মনে করিব।

সম্পূর্ণ।



মহিয়াড়ী সাধারণ গুলুকালয়

নির্দ্ধারিত দিনের পরিচয় পত্র

নম্বঃ ৩০০৩৩

পরিগ্রহণ সংখ্যা.....

এই পুস্তকখানি নিম্নে নির্দ্ধারিত দিনে অথবা তাহার পূর্বে
গ্রন্থাগারে অবশ্য ফেরত দিতে হইবে। নতুবা মাসিক ১ টাকা হিসাবে
জরিমানা দিতে হইবে।

নির্দ্ধারিত দিন	নির্দ্ধারিত দিন	নির্দ্ধারিত দিন	নির্দ্ধারিত দিন
৩৬. ৩. ৩৬			

এই পুস্তকখানি বাক্তি গতভাবে অথবা কোন ক্ষমতা-প্রদত্ত
প্রতিনিধির মারফৎ নির্দ্ধারিত দিনে বা তাহার পূর্বে ফেরত হইলে
অথবা অশ্রু পাঠকের চাহিদা না থাকিলে পুনঃ ব্যবস্থার্থে নিঃসৃত
হইতে পারে।

